

正學啟蒙三字頌註  
陽復齋詩偈集  
合編

余覺題卷



任印功德芳名錄

汪序昭一百七十元

幣費內包  
札在內

吳寄塵五十元

吳鯉卿五十元

周守良五十元

眞達師一千册

佛學書局五百册

餘由 印光老法師墊印

民國廿一年一月初版五千

三字頌箋註  
陽復齋詩偈集  
合本一册

〔流通處〕

蘇州鹽鐵街南段穿心街羅國寺內  
佛教弘化社

上海開北新界民壽園盤路口  
佛學書局

〔藏版處〕

上海新大沽路六七一號  
國光印書局  
電話三三七四三號

正學啓蒙三字頌自序

宋王應麟著三字經。風行於世家。習而戶知之。其爲書也。專以儒而通於俗。明西蜀吹萬老人著釋教三字經。清楊仁山居士著佛教初學課本。亦三字爲句。是二書也。體大矣。以其專於述佛而行之未廣。夫童子者。教之善。則爲聖賢之所基。教之不善。則爲愚不肖之所自。不可以不慎也。王陽明先生曰。天下之大亂。由虛文勝而實行衰也。深慨六朝唐宋以來。士習詞章。務文棄實。俗學之弊久矣。歐化乘虛而入。變本加厲。毀聖廢經。人道淪亡。於今尤甚。因絜矩正學。取便啓蒙。輯爲之頌。上篇述佛。中篇述孔老。下篇述歷代學史之要。三字爲句。便以習熟。深入識田。爲金剛種。永而不壞。若夫抽苗聳幹。敷花成實。則有俟夫糞溉之力。雨暘之加。而時日之至焉。書成。以呈普陀印光法師。師可之。加點定焉。齊用修居士相從講論者一年。發願爲箋註。以備教者學者之參考。予因而損益之。而以各門精要應讀之書。附見於次。斯頌之旨。對儒釋互闡。解行互策。德業兼修。教養兼籌。男女俱教。老少俱勉。人物一體。事理一如。文字與義理相需。道學與科學互佐。世法與出世法雙詮。如人眼耳鼻舌身意六

根無所偏主偏缺。庶幾具體之云也。夫自童子不得養正之教。而壯而老。而未免於蒙者。比比然也。得是編而求之。以自進於無疆。將爲泰山。此則一簣。將爲巨海。此則一杯。長夜之行。此則一燈。其亦無棄焉。而豈能限之哉。婺源陽復子江謙。敘於時民國十九年庚午孟秋月也。

正學啓蒙三字頌發刊序

人同此心。心同此理。生佛不二。凡聖一如。儒釋聖人。先得吾心之所同然。惑衆生迷。而未悟。莫得受用。由是各垂言教。以啓迪之。期其各得親證此理。又復以先覺覺後覺也。然儒主經世。故其說注重倫常。于心性極致。不過略示端倪而已。若能研究佛學。有所悟會。則卽倫常日用。無不一真畢露。左右逢源。故古今來建大功。立大業。精忠貫日月。浩氣塞天地者。多從學佛得力而來。所謂不知佛法。莫由知儒。不知出世之妙。莫由經世也。釋主出世。故舉世間倫常。與心性極致。一一徹底發揮。隨機施教。對證發藥。俾一切衆生。各隨其機。而得實益。以故遇父言慈。遇子言孝。兄弟恭夫。和婦順。主仁僕忠。一一示其前因現果。現因後果。使人欲爲惡而有所不敢。欲不爲

善而有所不能。儻人各知此義。有不彝倫攸斁。天下太平乎哉。此殆佛教人乘天乘法耳。其效尙能如是。若聲聞緣覺菩薩佛乘之利益。又何可得而測量者哉。所惜宋儒量小。由學佛法。得知聖人之心法。欲推尊儒教。反從而闢駁佛法。其所闢駁者。實爲令人誠意正心。盡誼盡分之根本。如三世因果六道輪迴。此天下古今之實理實事。人若知此。何敢違心悖理。以取罪戾。致未來墮不如意處。則不期然而正心誠意。盡誼盡分矣。宋儒謂佛以因果報應生死輪迴。誘惑愚俗。不知人稟天地之氣以生。及其已死。則形既朽滅。魂亦飄散。縱有刑罰。將何所施。誤謂一死永滅。成大邪見。以一傳諸。貽害後世。大悖聖人原始返終。故知死生之說。精氣爲物。游魂爲變。是故知鬼神之情狀之義。由是好邪之輩。敢于爲惡。以一死永滅。堯桀同歸于盡。又何必繩趨尺步。受此拘束。以致徒勞一生。又何不肆志縱情。隨意所爲。以享自由自在之幸福乎。因茲善無以勸。惡無以懲。彼此效尤。以致成此廢經廢倫之現象。在彼本意。恐提倡因果報應。生死輪迴。人必多歸于佛。故特闢駁以關閉之。令人無由趣入。庶可儒教興盛。永久無替。而不知反將聖人之道。由此滅沒。可不哀哉。婺源江易園居士。

宿植德本。品粹學優。初則專宗程朱。不知佛爲何如人。後以閱歷既深。拘見漸消。試閱佛經。則如登泰山。徧觀四虛。心神暢悅。非言可喻。始知先儒以門庭知見。俾後世不沾法利。不勝痛惜。于是隱居家鄉。依之修持。一鄉之人。悉從其化。又思啓迪後來。俾得實益。因作三字頌。略述儒佛立教覺世之大旨。并歷史諸子之綱要。庶學者不被前人門庭語言所誤。而同得以盡倫學。儒盡性學。佛經世出世。合而爲一。明明德。以止至善。無所住而生其心。不著一法。具修衆善。永離四相。圓彰萬德。證吾心本具之法。續如來所得之道。遠令先聖暢懷。近爲宋儒補過。其爲功德。實非淺鮮。門下士齊用修。又爲之註。俾閱者一目瞭然。李圓淨居士。特爲排印。祈余作序。以冀廣傳。因不揣固陋。述其大略。願爲父兄及膺教育之職者。令諸子弟同讀誦之。則知在儒在釋。了無二道。經世出世。原是一法。因果明而心性自悟。彝倫敘而天下太平。此理勢所必然者。明眼人當不以余言爲河漢也。

民國二十年辛未仲春常慚愧僧釋印光撰

正學啓蒙三字頌箋註

印光法師審定

江謙謹述

齊朝章敬箋

上篇 述佛

眞如性一 無不善 眞不妄 如不變 無明熏二 性光掩

如雲遮 日不見 雲翳消 日光現 多生習三 貪瞋癡四

隨所遇 惡業滋五 戒定慧六 能破之 戒止惡 定止散

慧明心

習氣斷

性須悟

悟須學

解與行

功獨倬

先覺者 教後覺

九  
真如謂一切衆生本來圓滿常住不變之真心。唯識論真謂真實顯非虛妄。如謂如常表無變易。無明癡暗也。大乘章義言無明者癡闇之心體無慧明。故曰無明。圓覺經此無明者非實有體。如人病目見空中華。及第二月。善男子。空實無華。病者妄執。真如不生滅。無明生滅之義。詳見馬鳴菩薩大乘起信論。多生謂多世之生身也。法集經能知一生二生百生千生百千萬生乃至無量阿僧祇生。無量百千億那由他生。貪無饜也。瞋恚怒也。癡不慧也。經稱貪瞋癡三者爲三毒。以其爲衆生之大害也。乖理之行謂之惡。身口意三者爲三業。華嚴經普賢行願品菩薩自念。我於過去無始劫中。由貪瞋癡發身口意。作諸惡業。無量無邊。若此惡業有體相者。盡虛空界不能容受。又偈云。我昔所造諸惡業。皆由無始貪瞋癡。從身語意之所生。一切我今皆懺悔。戒定慧楞嚴經。名爲三無漏學也。



名義集。防非止惡曰戒。息意靜緣曰定。破惡證真曰慧。三藏法數。如來立教有三。一曰戒律。二曰禪定。三曰智慧。然非戒無以生定。非定無以生慧。三法相資。不可缺一。戒如風波息。定如水澄清。慧如影像現。正覺謂之悟。研究真理。以斷妄惑。謂之學。解與行者。解理與行事也。如人之行。目足並運。天台戒疏於出世道。解而勤行。故名解行。倬大也。孟子述伊尹語曰。天之生斯民也。使先知覺後知。使先覺覺後覺也。

天人師 莫如佛 三界尊 最高出 過現未 三大劫

各千佛 出應世 釋迦佛 當現劫 千佛中 屬第四

佛法身 莫能量 窮三際 徧十方 本無生 何有滅

隨因緣 示生滅 十方界 與三世 一切佛 悉如是

十一 三覺圓

稱佛寶

十二 五乘法

稱法寶

十三 三乘僧

稱僧寶

十四 唯三寶

十五 性常住

不見聞

由薄福

唯三寶

十六 應歸依

諸惡業

得遠離

十七 成正覺

此爲基

◎天人師。如來十號之一。智度論問曰。佛能度龍神等。墮餘道中生者。何獨言天人師。答曰。度餘道中生者少。度天人生者多。佛梵語。佛陀譯言覺者。或智者。佛地論於一切法。一切種相。能自開覺。亦開覺一切有情。如睡夢覺醒。如蓮華開。故名佛。法華文句。西竺言佛陀。此言覺者。知者。對迷名知。對愚名覺。大乘章義。聖慧一起。朗然大悟。如睡得寤。故名爲覺。既能自覺。復能覺他。覺行圓滿。故名爲佛。◎三界者。凡夫生死往來之世界。分爲三。一欲界。有淫欲與食欲之有情住所也。上自六欲天。中自人界之四大洲。下至無間地獄。謂之欲界。二色界。色爲質礙之義。此界在欲界之上。離淫食二欲之有情住所也。三無色界。此界天人。唯佛眼能見。羅漢眼

尙不能見。唯以心識住於深妙之禪定。故謂之無色界。三界尊。佛之德稱。佛爲三界中之尊也。維摩經佛國品。我今稽首三界尊。劫。最永之年時也。世界有成住壞空四劫。過去之住劫。名莊嚴劫。現在之住劫。名賢劫。未來之住劫。名星宿劫。三住劫。各有一千佛出世。現在賢劫。有名拘留孫佛。是爲千佛之第一。次爲拘那含牟尼佛。次爲迦葉佛。釋迦佛。其第四也。次有彌勒佛出世。次有師子佛等九百九十四佛。次有樓至佛出世。合一千佛。釋迦牟尼佛。西域天竺之迦維衛國。淨飯王太子也。佛降生事迹。詳見過去現在因果經。法身。卽佛與一切衆生。同具常住徧在之本性。梁昭明太子曰。法者軌則爲旨。身者有體之義。軌則之體。故曰法身。莫能量者。佛之法身。無邊際也。西域記。有婆羅門。聞釋迦佛身長丈六。常懷疑惑。未之信也。乃以丈六竹杖。欲量佛身。恆於杖端出過丈六。如是增高。莫能窮實。遂投杖而去。因植根焉。三際。猶言三世也。頌疏。一前際。卽是過去。二後際。卽是未來。三中際。謂現在世。經稱東西南北東南西南東北西北上下。爲十方。圓覺經。法界性究竟圓滿徧十方。涅槃之真理。無生滅。故云無生。圓覺經。一切衆生。於無生中。妄見生滅。是故說名輪轉生死。最勝王經。無生是實。生是虛妄。愚癡。

之人漂溺生死。如來體實。無有虛妄。名爲涅槃。⑨因緣梵名尼陀那。因此而生。彼謂之因。如因種子而生果是也。此物緣彼物而成。謂之緣。如瓶緣泥而成是也。楞伽經一切法因緣生。⑩世者遷流之義。寶積經三世所謂過去未來現在云何。過去世若法生已滅。是名過去世。云何未來世。若法未生未起。是名未來世。云何現在世。若法已生未滅。是名現在世。⑪三覺一本覺。一切衆生本有自性。同於如來平等法身。二始覺。自始發菩提心。至菩薩地。皆名始覺。三究竟覺。卽成佛。又自覺。覺他。覺滿。稱三覺。⑫五乘一人乘。乘五戒之行法。而生於人間者。二天乘。乘十善之行法。而生於天上者。三聲聞乘。乘四諦之行法。而到阿羅漢果者。四緣覺乘。乘十二因緣之行法。而到辟支佛果者。五菩薩乘。乘六度之行法。而成佛果者。⑬三乘一聲聞乘。二緣覺乘。三菩薩乘。四教儀集註。三乘。乘以運載爲義。聲聞以四諦爲乘。緣覺以十二因緣爲乘。菩薩以六度爲乘。運出三界。歸於涅槃。⑭寶珍貴也。觀無量壽佛經。恭敬三寶。奉事師長。寶性論。舉所以名寶者。有六義。偈云。眞寶世希有。明淨及勢力。能莊嚴世間。最上不變等。⑮法無生滅變遷。謂之常住。世間一切皆有生滅變遷。惟三寶常住不變。⑯大乘章義。歸投依伏。故曰歸依。歸投之相。如

子歸父。依伏之義。如民依王。如怯依勇。 梵語三菩提。此譯正覺。如來之實智。名爲正覺。悟證一切諸法之真正覺智也。故成佛曰成正覺。

佛教人 知因果 種善因 得福果 種惡因 則得禍

因果報 三世該 或現在 或未來 有遲速 無可逃

因善惡 有輪迴<sup>二</sup> 天人神 三善道 畜鬼獄 三惡道

此六道 由心造<sup>三</sup>

大乘法止觀。招果爲因。剋獲爲果。 因果經。欲知過去因者。觀其現在果。欲知未來果者。觀其現在因。 涅槃經。善惡之報。如影隨形。三世因果。循環不失。此生空過後。悔無追。 衆生旋轉於六道生死。如車輪之轉。而無窮也。謂之輪迴。 法華經。以諸欲因緣。墜三惡道。輪迴六趣中。備受諸苦毒。 心地觀經。有情輪迴生六道。猶

如車輪無始終。◎華嚴經。應觀法界性。一切唯心造。蕩益大師靈峯宗論。十界聖凡雖別。究竟皆唯心造。一念與上品十惡相應。則法界舉體而爲地獄。一念與中品十惡相應。法界舉體爲畜生。一念與下品十惡相應。法界舉體爲餓鬼。一念與上品十善相應。法界舉體爲修羅。一念與中品十善相應。法界舉體爲人道。一念與上品十善相應。法界舉體爲天道。六道輪迴之因果。詳見楞嚴經及地藏菩薩本願經。賢愚因緣經。讀周安士先生全書及丁仲祐居士六道輪回錄。最易起人信心。

佛所戒 首五事 不殺仁 不盜義 不淫禮 不妄信

不飲酒 斯爲智 修五戒 人道全 破五戒 三途緣

修十善 則生天 回淨土 脫塵凡 身三惡 殺盜淫

意三惡 癡貪瞋 若妄言 若綺語 若兩舌 若惡口

此四惡 口業成 十惡止 十善行

●戒制止也。四教儀。人道在因之時。行五常五戒。五常者。仁。義。禮。智。信。五戒者。不殺。不盜。不邪淫。不妄語。不飲酒。四教儀集註。常者不易。戒乃防非。仁則不殺。義則不盜。禮則不淫。信則不妄語。智則不飲酒。酒能昏性。起過故也。●地獄。餓鬼。畜生。是爲三途。●業報差別經。具修增上十善。得生欲界散地天。若修有漏十善。以定相應。生色界天。若離色修。遠離身口。以定相應。生無色界。●回。回向也。淨土佛聖所居。無六道輪回。五濁雜穢。修五戒十善。回向求生西方阿彌陀佛極樂世界。則能脫輪回。生淨土。爲末世修行之第一法門。印光法師文鈔。最詳言之。●四十二章經。佛言。衆生以十事爲善。亦以十事爲惡。何等爲十。身三口四。意三。身三者。殺。盜。淫。口四者。兩舌。惡口。妄言。綺語。意三者。嫉。恚。癡。如是十事。不順聖道。名十惡行。是惡若止。名十善行耳。梵網經合註。殺者慈悲之敵。不與而取他物爲盜。淫者污穢。交遺鄙陋。堪恥。名非梵行。亦名爲不淨行。虛而不實。欺凡罔聖。蠱惑人心。名爲妄言。有大小之別。小如見言不見。不見言見之類。其過尙小。大卽未得謂得。未證謂證。其罪

極重。以其能壞亂佛法。疑悞衆生。故也。綺語。謂一切華靡浮辭。無義無利者。兩舌。謂向此說彼。向彼說此。互相離間。令成乖謬。惡口。謂粗重罵詈。忿怒呪詛。令他不堪。

生六道 皆凡夫 生淨土 稱聖徒 輪回苦 畢竟無

佛菩薩 聖中尊 次緣覺 次聲聞 此四聖 合六凡

十法界 性一般 修德殊 位差別 惟佛陀 淨三業

■菩薩梵語菩提薩埵。大乘章義。菩薩梵語。此方翻爲道衆生。具修自利利他之道。名道衆生。法華經嘉祥疏。菩提云道。是無上正徧知果道也。薩埵言衆生。爲求果道。故名道衆生也。■大乘章義。言緣覺者。外國正音。名辟支佛。此翻辟支名曰因緣。佛名爲覺。緣覺名義。解有兩種。一約所觀法門以釋。緣者。是其十二緣法。始從無明。乃至老死。觀斯悟解。從緣得覺。故號緣覺。二就得道因緣以釋。如辟支佛得道。因緣經中廣說。如拂迦沙。見風動樹。而得悟道。如是等皆藉現事緣。而得覺悟。曰緣



覺。●聲聞。梵語舍羅婆迦。爲佛之小乘法中弟子。聞佛之聲教。悟四諦之理。斷見思之惑。而入於涅槃者也。●十法界。以依淨染善惡之法不同。而別爲十界也。華嚴經偈。心佛及衆生。是三無差別。涅槃經。一切衆生。皆有佛性。●三業。卽身口意三業也。三業清淨。惟佛一人。菩薩尙勤懺悔。何況凡夫。梁武帝慈悲道場懺法。唐悟達國師慈悲三昧水懺。皆懺罪之法寶。如暗得炬。如垢得浴。欲淨三業。當勤懺悔。

眼耳鼻 舌身意 內六根 須自治 色聲香 味觸法

外六塵<sup>二</sup> 須解脫 根塵接 六識生<sup>三</sup> 眼識色 耳識聲

鼻舌身 與意識 隨物誘 多外營 第七識 名末那<sup>四</sup>

執我法 邪見多 阿梨耶<sup>五</sup> 第八識 此如田 藏種子

## 藏淨染 入生死 主人翁 卽他是

●由識藏中種子成熟而發生者曰根。眼爲視根。耳爲聽根。鼻爲嗅根。舌爲味根。身爲觸根。意爲念慮之根。●塵指外境而言。六塵與六根接。而人之種種嗜欲因之起。故亦謂之六賊。楞嚴經。眼耳鼻舌及與身心。六賊爲媒。自劫家寶。●識了別之義也。●末那其義爲染汙。謂執持我法二者。是爲一切衆生妄惑之根本。●阿黎耶者。譯曰藏識。含藏一切事物種子之義。是爲有漏無漏一切有爲法之根本。大日經疏。阿賴耶。義云含藏。正翻爲室。謂諸蘊於此中生。於此中滅。卽是諸蘊巢窟。故以爲名。唯識之學。唐玄奘法師入天竺。受學於戒賢菩薩。爲中國初祖。著成唯識論。阿黎耶識。人生則先來。死則後去。故曰去後來先作主公。八識偈云。八箇兄弟一箇癡。其中一箇最伶俐。五箇門前做買賣。一箇家中作主依。癡謂第七識。伶俐謂第六意識。做買賣謂眼耳鼻舌身五識。作主依謂第八識也。蓋諸識皆依阿黎耶而幻現。又第九識名菴摩羅識。卽第八識中之白淨分子也。唐大圓居士有唯識易簡。最便初學。

染爲識 淨爲智 能轉識<sup>一</sup> 卽成智 轉五識 成所作

轉意識 妙觀察 轉末那 平等性 轉梨耶 大圓鏡

此四智 成慧命<sup>二</sup> 怒轉喜 同一心 罵轉讚 同一口

識轉智 猶反手

●轉識成智者。轉有漏之八識。而得與無漏之八識相應之四智也。顯教轉八識而成就四智。以立爲究竟之報身如來。一大圓鏡智。顯現法界之萬象。如大圓鏡之智也。二平等性智。成諸法平等之智也。三妙觀察智。分別好妙諸法。而觀察衆機。說法斷疑之智也。四成所作智。成就自利利他妙業之智也。密教有法界體性智。爲五智。卽轉第九菴摩羅識所成之智也。●慧命者。法身以智慧爲壽命也。勝鬘寶窟。慧命者。以廣大甚深之慧爲命。故名慧命也。

一 以智眼 二 觀五陰 三 色受想 四 與行識 五 一切法 六 因緣成

離爲滅 合爲生 如地水 與火風 此四大 合爲形

光與質 合爲影 當體空 無自性 所執著 皆假名

六 空假合 中觀成 是三觀 義至精 七 止觀法 如是行

●智能見事物故名眼。智卽眼也。又智之眼也。謂非肉眼也。華嚴經善知識者。則是趣向一切智眼。●五陰亦曰五蘊。蘊者積聚之義。陰者陰覆之義。色謂形相。受謂嗜欲。想謂意念。行謂遷流。識謂心靈。蓋一切衆生皆依此五者而成。心經照見五蘊皆空。度一切苦厄。增一阿含經。色如聚沫。受如浮泡。想如野馬。行如芭蕉。識如幻法。●楞嚴經。因緣和合。虛妄名生。因緣別離。虛妄名滅。●圓覺經。妄認四大爲自身相。又恆作是念。我今此身四大和合。所謂髮毛爪齒。皮肉筋骨。髓腦垢色。

皆歸於地。唾涕膿血。津液涎沫。痰淚精氣。大小便利。皆歸於水。煖氣歸火。動轉歸風。四大各離。今者妄身。當在何處。 ㊦當體空者。一切之有爲法。不必待分散壞滅。而後爲空。其當體色相。卽爲空無也。蓋因緣生之法。如夢如幻。無實性也。 ㊦空觀。觀諸法之真諦也。假觀。觀諸法之俗諦也。中觀。觀諸法非空非假。謂爲雙非之中觀。觀諸法亦空亦假。謂爲雙照之中觀。 龍樹中觀論。觀四諦品。因緣所生法。我說卽是空。亦爲是假名。亦是中道義。 ㊦止者。停止之義。止於理而不動也。又止息之義。止息。安念也。觀者。觀達之義。觀智通達。契合真如也。 大乘起信論。所謂止者。謂止一切境界。相隨順奢摩他觀義故。所言觀者。謂分別因緣生滅相。隨順毗鉢舍那觀義故。又若修止者。對治凡夫住著世間。能捨二乘法弱之見。若修觀者。對治二乘不起大悲。狹劣心過。遠離凡夫不修善根。以此義故。是止觀二門。共相助成。不相捨離。南嶽大師。有大乘止觀法門。滿益大師釋義。爲天台止觀學之祖。最近出版諦閑法師大乘止觀述記。尤詳。

心中念 鏡中影 念生滅 影無定 迷外緣 起惑病

感造業

業受報

三障<sup>二</sup>夢

何時醒

唯真如<sup>三</sup>

大圓鏡

影常動

鏡常靜

心不動<sup>四</sup>

念不靜

心無邊

念著境

念與心<sup>五</sup>

不相應

如是觀

知佛性

是佛性

本平等<sup>六</sup>

心與佛

及衆生

三無別<sup>七</sup>

無減增

因是修

佛得成

■圓覺經。妄認四大爲自身相。六塵緣影爲自心相。 ■三障。障正道。害淨心者。

涅槃經。一煩惱障。貪欲瞋恚愚癡等之惑。二業障。五逆十惡之業。三報障。地獄餓鬼畜生等之苦報。 ■真如。離染法而如明鏡。是云空如來藏。真如具一切淨法。如明

鏡之現萬象。謂之不空如來藏。大乘起信論詳說之。 ■易經繫辭傳。夫易無思也。

無爲也。寂然不動。感而遂通天下之故。易卽常住不動之真心也。 圓覺經。虛空如

是平等不動。當知覺性平等不動。 ■念。安心也。心真如也。衆生所有安心。分別計

執皆與真如不相應也。大乘起信論。當知真如自性。非有相。非無相。依一切衆生。以有妄心。念念分別。皆不相應。②無高下增減之別。曰平等。起信論義記。衆生真心。與諸佛體。平等無二。③心佛及衆生。是三無差別。華嚴經夜摩天宮品之偈。文也。天台謂之三妙法。大乘起信論。真如實體相者。一切凡夫聲聞緣覺菩薩諸佛。無有增減。蕩益大師靈峯宗論。現前一念心性。本自豎窮橫徧。衆生迷之。舉體爲苦集。而此心不滅。諸佛悟之。舉體爲道滅。而此心不增。

佛方便

有多門

禪教律

三大宗

理事具

顯密通

禪一心

教多聞

律萬行

不可分

分則偏

合則融

最優異

淨土宗

專念佛

證圓通

觀相好

心色融

持名號

攝三根

阿彌陀

大願船

四十八

誓願堅

<sup>十三</sup>臨命終

憶念專

蒙接引

生寶蓮

<sup>十四</sup>分九品

攝愚賢

<sup>十五</sup>等四生

無擇焉

<sup>十六</sup>極樂國

<sup>十七</sup>不退轉

<sup>十八</sup>無衆苦

<sup>十九</sup>無惡緣

衣與食

皆自然

<sup>二十</sup>光與壽

皆無邊

<sup>二十一</sup>寶徧地

花徧天

<sup>二十二</sup>鳥說法

如佛言

<sup>二十三</sup>樹妙音

如管絃

<sup>二十四</sup>諸善人

會一處

何法門

不開悟

祇一生

<sup>二十五</sup>補佛位

生西方

眞大利

<sup>二十六</sup>佛護念

不思議

願修持

<sup>二十七</sup>徧含識

<sup>二十八</sup>有眞信

有篤行

有切願

定往生

<sup>二十九</sup>往生集

<sup>三十</sup>聖賢錄

生西方

踵相續



方便多門。謂隨方便。以爲入道之門也。圓覺經。譬如大城。外有四門。隨方來者。非止一路。一切菩薩。莊嚴佛國。及成菩提。非一方便。法華義疏。方便是善巧之名。善巧者。智之用也。禪宗。以禪那爲宗。故名禪那。譯爲靜慮。乃佛之心印。釋尊。在靈山會上拈花。迦葉破顏微笑。遂傳衣爲第一祖。二十八傳。至達摩。爲東土初祖。梁時泛海。達廣州。止嵩山少林寺。傳之慧可。爲二祖。僧璨。爲三祖。道信。爲四祖。宏忍。爲五祖。慧能。爲六祖。皆以衣相傳。此宗直指人心。見性成佛。不立文字。爲頓門。又名心宗。六祖後。又有臨濟。曹洞。沩仰。雲門。法眼。五家。教。謂經教之相。一天台宗之教。相。判立化儀四教。與化法四教。化法之四教者。一三藏教。經律論之三藏。部類判然。說因緣生滅之四諦。正教聲聞緣覺之二乘。傍化菩薩者。二通教。說卽空無生之四真諦。使通三乘而同學者。但以菩薩爲正機。二乘爲傍機。三別教。於二乘之人皆不同。別對菩薩說大乘無量之法者。四圓教。對最上利根之菩薩。說事理圓融之中道實相者。以上四教。爲化益衆生之法門。故名化法。化儀之四教者。以彼化法。說示衆生之儀式作法也。一頓教。對頓大之機。頓說別教圓教之大法者。如華嚴時是也。二漸教。對漸機。漸漸次第說化法之四教。如鹿苑。方等。般若。三時之說相是也。三祕

密教對一種之機說祕密之法。使一會之人。自他互不知者。是由如來身口意之不思議力。四不定教於一會之中。說一法。使聞者異解。或得益。或不得益者。蓋化法之四教如藥味。化儀之四教如藥方。合成八教也。二華嚴宗之判教也。一始於杜順。成於賢首。就出世間之一教判定之。一小乘教。二大乘始教。三大乘終教。四頓教。五圓教也。二爲圭峯所立。統收世間出世間之二教。一人天教。二小乘教。三大乘法相教。四大乘破相教。五一乘顯性教也。四律。謂戒律爲三藏三學之一。通於諸宗。而唐南山道宣律師。特依五部律中之四分律。弘通戒律。故稱之曰南山宗。卽四分律宗也。四分之名。初分爲比丘戒。二分爲比丘尼戒。三分四分爲諸犍度等。犍度。此云法聚。卽篇品之名也。理。事。道理與事相也。入道多門。不過理事。理。謂道理。通於聖心事。謂事相。約於凡情。顯。卽顯教。密。卽密教。天台華嚴禪淨土諸宗。屬顯教。眞言宗。屬密教。眞言爲大日如來。卽毘盧遮那佛。自證之法門。雖十地等覺菩薩。在因位者。皆不能測知。故曰密教。二教論。夫佛有三身教。則二種。應化開說。名曰顯教。言顯略逗機。法佛談話。謂之密教。言祕密實說。密宗根本教典。不外大日經。與金剛頂經。中國自唐以後漸衰。而盛行於日本。沙門道殿。有顯密圓通二卷。斥顯密相

攻之謬。靈峯宗論。禪教律三同條共貫。禪者佛心。教者佛語。律者佛行。世安有心而無語。無行有語而無行。無心者乎。淨土宗專主念佛。求生阿彌陀佛。極樂國土。晉慧遠始倡修淨土法門。住廬山結蓮社。得一百二十三人。同願往生。極樂國土。自後唐之善導。承遠。法照。少康。宋之永明。省常。明之蓮池。蕩益。清之省庵。徹悟。皆教人專修此道。稱蓮宗十一祖。蕩益大師云。淨土念佛法門。圓收一切禪教律。圓超一切禪教律。至圓至頓之最妙法門也。永明大師四料簡云。有禪有淨土。猶如戴角虎。現世爲人師。來生作佛祖。無禪有淨土。萬修萬人去。但得見彌陀。何愁不開悟。有禪無淨土。十人九蹉路。陰境若現前。瞥爾隨他去。無禪無淨土。鐵牀并銅柱。萬劫與千生。沒箇人依怙。印光法師云。淨土法門。至圓至頓。最妙最立。下手易而成功。高用力少而得效速。普被三根。統攝諸法。九界衆生。離此法。上不能圓成佛道。十方諸佛。捨此法。下不能普利羣生。念佛有三種。一稱佛名號。二觀佛相好。三觀佛法身。非有非空中道實相之理也。楞嚴經大勢至菩薩章。我本因地。以念佛心。入無生忍。又佛問圓通。我無選擇。都攝六根。淨念相繼。得三摩地。斯爲第一。觀無量壽佛經。諸佛如來。入一切衆生心想中。是故爾等。心想佛時。是心卽是三十二相八十隨。

形好。陽復子曰：觀無量壽佛經爲教觀佛相好之專經。有唐善導四帖疏：阿彌陀經爲教持佛名號之專經。有蓮池疏鈔：蕩益要解：皆極精末世衆生情想飛蕩。心境細觀法難成。惟持名一門以名昭德。心佛一如。乘佛願船。易登彼岸。且行住坐臥。都無所礙。上中下根無不能之。故攝機最廣也。阿彌陀佛號也。梵語阿耨也。彌陀者量也。或翻無量壽佛。或翻無量光佛。或翻無量清淨佛。大願船佛之本願。譬如船也。往生要集：阿彌陀佛與觀世音大勢至乘大願船。泛生死海。就此娑婆世界。呼喚衆生。令乘大願船。送著西方。若衆生有上大願船者。並皆得去。此是易往也。四十八願：阿彌陀如來以國王出家爲法藏比丘時。在世自在王佛所建立之誓願也。無量壽經詳說之。大阿彌陀經所載語更明顯。第一願：我作佛時。刹中無地獄餓鬼禽畜及蜎飛蠕動之類。第二願：刹中無婦女。無央數世界諸天人。民以至蜎飛蠕動。來生我刹者。皆於七寶池蓮華中生。第三願：我刹中人欲食之時。七寶鉢中百味飲食。化現在前。食已器用自然化去。第四願：我刹中人所欲衣服。隨念卽至。不假裁縫。擣染浣濯。第五願：我刹中自地以上。皆有宅宇宮殿樓閣。池流華樹。悉以無量雜寶百千種香。而共合成。其香普薰十方世界。衆

生聞是香者。皆修佛行。○第六願 我刹中人。皆心相愛敬。無相憎嫉。○第七願 我刹中人。無淫佚瞋怒愚癡之心。○第八願 我刹中人。皆同一善心。無惑他念。其所欲言。皆預相知意。○第九願 我刹中人。不聞不善之名。况有其實。○第十願 刹中人。知身如幻。無貪著心。○第十一願 刹中雖有天人之異。而其形容。皆一類金色。面目端正淨好。○第十二願 我作佛時。假令無央數世界諸天人民。盡爲緣覺聲聞。不能知我之年壽。當若干萬億劫。○第十三願 假令十方各千億世界諸天人民。皆爲緣覺聲聞。一心共計。亦莫知我刹中天人之數。○第十四願 我刹中人民。壽命皆無央劫。莫知其數。○第十五願 我刹中人。所受快樂。一如漏盡比丘。○第十六願 我刹中人。住正信位。離顛倒想。遠離分別。諸根寂靜。所止盡般泥洹。○第十七願 我作佛時。說經行道。十倍於諸佛。○第十八願 刹中人。盡通宿命。知百千億那由他劫事。○第十九願 刹中人。盡得天眼。見百千億那由他世界。○第二十願 刹中人。盡得天耳。聞百千億那由他諸佛說法。悉能受持。○第二十一願 刹中人。得他心智。知百千億那由他世界衆生心念。○第二十二願 刹中人。盡得神足。於一念頃。能超過百千億那由他世界。○第二十三願 我作佛時。名聞

十方無數世界諸佛稱我功德及國土之勝。諸天人民乃至蜎飛蠕動聞我名號。慈心喜悅者皆令來生我刹。○第二十四願 頂中光明絕妙勝於日月百千萬倍。○第二十五願 我作佛時光明照無數天下。諸天人民乃至異類見我光明皆慈心作善來生我國。○第二十六願 衆生蒙我光明觸其身者過諸天人。○第二十七願 十方諸天人民有發菩提心奉持齋戒行六波羅欲生我刹我現其前引爲不退菩薩。○第二十八願 十方世界天人聞我名號燒香散華飯食沙門起立塔寺齋戒清淨一心繫念於我。雖止一晝夜不絕亦必生我刹。○第二十九願 十方世界諸天人民至心信樂欲生我刹十聲念我名號必遂來生。惟除五逆誹謗正法。○第三十願 十方世界衆生前世作惡聞我名號卽懺悔爲善奉持經戒壽終不經三惡道得生我刹。○第三十一願 十方天人聞我名號五體投地喜悅信樂修菩薩行常爲諸天世人之所敬。○第三十二願 十方無央數世界女人聞我名號喜悅信樂發菩提心厭惡女身壽終之後不復爲女。○第三十三願 生我刹菩薩一生將補佛處若其本願欲往他方攝化衆生我以神力助其修種種行願。○第三十四願 刹中人欲生他方者如其願不墮惡道。○第三十五願 刹中菩薩以香華

旛蓋眞珠瓔珞種種供具。往無量世界。供養諸佛。一食之頃。即可徧至。○第三十六願。刹中菩薩。欲以萬種供具。供養十方無央數佛。供養衆具。自然在前。○第三十七願。刹中菩薩。受持經法。必得辯才智慧。○第三十八願。刹中菩薩。辯才智慧。不可限量。○第三十九願。刹中菩薩。得金剛那羅延力。身皆紫磨金色。具三十二相八十種好。○第四十願。我刹清淨。照見十方無量世界。菩薩欲於寶樹中。見十方一切佛刹。卽時應現。○第四十一願。刹中菩薩。雖少功德者。皆知見道場樹。○第四十二願。刹中一切萬物。皆嚴淨光麗。形色殊特。雖得天眼。不能辨其名數。○第四十三願。刹中欲得聞法。隨其志願。自然得聞。○第四十四願。刹中菩薩。聲聞頂中。皆有光明。說經行道。無異於佛。○第四十五願。他方菩薩。聞我名號。皈依精進。皆得清淨解脫三昧。供養不可思議諸佛。○第四十六願。他方菩薩。皈依精進。皆得普等三昧。○第四十七願。他方菩薩。皈依精進。卽得不退轉地。○第四十八願。他方菩薩。聞我名號。皈依精進。卽得至第一忍。第二忍。第三忍。於諸佛法。永不退轉。○阿彌陀經。若有善男子。善女人。聞說阿彌陀佛。執持名號。若一日。若二日。若三日。若四日。若五日。若六日。若七日。一心不亂。其人臨命終時。阿彌陀佛。與諸

聖衆。現在其前。是人終時。心不顛倒。卽得往生阿彌陀佛極樂國土。臨命終時。孝子仁人。當助念佛號。令行者一心不亂。卽得往生。切忌哭泣擾動。令心顛倒。印光法師文鈔。屢屢言之。 ④九品者。生淨土人。分上三品。中三品。下三品也。詳見觀無量壽佛經。上品上生。中生。下生。乃至下品上生。中生。下生。爲九品。又名三輩。楊仁山觀經略論。此經圓頓之中。普攝權漸。其作九品觀者。卽攝九界種性。入一佛法界也。上三品。攝菩薩種性。中品上生。中品中生。攝緣覺聲聞種性。中品下生。攝人天種性。下品上生。攝修羅。畜生。餓鬼種性。下品中生。攝有閒地獄種性。下品下生。攝無閒地獄種性。 ⑤四生。一胎生。二卵生。三溼生。四化生。十二因緣經。有四種生。一腹生者。謂人及畜生。卽胎生也。二寒熱和合生者。謂蟲。蛾。蚤。蝨。卽溼生也。三化生者。謂天及地獄。四卵生者。謂飛鳥。魚。鼈。 ⑥阿彌陀經。彼土何故名爲極樂。其國衆生。無有衆苦。但受諸樂。故名極樂。 ⑦不退轉者。於所修之功德。善根愈增進。更不退失。轉變也。省名不退。梵語阿鞞跋致。阿彌陀經。極樂國土衆生。生者。皆是阿鞞跋致。 ⑧衆苦。心身所觸之諸苦也。阿彌陀經。通贊蓮華化生。無其生苦。四序不能遷。故無老苦。非分段。無病苦。壽命無盡。無死苦。無父母親疏。故無怨憎會苦。所欲如



意無求不得苦。顏貌端嚴。無諸根缺陋之苦。四時一等。故無寒暑等苦。 惡緣乃誘我爲惡之外界事物。西方要訣。六惡緣伴。阻壞淨心。 阿彌陀經。舍利弗。彼佛光明無量。照十方國。無所障礙。是故號爲阿彌陀。又舍利弗。彼佛壽命及其人民無量無邊阿僧祇劫。故名阿彌陀。 觀無量壽佛經。瑠璃地上。以黃金繩。雜廁間錯。以七寶界。分齊分明。 瑞相經。其佛國土。自然七寶合成。其地不可限量。殊特妙好。逾諸十方一切世界。 阿彌陀經。晝夜六時。雨天曼陀羅華。 阿彌陀經。彼國常有種種奇妙雜色之鳥。白鶴。孔雀。鸚鵡。舍利。迦陵頻伽。共命之鳥。是諸衆鳥。晝夜六時。出和雅音。其音演暢。五根。五力。七菩提分。八聖道分。如是等法。其土衆生。聞是音已。皆悉念佛念法念僧。 阿彌陀經。彼佛國土。微風吹動。諸寶行樹。及寶羅網。出微妙音。譬如百千種樂。同時俱作。聞是音者。自然皆生念佛念法念僧之心。 阿彌陀經。衆生聞者。應當發願。願生彼國。所以者何。得與如是諸上善人。俱會一處。 阿彌陀經。其中多有一生補處。其數甚多。○言一生補處者。生西方後。精進不退。直至成佛。補佛處位也。 護念者。念佛人。佛力保護。令之安隱。佛心憶念。令之精進也。 阿彌陀經。汝等衆生。當信是稱讚不可思議功德。一切諸佛所護念經。又

聞是經受持者。及聞諸佛名者。是諸善男子善女人。皆爲一切諸佛之所護念。不思議者。事甚希有。理甚微妙。不可以心思。不可以言議。故曰不可思議。○含識卽衆生。亦稱含靈。以一切衆生皆有佛性。鸚鵡八哥之鳥。尙能念佛往生。詳見王龍舒淨土文。○楞嚴經大勢至念佛圓通章疏。又淨業人備三資糧。一者信。信輪回最苦。信念佛最妙。信此土修行難成道果。信願生彼土。乃至十念。決得往生。信報生人天。福盡還墜。信一生樂土。永不退轉。當成正覺。信一稱佛名。能滅八十億劫生死重罪。信念佛之人。彌陀攝取。病中救護。命終來迎。二者願。願消業障。願滅衆苦。願心明。願見佛。願淨業成。願生安養。願授記。願度生。三者行。身禮像。口稱名。心觀想。俱要專一。○明雲棲蓮池大師雲棲法彙中有往生集。略錄古來往生人事迹。加以論讚。○清彭二林居士取佛菩薩立法度生之因緣。與歷代古德僧尼王臣士女。下及物類。念佛往生之事迹。兼錄其宏揚淨土之切要言句。以成一帙。名淨土聖賢錄。

教聲聞 說小乘 是權說 如化城 四聖諦 十二緣

離苦海

息塵緣

但自度<sup>六</sup>

不度生

以是義

稱小乘

●乘者運載之義。使人乘之。至其悟岸之教。小乘對於大乘之稱。以四諦爲至阿羅漢果。以十二因緣爲至辟支佛果之教體。亦謂之二乘。爲佛隨他意之說法。姑以調熟下劣根性者也。●權者對於實之稱。善巧方便之門。●化城。詳法華經化城喻品。經云。但是如來方便之力。於一佛乘。分別說三。如彼導師。爲止息故。化作大城。既知息已。而告之言。寶處在近。此城非實。我化作耳。●四聖諦。又云四真諦。聖者所見之真理也。一苦諦。三界六趣之苦報也。是爲迷之果。二集諦。貪瞋癡等煩惱。及善惡之諸業也。此二者能集起三界六趣之苦報。故名集諦。三滅諦。涅槃也。涅槃滅惑業。而離生死之苦。真空寂滅。故名滅。是爲悟之果。四道諦。八正道也。此能通於涅槃。故名道。是爲悟之因。其中前二者。流轉之因果也。故又曰世間因果。後二者。還滅之因果也。故又曰出世間因果。此四者皆云諦者。言其真理實爲至極也。而二者皆先果後因者。果易見。因難知。故先示苦果。令其厭。然後使斷其因。又舉涅槃之妙果。使樂之。然後使修其道。是乃誘引最劣小機之善巧也。佛起菩提樹下。至鹿野苑。爲

五比丘始說此法。是爲佛轉法輪之初。依之而修道證滅者。稱爲聲聞人。四十二章經。於鹿野苑中。轉四諦法輪。度憍陳如等五人。而證道果。涅槃經。我昔與汝等。不見四真諦。是故久流轉生死大苦海。若能見四諦。則得斷生死。十二因緣。爲辟支佛之觀門。說衆生涉三世。而輪迴六道之次第緣起也。一無明。過去世無始之煩惱也。二行。依過去世之煩惱。而作之善惡行業也。三識。依過去世之業。而受現世受胎之一念也。四名色。在胎中心身漸發育之位也。五六入。爲六根具足。將出胎之位也。六觸。二三歲間。對於事物。未識別苦樂。但欲觸欲之位也。七受。六七歲以後。漸對事物。識別苦樂。而感受之位也。八愛。十四五歲以後。生種種強盛愛欲之位也。九取。成人以後。愛欲愈盛。馳驅諸境。取求所欲之位也。十有依。愛取之煩惱。作種種之業。定將來之果之位也。十一生。卽依現在之業。於未來受生之位也。十二老死。於未來世老死之位也。上遡之。則過去之惑業。更從過去之苦果而來。下趁之。則未來之苦果。更生未來之惑業。過去無始。未來無終。此爲無始無終之生死輪迴。辟支佛觀之一。以厭生死。一以知無常。遂斷惑業。而證涅槃也。自度。二乘自利之學也。小乘之果。雖能出三界。斷生死。自得度脫。然不知一切衆生。皆是自心之所顯現。

不度衆生卽是自覺未  
圓故當進修大乘也。

教菩薩 大乘經 發大心 度衆生 盡十方 無不徧

盡永劫 無時停 文殊智 普賢行 以是義 稱大乘

若華嚴<sup>四</sup> 最圓融 若佛頂<sup>五</sup> 最微密 若法華<sup>六</sup> 若涅槃

開權小 顯眞實 若圓覺<sup>七</sup> 若金剛<sup>八</sup> 稱頓教<sup>九</sup> 談了義<sup>十</sup>

此六經<sup>十一</sup> 必須習 餘諸經 隨願力 或循環 或專一

必敬恭 必至誠 能讀誦 兼解行 修淨土 上品生

## 於佛道 速得成

●大乘經教菩薩成佛道之一切經典也。佛鑑大小之根機而說大小之二教。對於小機說聲聞緣覺之法。謂爲小乘。對於大機說六度之法。謂爲大乘。就現流通之經典言之。則四部之阿含經等爲小乘經。華嚴般若等爲大乘經。●大心卽大乘心也。維摩經佛國品。大乘心是菩薩淨土。衆生梵語薩埵。新譯曰有情。舊譯曰衆生。衆生有多義。一衆人共生之義。○法華文句。中阿含十二云。劫初光音天下。生世間。無男女尊卑。衆共生世。故言衆生。此據最初也。二衆多之法。假合而生。故名衆生。○大乘章義。依於五陰和合而生。故名衆生。○法華文句。若攬衆陰而有。假名衆生。此據一期受報也。三經衆多之生死。故名衆生。不曰衆死者。以有生者必有死。有死者必有生。故也。○般若燈論。有情者。數數生。故名衆生。○大乘章義。多生相續。名曰衆生。○法華文句。若言處處受生。故名衆生者。此據業力五道流轉也。華嚴經普賢行願品。譬如曠野沙磧之中。有大樹王。若根得水。枝葉華果。悉皆繁茂。生死曠野。菩提樹王。亦復如是。一切衆生。而爲樹根。諸佛菩薩。而爲華果。以大悲水。饒益衆生。

則能成就諸佛菩薩智慧華果。■文殊文殊師利也。譯云妙德。又曰妙吉祥。此菩薩與普賢菩薩常侍釋迦如來。小乘比丘以舍利弗爲智慧第一。大乘菩薩以文殊爲智慧第一。故有佛母之稱也。普賢表行門。文殊表智海。故以爲釋迦如來之二大士。文殊駕師子侍佛之左方。普賢乘白象侍佛之右方。此表智行相應合之者。卽毘盧遮那法身佛也。陽復子曰。華嚴經有文殊淨行品。普賢行願品。修大乘人皆當受持。彭際清有華嚴念佛三昧論。勸修淨土人兼持華嚴經。求上品生。■華嚴大方廣佛華嚴經也。華嚴策略大方廣者。所證法也。佛華嚴者。能證人也。大以體性包容。方廣乃業用周徧。佛謂果圓覺滿。華喻萬行披敷。嚴乃飾法成人。經乃貫穿常法。華嚴經佛像法中。龍樹菩薩入龍宮中。誦憶傳出之略本。其廣本非閻浮提人心力所能持。自晉至唐。經四譯。凡八十卷。文尙未全。然義自圓徧。■佛頂大佛頂如來密因修證了義諸菩薩萬行首楞嚴經也。唐般刺密帝譯十卷。闡明心性之本體。文義皆妙。屬大乘祕密部。無法不備。無機不攝。學佛之要門也。經中大勢至菩薩念佛圓通章。尤爲淨土最精之義。■法華妙法蓮華經也。佛初以權教小乘。引導劣機。至法華會。乃開顯一切佛法。皆是成佛之法。十方三世。祇有一乘法也。經中

觀世音普門品。教念觀世音菩薩名號。於怖畏急難之中。能施無畏。尤當廣勸誦持。涅槃大涅槃經也。釋迦佛於拘尸那城。入涅槃前說之。佛初說無常。至是說常。初教觀苦。至是說樂。初說無我。至是說我。初教觀不淨。至是說淨。亦是開權顯實。圓覺大方廣圓覺修多羅了義經一卷。唐佛陀多羅譯。佛入神通大光明藏三昧。現諸淨土。文殊普賢等十二大士。次第請問因地修證之法門。佛一一答之。因而一經有十二章。爲十二部經清淨眼目。金剛金剛般若波羅蜜經也。姚秦鳩摩羅什譯。佛在舍衛國。爲須菩提等說。令降伏妄心。住於不生不滅之金剛心也。頓教。凡歷劫修行。方出生死之法。名爲漸教。頓悟頓成。佛果之法。名爲頓教。圓覺經善男子。是經名爲頓教大乘。頓機衆生。從此開悟。了義對於不了義而言。顯了分明。說示究竟之實義。謂之了義。圓覺經得聞如是修多羅教了義法門。永斷疑悔。陽復子曰。此六大乘經。依印光法師文鈔所指示。學者欲擇閱諸經註疏。可檢楊仁山集佛學書目表。各按語閱之。

普賢尊

十願王

三世佛

所稱揚

導海衆

歸樂邦



## 修行人 持勿忘

■十願王。普賢之十大願王也。華嚴經普賢行願品。爾時普賢菩薩摩訶薩。稱歎如來勝功德已。告諸菩薩及善財言。善男子。如來功德。假使十方一切諸佛。經不可說不可說。佛刹微塵數劫。相續演說。不可窮盡。若欲成就此功德門。應修十種廣大行願。何等爲十一者。禮敬諸佛。二者稱讚如來。三者廣修供養。四者懺悔業障。五者隨喜功德。六者請轉法輪。七者請佛住世。八者常隨佛學。九者恆順衆生。十者普皆回向。■普賢行願品偈。三世諸佛所稱歎。如是最勝諸大願。■普賢行願品。又復是人。臨命終時。最後剎那。一切諸根。悉皆散壞。一切親屬。悉皆捨離。一切威勢。悉皆退失。如是一切。無復相隨。唯此願王。不相捨離。於一切時。引導其前。一剎那中。卽得往生阿彌陀佛極樂世界。陽復子曰。天台法裔諦閑法師。持誦普賢行願品。四十餘年。謂爲淨土正因。著有行願品輯要疏。蓋修淨土求上品生者。當讀誦大乘。大乘中。王無過華嚴。華嚴一經。歸宿在普賢行願品。以十大願王。導歸極樂。實爲成就無量光。無量壽。功德莊嚴之正因也。

一 馬鳴尊

佛懸詔

後佛生

說法要

二 起信論

何精妙

讚西方

進怯者

求大乘

生佛前

常見佛

無退緣

●馬鳴佛滅後六百年出世之大乘論師也。摩訶摩耶經。正法衰微。六百歲已。九十六種諸外道等。邪見競興。破滅佛法。有一比丘。名曰馬鳴。善說法要。降伏一切諸外道輩。言馬鳴者。謂此菩薩初生之時。感動諸馬悲鳴不已。故云馬鳴。●馬鳴大乘起信論。統攝一切大乘諸經意義。洵爲善說法要。其論有曰。衆生初學是法。欲求正信。其心怯弱。以住於此娑婆世界。自畏不能常值諸佛。親承供養。懼謂信心難可成就。意欲退者。當知如來有勝方便。攝護信心。若人專念西方極樂世界阿彌陀佛。所修善根。回向願求生彼世界。即得往生。常見佛故。終無有退。楊仁山居士謂唐法藏大師起信論義記。曲盡其妙。學者熟讀深思。自能通達三藏教海。又明眞界起信論纂註。簡明便初學。

既生西 得神通 十方刹 圓鏡中 天眼通 無不見

天耳通 無不聞 神足通 能徧至 宿命通 能徧窮

他心通 知衆念 漏盡通 垢染空

◎神爲不測之義。通爲無礙之義。不測無礙之力用。謂之神通。◎十方刹。卽十方佛土。每一佛土。中有三千大千世界。爲一佛之化土。每一小世界。當中有須彌山。四方以四寶合成。東金。西銀。南瑠璃。北水晶。出入海面。各八萬四千由旬。每一由旬。約四十里。外有七重香水海。七重金山。環之。此外有鹹海。海中東南西北。各一大洲。東勝神州。西牛貨洲。南瞻部洲。北俱盧洲。爲一四天下。今人所謂地球。尙非南洲全地也。鹹海四圍盡處。有鐵圍山。日月繞須彌山腰。自右而左。吾人居南洲。故見東出西入。行山南爲晝。行山北爲夜也。實則平旋非入地出地。肉眼見遠則低。見近則高。故誤認爲起落也。此爲一小世界略狀。如是一千小世界。爲小千世界。一千小千世界。

爲中千世界。一千中千世界。爲大千世界。三以千數乘之。故稱三千大千世界也。

③天眼通。天耳通。神足通。他心通。宿命通。見前四十八願之第十八。十九。二十。二十一。二十二。二十三。二十四。二十五。二十六。二十七。二十八。二十九。三十。三十一。三十二。三十三。三十四。三十五。三十六。三十七。三十八。三十九。四十。四十一。四十二。四十三。四十四。四十五。四十六。四十七。四十八。四十九。五十。五十一。五十二。五十三。五十四。五十五。五十六。五十七。五十八。五十九。六十。六十一。六十二。六十三。六十四。六十五。六十六。六十七。六十八。六十九。七十。七十一。七十二。七十三。七十四。七十五。七十六。七十七。七十八。七十九。八十。八十一。八十二。八十三。八十四。八十五。八十六。八十七。八十八。八十九。九十。九十一。九十二。九十三。九十四。九十五。九十六。九十七。九十八。九十九。一百。

④垢染。以染身之垢。喻煩惱之心也。無量壽經。塵勞垢習。自然不起。

得六通 證三身 等法界 稱法身 具相好 稱報身

隨類現 稱應身 如淨月 應萬川 本一月 影萬千

法身。報身。應身。爲三身。本性具足者。曰法身。修行成就者。曰報身。應機化現者。曰應身。金光明經。佛眞法身。猶如虛空。應物現形。如水中月。華嚴經兜率宮中偈讚。品。譬如淨滿月。普現一切水。影像雖無量。本月未曾二。

度自他 唯六度 捨慳貪 布施度 離穢惡 持戒度

息瞋恚 忍辱度 策懈怠 精進度 止散亂 禪定度

破愚癡 智慧度 菩薩行 此六具

六度卽六波羅蜜也。波羅蜜者。到彼岸之意也。一曰檀那。譯言布施。財施。無畏施。法施之大行也。是爲捨波羅蜜。二曰尸羅。譯言止惡得善。在家出家。小乘大乘之一切戒行也。是爲戒波羅蜜。三曰羼提。譯言忍辱。忍受一切有情罵辱擊打等。及非情寒熱饑渴等之大行也。是爲忍波羅蜜。四曰毗黎耶。譯言精進。精勵身心。進修前後之五波羅蜜也。五曰禪那。譯言靜思維。又譯爲定思維。眞理定止散亂之心之要法也。是爲定波羅蜜。六曰般若。譯言智慧。通達諸法之智。及斷惑證理之慧也。是爲智波羅蜜。菩薩修此六法。究竟自利利他之大行。到涅槃之彼岸。故稱爲六波羅蜜。見法界次第下之上。

慈與樂 悲拔苦 喜攝受 捨待化 四無量 成佛陀

慈悲喜捨四無量心也。慈無量心。無緣大慈。普能與樂之心也。悲無量心。同體大悲。普能拔苦之心也。喜無量心。見衆生離苦得樂。生慶悅之心也。捨無量心。如上三心。捨之而心不存著也。又怨親平等。捨怨捨親也。又待時受化曰捨。見尼乾子受記經。此四心。普緣無量衆生。引無量之福。故名無量心。

佛示現 八相同 初說法 兜率宮 教諸天 護法門

次入胎 次住胎 示有生 與人同 七寶殿 母腹中

諸天人 來獻供 諸菩薩 來雲從 次出胎 住王宮

示處欲 離塵昏 次出家 次成道 示捨欲 能成佛

次受請 轉法輪 度衆生 利無窮 次圓寂 入涅槃

四  
令悲仰

遭佛難

實不滅

住世間

示現者。本是圓佛。應機垂形。八相成道。化導世間。故云示現也。兜率。翻知足。此天有內院外院。補處菩薩。居內院而說法也。在六欲天之中天。以佛常居中道。故八相經。佛陀示現。由始至終。一期之相狀。謂之八相成道。大乘起信論所說者。一降兜率。先住於兜率天。在彼天四千歲。見時機熟。遂乘白象。由彼天降下之相也。二入胎。乘白象。由摩耶夫人左脇入胎之相也。三住胎。在母胎行住坐臥。一日六時。爲諸天說法之相也。四出胎。四月八日。於藍毘尼園。由摩耶右脇出生之相也。五出家。十九歲。觀世之無常。出王宮。入山學道之相也。六成道。經六年苦行。在菩提樹下。成佛得道之相也。七轉法輪成道以後。五十年間。說法普度人天之相也。八入滅。八十歲。在娑羅樹下。入於涅槃之相也。佛說法。謂之轉法輪。輪者。轉輪聖王之輪寶。有迴轉與碾摧之二義。迴轉。四天下。碾摧。諸怨敵。佛之教法。亦迴轉一切衆生界。摧破諸煩惱。故譬之曰法輪。轉者。譬說教法。轉自心之法。而移他之心。恰如轉車輪也。四教儀。受梵王請。三轉法輪。圓寂。涅槃也。賢首心經略疏。涅槃。此云圓寂。謂

德無不備稱圓。障無不盡名寂。涅槃梵語。謂脫離諸趣。入於不生不滅之門也。凡夫皆須老死。惟佛菩薩滅者。乃其應身。至於法身報身。則常住不滅。故曰涅槃。亦曰圓寂。法華經如來壽量品。如來難可得見。斯衆生等。聞如是語。必當生於難遭之想。心懷戀慕。渴仰於佛。便種善根。是故如來。雖不實滅。而言滅度。

佛一音 法一味 根大小 聞別異 分五時 喻五味

說華嚴 第一期 如從牛 出乳時 如初日 照須彌

小根衆 無聞知 說小乘 第二期 乳出酪 接小機

如日照 幽谷時 第三期 說大乘 成生酥 方等經

如食時 照高平 第四期 說般若 成熟酥 蕩諸著



日禺中 光昭灼 說法華 及涅槃 第五時 日影端

成醍醐 等涅槃 雖五味 乳一般 唯華嚴 稱主經

法界觀 最圓明 餘所說 眷屬經

■維摩經佛國品。佛以一音演說法。衆生隨類各得解。法華經謂。如來說法。一相一味。■天台大師。判釋如來一代所說法爲五時。亦名五味。第一華嚴時。如來初成正覺。爲圓機說圓教。約教則譬如日出。先照須彌最高之山。譬如從牛出乳。此從佛出十二部經也。二鹿苑時。說四阿含。卽小乘也。約時則日照幽谷。約味則從乳出酪。此從十二部經。出九部修多羅。三方等時。說維摩。思益。楞伽。楞嚴。三昧。金光明。勝鬘等經。約時則食時。約味則從酪出生酥。此從九部出方等。四般若時。說摩訶般若。光讚般若。金剛般若。若大品般若等。諸般若經。約時則禺中時。如日在巳。約味則從生酥出熟酥。此從方等之後。出摩訶般若。五法華涅槃時。約時則日輪當午。罄無側影。

約味。則從熟酥出醍醐。此從摩訶般若。出法華。其以五味對五時教者。一取相生次第。所謂牛譬於佛。五味譬教乳。從牛出酪。從乳出二酥。醍醐次第不亂。故譬五時相生次第。二取其濃淡。此則取一番下劣根性。所謂二乘根性。在華嚴會上。不信不解不變凡情。故譬其乳。次至鹿苑。聞三藏教。二乘根性。依教修行。轉凡成聖。故譬轉乳成酪。次至方等。聞彈斥聲。聞慕大恥小。得通教益。如轉酪成生酥。次至般若。奉勅轉教心。漸通泰。得別教益。如轉生酥成熟酥。次至法華。聞三周說法。得記作佛。如轉熟酥成醍醐。此約最鈍根具經五味。其次者。或經一二三四。其上達根性。味味得入法界實相。何必待法華開會。見天台四教儀。法界觀證入華嚴經所說之法界之觀法也。華嚴家之初祖。杜順和尚修之。而立三重。一真空觀。二理事無礙觀。三周徧含容觀。

一 機頓漸

二 法偏圓

圓人聽

偏亦圓

劣機聽

圓亦偏

三 一一切

一切一

四 如帝釋

天網珠

影重重

互攝入

佛<sup>五</sup>智慧 難窮測 譬大海 此一滴

●對未熟之衆生。初說小法。漸說大乘之法。此爲漸。對頓悟之機。自初直說大法。此爲頓。大乘章義。自有衆生。藉淺階遠。佛爲漸說。或有衆生。一越解大。佛爲頓說。

●偏者。偏于空。有圓者。一切具足。●一指性。一切指相。三祖僧璨信心銘。一卽一切。一切卽一。但能如是。何慮不畢。永嘉禪師語。一性圓通。一切性。一法徧含。一切法。一月普現。一切水。一切水。月一月攝。諸佛法身。入我性。我性共同。如來合。●天梵。忉利天之主也。居須彌山之頂。善見城。統領四峯之三十二天王。故稱三十三天。梵名釋迦提桓因陀羅。略云釋提桓因。天網珠。懸於帝釋宮之寶網也。衆珠之影。攝入一珠。一珠之影。徧入衆珠。華嚴諸師。取以譬諸法。重重無盡之緣起。●法華經。諸佛智慧。甚深無量。其智慧門。難解難入。華嚴經。偈。欲以窮劫測佛智。譬於持尺量虛空。

佛化東 漢永平 夢金人 飛帝庭 往印度 遠求經

四二章 先譯成 文句義 簡而精 魏晉宋 逮明清

諸賢聖<sup>二</sup> 前後興 或護法 或傳經 或疏釋 或淨行

十宗說<sup>三</sup> 派別明 經律論<sup>四</sup> 三藏宏 八千卷 光晶瑩

傳朝鮮 及東瀛 修史人<sup>五</sup> 不聞佛 遇佛事 多刪黜

誤衆生 迷大道

■後漢孝明帝永平七年正月十五日帝夜夢金人身長丈六赫奕如日飛至殿庭曰聲教流傳此土帝且集羣臣令占所夢時大學士傅毅對曰臣覽周書異記云西方有大聖人出世滅後千載當有聲教流傳此土陛下所夢將必是乎帝遂遣王遵等一十八人西訪佛法至月氏國遇摩騰竺法蘭二菩薩將白氎上畫釋迦像及四

十二章經卷載以白馬同回洛陽時永平十年丁卯十二月三十日也。佛門賢聖詳見高僧傳。初二三四集。初集自漢迄梁。正傳二百五十七人。附見二百三十九人。二集自梁迄唐。正傳三百三十一人。附見一百六十人。三集自唐迄宋。正傳五百三十人。四集自宋迄清宣統。正傳九百三十三人。附見六百一十一人。又清彭際清撰居士傳。自漢以來。正傳二百二十七人。附見七十九人。善女人傳。自晉以來。正傳一百三十八人。附見九人。十宗謂佛門之宗派也。楊仁山居士遺集中有十宗略說。一律宗。一名南山宗。二俱舍宗。一名有宗。三成實宗。四三論宗。一名性空宗。五天台宗。一名法華宗。六賢首宗。一名華嚴宗。七慈恩宗。一名法相宗。八禪宗。一名心宗。九密宗。一名真言宗。十淨土宗。一名蓮宗。楊氏序曰。前之九宗。分攝羣機。後之一宗。普攝羣機。隨修何法。皆作淨土資糧。生淨土後。門門皆得圓證。學者慎勿入主出奴。互相頡頏也。經律論三者。包各藏文義。故名三藏。經梵語修多羅藏。律梵語毘尼藏。論梵語阿毘曇藏。藏經。隋書經籍志。記梁武帝於華林園中。總集釋氏經典。凡五千四百卷。沙門寶唱撰經目錄。此是中國有藏經之始。南史姚察傳。遂有讀一藏經之說。開元釋教錄。列五千四十八卷。其後宋元明日本朝鮮。公私刻板。多至

二十餘副。然存者無多。略舉存者。則一爲高麗本。六千四百六十七卷。此本最古。一爲宋本。五千七百十四卷。一爲元本。五千三百九十七卷。日本天海僧正由南宏藏。翻刻六百六十五帙。一爲明本。六千七百七十一卷。明萬曆年間。密藏禪師。依當時北藏初刻綴本者。日本黃檗山刻之。清代重刻明本。且刊行續藏九十函。又續藏三十函。日本弘教書院。根據麗藏。校合天海本。元藏鐵眼本。增以其國古鈔本。出縮印藏經四帙。千九百十六部。八千五百三十四卷。其後藏經書院。又由鐵眼本刊行。已字藏經。千六百六十八部。及引續續藏經。千七百五十七部。最近頻伽精舍主人羅詩氏。據弘教略加增減。益以清刊龍藏。及乾隆續藏。千一百二十七卷。刊行藏經四十帙。四百十四冊。凡一千九百十六部。八千四百十六卷。

歷代明王。多知佛法。裨益國政。盡力宏揚。自漢迄明。皆有紀述。乃歷代史官。拘守儒教。凡遇佛事。任意刪黜。致誤後儒。不聞如來去殺勝殘。普度衆生之大道。獨魏書創釋老志。姚察之梁陳書。表彰佛法。實爲史家巨眼。宋歐陽修。好韓文排佛法。撰新唐書。凡舊史涉佛事者。削去之千餘條。令人浩歎。故司馬溫公嘗曰。駕性命道德之空言者。韓文也。泯治亂興亡之實效者。新書也。然則據佛祖統紀諸書。編布歷代佛化史。開人正眼。誠今日

贊治救時  
之良方也。

佛門衰<sup>一</sup> 始清世 罷試經 免度牒 欲弘法 反滋弊

粥飯僧<sup>二</sup> 違佛制 闡提多<sup>三</sup> 災禍接 獅子吼<sup>四</sup> 冀自今

息物競 和邦鄰 令普發 菩提心<sup>五</sup> 勉之哉 龍象人<sup>六</sup>

◎佛祖統紀。唐中宗景龍初治天下。試童行經義。無滯者。度之使爲僧。試經度僧自此始。度牒。許出家之證書也。唐會要。天寶六載。別僧尼道士。令祠部給牒。清世祖欲弘佛法。罷試經。免度牒。令發心出家者。無所限制。印光法師曰。今之受戒者。多是爲充大僧。而圖體面得戒之言。從未措懷。故方外之蟒流子。下流坯。無不皆是。受過三壇大戒之僧。此其弊。由於清世祖。罷試僧。免度牒。◎粥飯僧。言但喫粥飯。無學行之僧也。五代史李愚傳。廢帝謂愚等無事。常目宰相曰。此粥飯僧耳。以爲飽。

食終日而無所用心也。㊟闡提。一闡提也。譯言不信。謂不信佛法之人。涅槃經無信之人名一闡提。一闡提者。名不可治。一闡提者。斷滅一切諸善根本。心不攀緣一切善法。一闡提者。不信因果。無有慙愧。不信業報。不見現及未來世。不親善友。不隨諸佛所說教戒。如是之人名一闡提。諸佛世尊所不能治。周安士先生曰。人人信因果。大治之道也。人人不信因果。大亂之道也。㊟獅子吼。喻佛教威神發大音聲。如獅子王震伏羣獸也。傳燈錄釋迦牟尼佛生時。一手指天。一手指地。作獅子吼云。天上天下。唯吾獨尊。近年歐美各國。深受物競論之禍。信向東方文明。及研究佛法者日多。此世界和平之動機也。㊟菩提。舊譯爲道。求真道之心。曰菩提心。新譯爲覺。求正覺之心。曰菩提心。其意一也。華嚴經普賢行願品。因於衆生而起大悲。因於大悲。發菩提心。因菩提心。成等正覺。清省庵大師有勸發菩提心文。最爲圓滿之作。㊟龍象。梵語那伽。譯曰龍。又曰象。諸菩薩阿羅漢中。修行勇猛。有最大力者。佛稱爲龍象。舊華嚴經威儀巧妙最無比。是名龍象自在力。智度論。水中行。龍力大。陸行中。象力大。陽復子曰。由佛通儒。破障難。由儒入佛。破障難。又曰。由佛以通儒。勢如破竹。易由儒而入佛。勢若上灘難。普願教學人。明此難易。勢事半



古之人而功必倍之。故上篇述佛，而中篇述孔老。

### 中篇 述孔老

人倫教 孔聖詳 如日月 照萬方 人之本 不可忘

### 國之命 不可傷

孟子。飽食煖衣。逸居而無教。則近於禽獸。聖人有憂之。使契爲司徒。教以人倫。父子有親。君臣有義。夫婦有別。長幼有序。朋友有信。又學則三代共之。皆所以明人倫也。今雖政體廢。獨裁之制。然主席與屬員。其當各盡其義。則一也。孔子名丘。字仲尼。周春秋時魯人。初仕於魯。爲司寇。攝行相事。其後不用。遂周流四方。歸魯。刪詩書。定禮樂。贊周易。修春秋。以傳先王之道。弟子三千人。身通六藝者七十二人。後王追封爲大成至聖。論語仲尼日月也。論語有子曰。孝弟也者。其爲仁之本。

與。④詩大雅周雖舊邦其  
命維新。維新謂常新也。

孝且弟 謹而信 汎愛衆 而親仁 有餘力 以學文

此小學 弟子箴

論語弟子入則孝出則弟謹而信汎愛衆而親仁  
行有餘力則以學文此一章卽孔門小學之教

明明德 稱大人 此明德 性之眞 無內外 無邊垠

無生滅 無古今 融事物 唯一心 曰親民 止至善

曰致知 曰格物 曰誠意 曰正心 名則異 義則均

曰慎獨 曰日新 曰孝悌 曰慈仁 曰愛敬 曰忠信  
事則異 理則均

蕩益大師大學直指。只一在明明德。便說盡大學之道。上明字是始覺之修。下明德二字是本覺之性。大學全書所言無非明明德事。

有本末 有始終 知先後 感斯通 先修身 次齊家  
次治國 平天下 身日修 物自化 各有身 各自修  
位雖異 明德侔 但求己 毋他求 人有善 若己能  
人有惡 若己過 薄責人 厚責我 本一身 末天下

本道德 末財貨 但培本 自榮末 同好惡 息爭奪

若教爭 成大禍 仁必興 暴必破 此大學 學無我

修圓因 趣圓果 天下公 兵革措 世大同 由心做

身不修 徒浪話 欺一心 亂天下 雖匹夫 成大錯

陽復子曰。大學言修身齊家治國平天下。歸重到致知在格物。致知者。致良知也。致良知。卽是明明德。又言壹是皆以修身爲本。蓋身爲物之本。家國天下爲物之末。格物工夫。卽在修身上做。卽從各各自修其身做起。所謂人人修其身。而天下平。非於修身外。別尋格物工夫也。故凡從事家國天下。而其身不修者。必無良效。禮運天下爲公一章。與大學相爲表裏。禮運單說圓果。大學則詳說修圓因。以趣圓果之次第。不修因而求果。未有能得者也。以殺盜淫妄之惡因。而求修齊治平之善果。則猶南

行而北其轅矣。誰知念佛法門，卻是修身齊家治國平天下的祕法。卻是世法與出世法之大總持。世間人信得及時，當大放光明。蓋念佛，即是明明德，即是致良知，即是正心誠意，且真念佛人，則必修五戒十善。人人修五戒十善，而天下平。出世法與世間法，動乎此，而成乎彼，其效有不可思議者也。至於臨命終時，仗佛接引，出輪回生淨土，脫苦得樂，超凡入聖，得不退轉，直至成佛，此則真爲止於至善之域矣。顧亭林先生曰：天下興亡，匹夫之賤，與有責焉。蓋人人修其身，而天下平，否則亂之原也。

學不厭 教不倦 孔聖言 普賢行 願自他 同歸善

盡未來 如是念 一切聖 由此成 一切人 當共勉

陽復子曰：論語及孟子記孔子自述學而不厭，誨人不倦，凡三見。此與華嚴經普賢行願品十大願王之八者常隨佛學，九者恆順衆生，二願相應。聖所以聖，佛所以佛，皆此願成之也。孔子亦是大權菩薩，示現故不違本願也。儒者所言止此一生，菩薩大願，盡未來劫，徧于十方，此其異耳。然孔子曰：學而不厭，誨人不倦，何有於我哉。不

以生死之我爲究竟。  
亦盡未來劫之意也。

古建國 教學先 師與道 最尊嚴 凡國人 聽命焉

國有學 國不危 家有學 孝悌慈 人有學 知禮儀

禮學記。古之王者。建國君民。教學爲先。又凡學之道。嚴師爲難。師嚴然後道尊。道尊然後民知敬學。陽復子曰。學記一篇。爲中國最精之教育學。孟子曰。上無禮。下無學。賊民興。喪無日矣。可知有學則國不危。禮記。鸚鵡能言。不離飛鳥。猩猩能言。不離走獸。今人而無禮。雖能言。不亦禽獸之心乎。陽復子曰。孔子曰。德之不修。學之不講。是吾憂也。國人無論貴賤。男女老少。士農工商兵。皆當相勸以學。清聖祖康熙帝。每晨必御經筵聽講。雖盛夏嚴寒。不肯一日輟。一時羣下翕然興起於學。此真萬世之楷則。而建國致治之第一良謨也。

欲興教 須教女 胎有教 根有土 生聖人 皆聖母

夫之賢 由內助 明人倫 始夫婦 別內外 事相成

敬如賓<sup>四</sup> 禮無瀆 一婦賢 一家睦 家人教<sup>五</sup> 利女貞

婦不順 多怨爭 古教女 崇四德<sup>六</sup> 貞而靜 曰婦德

莊而婉 曰婦言 重而溫 曰婦容 主中饋 能裁縫

習紡織 曰婦功

■印光法師文鈔。欲天下太平。必由教兒女始。而教女比教子更爲要緊。以女人有相夫教子之天職。自古聖賢均資於賢母。況碌碌庸人乎。若無賢女。則無賢妻賢母。

矣。○漢劉向列女傳古者婦人妊子寢不側坐不邊立不蹕不食邪味割不正不食席不正不坐目不視邪色耳不聽邪聲夜則令瞽誦詩道正事如此則生子形容端正才德過人矣。○中庸言君子之道造端乎夫婦中國禮教男子治外女子治內此謂夫婦有別譬如左右兩手相反而適相成亦供求相需之道也若婦人而與外事內政必有不修者矣印光法師嘗言齊家治國平天下之權女子操得一半以其爲內政之助也。○左傳晉臼季使過冀見冀缺耨其妻饁之敬相待如賓與之歸言諸文公曰敬德之聚也能敬必有德德以治民君請用之臣聞之出門如賓承事如祭仁之則也。○易經家人利女貞象曰家人女正位乎內男正位乎外男女正天地之大義也。○後漢書列女傳曹世叔妻女誠女有四行一曰婦德二曰婦言三曰婦容四曰婦功夫云婦德不必才明絕異也婦言不必辯口利辭也婦容不必顏色美麗也婦功不必工巧過人也幽閒貞靜守節整齊行已有恥動靜有法是謂婦德擇辭而說不道惡語時然後言不厭於人是謂婦言盥澣塵穢服飾鮮潔沐浴以時身不垢辱是謂婦容專心紡績不好戲笑潔齊酒食以奉賓客是謂婦功。○陽復子曰明呂坤闡範輯經傳嘉言諸賢女善行所載皆世間法清彭際清善女人



傳所載皆出世間法。

皆爲女學必讀之書。

教兒女

自童蒙

<sup>一</sup>蒙養正

作聖功

兒始生

擇乳母

兒稍長

<sup>二</sup>擇鄰與

教之始

<sup>三</sup>知名數

正聲音

正言語

<sup>四</sup>釋名書

可採讀

謹應對

職灑掃

知禮讓

知進退

<sup>五</sup>進以禮

退以義

如是行

終身吉

<sup>六</sup>學小大

非一異

■易經蒙以養正聖功也。

■孟母仇氏舍近墓。孟子少嬉戲爲墓間事。母曰：此非

吾所居，乃去舍市旁。孟子嬉戲爲賈人事。母曰：此非吾所居，復徙舍學宮之旁。孟子

嬉戲乃設俎豆，揖讓進退。母曰：可矣。遂居之。仇音掌。詳見劉向列女傳。

■禮記六年教之數與方名。■釋名漢劉熙撰八卷，以同聲相諧推論稱名辨物之意，可以考見古時音

義卽古方名之教之遺也。 ⑤孔子進以禮退以義得之不得曰有命語見孟子。  
⑥小學大學非一亦非異。陽明傳習錄有言童子不能格物只教以灑掃應對先生  
曰灑掃應對就是一件物童子良知只到此便教去灑掃應對就是致他這一點良  
知了。又曰我這裏言格物自童子以至聖人皆是此等工夫雖賣柴人亦是做得雖  
公卿大夫以至天子皆是如此做。

一 古十歲 學六書

學加減

及乘除

二 六書法

首象形

次指事

次會意

此三者

義主形

復有三

卽諧聲

及假借

及轉注

此三者

義兼聲

合六書

妙用宏

喉齶舌

及齒唇

此五部

聲韻根

知通轉

別重輕

許氏書 說解明 識文字 乃讀經

禮內則十年出就外傅，居宿於外，學書計。○註書六書計九數。許氏說文敘周禮八歲入小學，保氏教國子，先以六書。一曰指事，指事者視而可識，察而見意。二二是也。三右上字，右下字。二曰象形，象形者畫成其物，隨體詰詘，日月是也。三曰形聲，形聲者以事爲名，取譬相成，江河是也。四曰會意，會意者比類合誼，以見指撝，堇信是也。五曰轉注，轉注者建類一首，同意相受，考老是也。六曰假借，假借者本無其字，依聲託事，令長是也。許氏名慎，東漢汝南人，字叔重，官至大尉，南閣祭酒，少博通經籍，馬融常推敬之。時人爲之語曰：五經無雙許叔重。著說文解字十四篇，推究六書之義，分別部居，至爲精密。後人言小學者，宗之。然治許書者多詳於形，而略於聲，不知諧聲轉注假借三者皆聲韻通轉之所成。陽復齋居士有說音一書專詮三者，天然通轉之軌道，多古人所未發。陽復子曰：清王筠文字蒙求選許書象形指事會意諧聲四種，共二千餘字，分類淺釋，尤便初學，兒童熟此，進求許書，易爲功矣。

稱至德 首孝經 報親恩 冠萬行

漢書藝文志。孝經者。孔子爲曾子陳孝道也。夫孝。天之經。地之義。民之行也。舉大者言。故曰孝經。孝經。仲尼居。曾子侍。子曰。先王有至德要道。以順天下。民用和睦。上下無怨。汝知之乎。佛說報四恩經。尤圓滿。謂天地恩。國王恩。父母恩。三寶恩。佛成道後。知多劫以來。輪轉六道。一切衆生。皆嘗爲我父母。六親眷屬。故誓度衆生。卽是大報恩。詳見佛大報恩經。又蓮池大師云。親得離塵垢。子道方成就。爲子者。能勸親念佛。出輪回。生淨土。乃爲究竟報恩也。

讀四書 先大學 最條理 最精約 蕩益解 尤正確

二千年 無此作 次論語 次孟子 次中庸 知奧義

自宋程朱於禮記中。提出大學中庸。配論語孟子爲四書。元仁宗皇慶二年。制定科舉首場。始以大學論語孟子中庸出題。用朱子章句集註。明清二代。皆沿襲之。惟明

王陽明先生主用古本大學。而正朱子改本補傳之非。其論甚正。國家功令所在。士人循習已久。不知其非也。陽明傳習錄。以良知學說講四書大義。尤爲通貫。蕩益明末高僧名智旭。字蕩益。通貫儒佛。有諸經疏釋。及靈峯宗論。晚年在佛前拈圖。須藉儒之四書。顯佛之第一義諦。乃作論語點睛。中庸大學直指。孟子擇乳。其大學依據古本。印光法師序曰。以圓頓教理。釋治世語言。俾靈山泗水之心法。徹底顯露。了無餘蘊。孟子擇乳。兵燹後失傳。

古治經 先詩禮 詩以興 禮以立 禮制行 詩言志

合內外 端其始 孔家學 詩二南 文王化 此一斑

制五禮 設六官 周文獻 猶可觀

論語興於詩。立於禮。左傳禮人之幹也。無禮無以立。禮坊記禮者。因人之情而爲之節文。以爲民坊者也。書舜典詩言志。詩序詩者志之所之也。在心爲志。發言

爲詩。情動於中。而形於言。陽復子曰。陽明傳習錄。有訓蒙大意。教約二篇。言教童子歌詩習禮之法。意義甚精。李圓淨居士。新編醒世千家詩。實爲啓蒙佳本。若以讚佛習歌。以拜佛習禮。令消除業障。增長善根。尤教童子之妙法也。 二南。周南召南也。詩集傳。文王分岐周故地。以爲周公召公之采邑。周公爲政於國中。其後采文王之世。風化所及。民俗之詩。其得之國中者。雜以南國之詩。謂之周南。召公宣布于諸侯。其後采文王之世。風化所及。民俗之詩。其得之南者。直謂之召南。論語。子謂伯魚曰。女爲周南召南矣乎。人而不爲周南召南。其猶正牆面而立也。與。近儒桐城馬通伯。有詩毛氏學若干卷。主張毛傳。致力頗深。 三。吉凶軍賓嘉爲五禮。春官。大宗伯。掌建邦之天人神鬼地祇之禮。以佐王建保邦國。以吉禮事邦國之鬼神。以凶禮哀邦國之憂。以賓禮親邦國。以軍禮同邦國。以嘉禮稱萬民。 四。六官。天官。地官。春官。夏官。秋官。冬官也。周官。天官冢宰。掌邦治。統百官。均四海。地官司徒。掌邦教。敷五典。擾也。兆民。春官宗伯。掌邦禮。治神人。和上下。夏官司馬。掌邦政。統六師。平邦國。秋官司寇。掌邦禁。詰姦慝。刑暴亂。冬官司空。掌邦地。居四民。時地利。陽復子曰。清江愼修先生禮書綱目。極精詳。秦蕙田五禮通考。尤宏博。張文襄轡軒語。

論讀經史子集各條皆可爲法亦

謂先治毛詩次及三禮再及他經

書知遠

道政事

起唐虞

終秦誓

堯舜傳

十六字

惟精一

心之祕

空假中

三觀備

禹湯文

出一系

禮經解。疏通知遠。書教也。書之失誣。其爲人也。疏通知遠而不誣。則深于書者也。史記。書以道事。陽復子曰。自唐堯至東周二千餘年。孔子刪書。止存百篇。蓋不以繁文教世。不以惡行示後。錄其可法可傳者而已。自漢至明亦二千餘年。二十四史。汗牛充棟。繁文惡行。可刪者多矣。十六字乃人心惟危。道心惟微。惟精惟一。允執厥中也。朱子中庸章句序。允執厥中者。舜之所以授禹也。自是聖聖相承。若成湯文武之爲君。皆以此而接夫道統之傳。佛門以體相用爲三大。惟一。是體。惟精。是相。執中。是用。又以佛門三觀釋之。差別觀爲精。爲假觀。平等觀爲一。爲空觀。精一雙照爲中觀。執中卽無所執。空假中三觀爲諸佛之心印。詳見天台宗教義學。

者知三觀心法。則知偏空之學。佛所呵斥。不得以空病佛也。又知精一中卽三觀。則知堯舜諸聖。皆佛菩薩示現。故能心心相印如此也。

一 春秋教 表周章 爲人道 立大防 一筆削 分抑揚

二 左氏傳 本末詳 公羊高 穀梁赤 傳經意 約而彰

●春秋魯史記之名。孔子刪定之。自魯隱公元年。至魯哀公十四年。凡十二公。二百四十二年。編年之史也。史記春秋筆則筆。削則削。游夏之徒。不能贊一詞。春秋正義序。夫子因魯史之有得失。據周經以正褒貶。一字所加。有同華袞之贈。一字所黜。無異蕭斧之誅。●左氏左丘明也。述夫子之意而作傳。所述事迹。皆徵之百二十國史書。故說春秋者。必以是爲根據。善惡因果之徵。左傳記載甚多。學者當前後參觀之。●公羊高。周時魯人。子夏弟子。作春秋公羊傳。其書實高所傳述。而其玄孫壽及胡毋子都。錄爲書。●穀梁赤。周時魯人。述穀梁傳。而其學者錄爲書。穀梁與公羊同師。而傳義之精者。公羊或弗能及。清顧棟高春秋大事表。五十卷。實



事求是——掃後儒

穿鑿支離之翳。

<sup>一</sup>易經傳 四聖成 伏羲卦 文周經 孔十翼 義乃明

<sup>二</sup>卦父母 乾與坤 陰陽肇 兩儀分 長男震 長女巽

中女離 中男坎 少女兌 少男艮 成配偶 譬人倫

<sup>三</sup>天地位 山澤通 雷風薄 水火融 因緣合 成化工

此八卦 三畫俱 陽畫實 陰畫虛 辨消長 定方隅

<sup>四</sup>本河圖 及洛書 交錯成 六十四 神明之 通萬事

## 生滅法<sup>五</sup> 易廣備

●滿益大師周易禪解。六十四卦皆伏羲所畫。夏經以艮居首。名曰連山。商經以坤居首。名曰歸藏。各有繇辭以斷吉凶。文王囚羑里時。繫今彖辭。以乾坤二卦居首。名之曰易。周公被流言時。復繫爻辭。孔子又爲之傳。以輔翼之。故名周易。古本文王周公彖爻二辭。自分上下兩經。孔子則有上經彖傳。下經象傳。上經象傳。下經象傳。乾坤二卦文言。繫辭上傳。繫辭下傳。說卦傳。序卦傳。雜卦傳。共名十翼。周易禪解。以佛理證易。最爲空前之作。清焦理堂易學甚精。績溪胡止澄居士現方采輯焦氏易義。而以佛理補其未備。●說卦傳。乾天也。故稱乎父。坤地也。故稱乎母。震一索而得男。故謂之長男。巽一索而得女。故謂之長女。坎再索而得男。故謂之中男。離再索而得女。故謂之中女。艮三索而得男。故謂之少男。兌三索而得女。故謂之少女。易學啓蒙。太極之判。始生一奇一耦。而爲一畫者二。是爲兩儀。兩儀卽陰陽。●說卦傳。天地定位。山澤遙氣。雷風相薄。水火不相射。八卦相錯。邵子曰。八卦相錯者。明交相錯而成六十四也。又曰。八卦相錯。而後萬物生焉。●繫辭傳。河出圖。洛出書。

聖人則之。孔安國曰：河圖者，伏羲氏王天下，龍馬出河，遂則其文，以畫八卦。洛書者，禹治水時，神龜負文，而列於背，有數自一至九，禹遂因而第之，以成九數。河圖之數，一六共宗，二七同道，三八爲朋，四九爲友，五十居中，以配五方五行。洛書之數，戴九履一，左三右七，二四爲肩，六八承足，五居中央，二者爲數術家一切推驗之準。則江慎修先生有河圖精蘊一書，詳言之。☰陽復子曰：易有不易變易，交易三義。實則真如不生滅，與無明生滅二門，不易，卽不生滅。變易，交易，皆生滅也。真如卽無極，以其無名相，無邊量也。無明卽太極太極，卽淨而含染之阿梨耶識也。太極，生陰陽兩儀，兩儀，生太陽少陽，太陰少陰之四象。四象，生八卦，與大乘起信論所云，由無明而生之三細相，六粗相，相類。當知世界一切境界，皆由衆生無明妄想而生，亦卽是妙真如心。隨衆生心，應所知量，循業發現。讀易者，不可以不讀華嚴經楞嚴經，及起信論也。

古學者 養且耕 學三年 通一經 經通一 用不窮

應於事 簡而豐 漢學者 有古風 尙孝悌<sup>二</sup> 尙力田

兼耕讀 多才賢 科舉興<sup>三</sup> 采虛文 飾花葉 遺本根

士不穡 農無聞 文尙僞 經不尊 若經義 了不知

讀雖多 奚以爲 專讀書 不農工 學雖富 困於窮

農工商 不讀書 家雖富 困於愚 學雜藝 不通經

技雖巧 道不明 經且荒 行蔑矣 棄人倫 無父子

夷貊行 禽獸似 世大亂 由茲起 撥亂世 返之治

勿蹈空 勿偏執 勿貪多 而無實 明一經 專一業

兼教養 知義利 如是者 可爲士 爭自利 亂之源

利<sup>四</sup>自他 大義全 物<sup>五</sup>競論 何知焉

■漢書藝文志古之學者耕且養三年而通一藝義謂親也陽復子曰一人治一經

而天下之通經者多人人讀五經而天下之通經者少漢時經學最盛由其專一經者多也

■漢惠帝四年春正月舉民孝弟力田者復其身漢文帝十二年置三

老孝悌力田常員詔曰孝悌天下之大順也力田爲生民之本也陽復子曰自科舉興而士皆趨於利祿不復力田矣此有數弊一者無業自活生計困窮二者文溺浮華不堪世用三者干求權勢士習卑污四者服官臨民不知民事五者以官爲市貪賄剝民六者一旦失官資生無術讀孟子舜發於畎畝之中一章可知古之聖賢皆職一業兩漢學風其士多專一經而兼農或工或商故志行高尚往往卻徵辟而

不就其生計。足以自立也。後世科舉之士。希求名位。如蟻慕羶。其生計不足以自立也。此實世風升降。國家治亂一大因由。 ④科舉以科目舉人也。創於隋。唐因之。取士之科。雖有秀才。明經。進士。俊士。明法。明字。明算等。而所重者進士。進士所試者。詞賦。宋用經義。明清用八股。其爲虛文一也。宋人語曰。焚香取進士。瞋目待明經。其好尙可知矣。今之學校。變本加厲。廢經不讀。非聖棄倫。天下之大亂。自此起矣。孟子曰。經正則庶民興。庶民興。斯無邪慝矣。文獻通考學校考。宋胡安定先生瑗。教授蘇湖間。二十餘年。弟子以數千計。時方尙辭賦。獨湖學以經義及時務。故有經義齋。治事齋。經義齋。擇疏通有器局者居之。治事齋。人各治一事。又兼一事。如邊防水利之類。故天下謂湖學多秀彥。其出而筮仕。往往取高第。及爲政。多適於世用。若老於吏事者。由講習有素也。慶曆四年。詔州縣立學。建太學於京師。而有司請下湖州。取先生之法。以爲太學。著爲令。陽復子教學簡說曰。教學之道。三要。四本。何謂三要。曰誠。曰相生。相養。曰簡易切用。以是三要。而有三毋。毋僞。毋相殘。相殺。毋繁難。無用。何謂四本。本學。孔老佛。歸佛爲本。治農工商。務農爲本。修孝弟慈。致孝爲本。解形聲義。通聲爲本。本立而道生。欲速則不達。 ④利自他。自利利他也。卽孔子所謂己欲立而

立人己欲達而達人。宋史儒林傳。朱熹守南康。陸九淵訪之。熹與至白鹿洞。九淵爲講君子喻於義。小人喻於利一章。聽者至泣下。熹以爲切中學。者隱微深痼之病。  
④物競之論。英人達爾文所倡。謂萬物互相競爭。惟適者乃能生存。清嚴復譯赫胥黎氏之天演論。卽推論物競天擇。適者生存之義。此自私自利之小人。不知正因果之

論也。

經既明

一 選讀子

及歷史

及地理

與經術

相表裏

二 老莊學

本黃帝

貴眞樸

黜煩費

爲國家

養元氣

三 漢文景

稱大治

四 事無事

爲無爲

五 得此一

應萬機

雖勤動

無勞疲

以養生

亦宜之

六 鍊丹術

乃假託

求長生

戀軀殼

縱成仙

終墮落

是外道

非正覺

●清張文襄公之洞有輶軒語及書目問答二書閱之可知讀經史子集之門徑及各書精校精注之本 ●老聃李氏名耳楚苦縣人周守藏室之史也孔子適周問禮於老聃周衰西遊將出關關令尹喜強爲著書乃著道德五千言 莊周戰國宋之蒙人字子休嘗爲漆園吏其學無所不窺然其要歸本於老子之言故其著書十餘萬言大率皆寓言也 明憨山大師有觀老莊影響論老子道德經解莊子內篇注皆極精 黃帝之學讀內經可知多言修道治世之術不獨言醫也老莊之言多本黃帝故漢人稱黃老之學 ●漢文帝景帝父子相繼並爲賢主用黃老之術以治天下躬行節儉田稅三十而賦一海內富庶黎民醇厚史稱文景之世 ●老子道德經我無爲而民自化我好靜而民自正我無事而民自富我無欲而民自樸 ●老子道德經昔之得一者天得一以清地得一以寧神得一以靈谷得一以盈萬物得一以生侯王得一以爲天下正 一卽無思無爲寂然不動感而遂通之妙眞如心也 ●外道鍊丹之術假託黃老以鍊五金八石養砂接汞九轉大還之類爲



外丹。自身之精氣神。爲內丹。妄執色身。志於長生不死。豈知愛戀軀殼。便是生死輪回根本。好心男女。發願修行。便遇邪師。錯入此路。不知淨土念佛法門。仗佛願力。接引。徑出輪回。速成聖果。或僻陋不聞。或聞而不信。深可惜也。⑤仙說文選也。老而不死。遷入山也。楞嚴經。備言地行仙。飛行仙。遊行仙。空行仙。天行仙。通行仙。道行仙。照行仙。精行仙。絕行仙。十種仙人。修因證果。仙報一盡。依然輪回。還墮諸趣之中。經云。是等皆於人中煉心。不修正覺。別得生理。壽千萬歲。休止深山。或大海島。絕于人境。斯亦輪迴妄想流轉。不修三昧。報盡還來。散入諸趣。諸趣。謂輪迴六道中也。

孔與老 猶江河 潤萬物 利濟多 若大海 唯佛陀

佛修德 至圓滿 佛說法 至究竟 天中天 聖中聖

究竟。猶至極之義。儒道皆世間法。惟佛法兼世間法。與出世間法。能出輪回生死。究竟成佛。天中天。衆生稱佛之尊號。法華經化城品。聖主天中天。佛上謂佛也。大涅槃

繫經有四種天。一者世間天。二者生天。三者淨天。四者義天。世間天者如諸國王。生天者從四天王乃至非有想非無想天。淨天者從須陀洹至辟支佛。義天者十住菩薩摩訶薩等。如來非天。然諸衆生亦復稱佛爲天。中天是故如來非天非非天。佛菩薩緣覺聲聞爲四聖佛爲聖中之聖也。陽復子曰。老子孔子據其迹則尙是凡夫。若論其本則是菩薩。示現覺世者也。

### 下篇 述歷代學史之要

往劫事

佛影影

我國史

起三皇<sup>二</sup>

無典籍

可稽詳

自五帝

歷三王

有成功

有文章

傳萬世

不可忘

伏羲氏

作易象

神農氏

作本草<sup>三</sup>

軒轅氏

作內經<sup>四</sup>

## 此三經 尤首出

●往劫過去劫也。佛經多言過去劫中因緣事迹。●宋司馬光編稽古錄起自三皇謂天皇氏地皇氏人皇氏。五帝謂伏羲神農黃帝堯舜。三王謂夏商周三代。論語孔子稱大哉堯之爲君也。巍巍乎其有成功也。煥乎其有文章。●本草爲神農氏所作。載藥三百六十五味。分上中下三品。明李時珍著本草綱目。取諸家之說。刪繁除複。訂補譌誤。凡五十二卷。最爲詳博。清張隱庵陳修園葉天士三家合註最精。●合素問靈樞兩種。謂之內經。記黃帝與歧伯問答之語。唐王冰註最早。凡二十四卷。素問雜修養治術醫理。靈樞經論鍼灸。清張隱庵內經註最精。

古百官 傳一藝 有世祿 常承襲 政教學 得合一

周東遷 始失官 學在夷 有異端 孔刪定 大義完

楊爲我<sup>四</sup> 墨兼愛 許並耕 告義外 執一偏<sup>五</sup> 賊中道

孟闢之<sup>六</sup> 光杲杲

■古者學在於官。故有世祿。以世其家學。如后稷教民稼穡。其子孫皆爲農官。周禮六官之屬。稱氏者。皆爲世職。孟子。昔者文王之治岐也。耕者九一。仕者世祿。左傳。天子失官。學在四夷。蓋周東遷以後。事王畿所入不足。以養百官。故百官散在四方。而爲百家之學。○孔子刪詩書。定禮樂。贊周易。修春秋。所以息異端之說也。王陽明傳習錄。上編中有與徐愛論孔子刪定六經之意。不以繁文教世。不以惡行示後。可謂千古鉅眼。可藥俗學務文棄實之病。文長不載。學者自檢讀之。○楊朱字子居。戰國時人。後於墨子。主於爲我。不以一毫利天下。墨子名翟。周平王時人。著有兼愛篇。許行言賢君當與民並耕而食。告子言仁內也。義外也。○孟子言所惡於執一者。謂其賊道也。舉一而廢百也。卽佛所謂邊見。非中道也。○孟子闢墨氏無父。楊氏無君。無君猶言無國。斥許行是亂天下。論告子未嘗知義。以其外

之也。外之謂於心外見義。不知一切唯心無心外之義也。漢揚雄言楊墨塞路。孟子辭而闕之。廓如也。

秦廢古<sup>一</sup> 燔詩書<sup>二</sup> 漢九流<sup>二</sup> 存區區 藝文志 詳緒餘

黜百家 獨尊儒 爲此議 董仲舒<sup>三</sup> 以是故 漸忽諸<sup>四</sup>

●史記秦始皇本紀三十四年丞相李斯請史官非秦紀皆燒之。非博士官所職。天下敢有藏詩書百家語。悉詣守尉雜燒之。有敢偶語詩書棄市。●九流。儒家者流。道家者流。陰陽家者流。法家者流。名家者流。墨家者流。縱橫家者流。雜家者流。農家者流。是爲九家。其學皆出於古者世守之官。詳見漢書藝文志。●董仲舒。漢廣川人。少治春秋。下帷講授。三年不窺園。武帝時。以賢良對天人三策。爲江都相。後爲膠西王相。以病免。仲舒學有原委。正誼明道之言。度越諸子。爲漢醇儒。漢書董仲舒傳。自武帝初立。魏其武安侯爲相。而儒隆矣。及仲舒對策。推明孔氏。抑黜百家。立學校之官。州郡舉茂才孝廉。皆自仲舒發之。●忽諸。謂漸衰失也。左傳。皋陶庭堅。

不祀。  
忽諸。

漢武帝<sup>一</sup> 尙儒治 爲五經 立博士 設太學 養弟子

通一經 得爲吏 漢經學 許鄭長<sup>二</sup> 許訓詁 鄭禮章<sup>三</sup>

爲後學 作津梁

■漢武帝建元五年春置五經博士。元朔五年丞相平津侯等奏請爲博士官。置弟子五十人。一歲輒課第其高下。以補郎中文學。掌故卽有秀才異等。輒以名聞。其不事學。若下材。輒罷之。又吏通一藝以上者。請皆選擇。以補右職。上從之。自此公卿大夫士吏彬彬多文學之士矣。■訓詁亦稱訓故。訓解古文義也。卽許慎所著說文解字。爲治六書學者之宗。■鄭玄東漢高密人。字康成。少爲鄉齋夫。以不樂爲吏。遂造太學受業。博通諸經。及三統曆九章算術等。後事扶風馬融。游學十餘年。乃

歸會以黨事禁錮。遂隱修經業。杜門不出。黨禁解。徵辟皆不就。著書凡百餘萬言。弟子自遠方至者數千人。時孔融爲北海相。深敬之。告高密縣。爲特立一鄉。曰鄭公鄉。廣闢門衢。號爲通德門。獻帝建安五年卒。年七十四。所著之書。有毛詩箋。周禮儀禮記注。爲後世言三禮學者之宗。

司馬史 班范書 文樸茂 事徵詳

司馬遷。漢人。字子長。生於龍門。嘗南游江淮。北涉汶泗。父談爲太史公。遷繼父業。李陵降匈奴。武帝怒甚。遷極言陵忠。下腐刑。乃紉金匱石室之書。上起黃帝。下止獲麟。作史記。序事辨而不華。質而不俚。劉向揚雄皆稱爲良史之材。班固撰漢書。范曄撰後漢書。故史家稱兩書爲班范。班固。東漢安陵人。字孟堅。博通載籍。明帝時。典校祕書。父彪。字叔皮。初事竇融。勸融歸漢。光武時。舉茂材。拜徐令。繼司馬遷之史記。作漢書。書未成。固續成之。時人比之遷董固。妹昭。字惠姬。適曹世叔。夫亡。和帝召入宮。令皇后貴人師事之。號曹大家。作女誡七章。固著漢書。其八表及天文志未及竟而卒。詔昭就東觀藏書踵成之。范曄。南北朝宋之順陽人。字蔚宗。博涉經史。著爲

文章爲祕書丞。左遷宣城太守。不得志。乃刪定後漢書。成一家之作。史記前後漢書。唐宋皆列入科舉考試。謂之三史。唐諫議大夫殷侗言。三史爲書。勸善懲惡。亞於經。六

張仲景 醫中王 傷寒論 金匱方 民賴之 享壽康

張機。後漢。棗陽人。字仲景。學醫於張伯祖。盡得其傳。靈帝時。舉孝廉。官至長沙太守。著傷寒論十卷。華陀讀而喜曰。此真活人書也。又著金匱玉函要略三卷。漢魏迄今。醫家奉爲準則。推爲醫中亞聖。

魏晉宋 逮隋唐 尙詩賦 工詞章 文學盛 實學荒

惟佛學 寢滋昌



佛學典籍。自晉以後。傳譯寔多。龍象輩出。至隋唐而大盛。

梁武帝 始尊經 五經館 規制宏 禮博士 擢諸生

南學者 自此興

梁武帝天監四年春正月置五經博士立州郡學。梁主雅好儒術。以東晉宋齊雖開置國學。而無講授之實。乃下詔曰。兩漢登賢。莫非經術。服膺雅道。名立行成。魏晉浮蕩。儒教淪歇。風節罔樹。抑此之由。其置五經博士。廣開館宇。招納後進。給其餼廩。其射策通明者。除卽爲吏。又選學生。往雲門山。從何胤受業。命胤選經。明行修者。以聞。分遣博士祭酒到州郡立學。詳見南史儒林傳。明儒顧憲成謂自古帝王學問之博洽。未有過於梁武帝者也。南方文化。由此而興。陽復子曰。梁武帝承積亂之餘。提倡儒佛。在位五十年。躬自布衣蔬食。糲飯豆羹。蔬止三品。過午不食。壽八十六。手註儒經二百餘卷。撰通史六百卷。佛經論疏數百卷。御殿講經。聽衆萬餘。而勤於

政務孜孜無怠數十年無兵戈之禍。老年疎於武備。致有侯景之亂。然傳位四世。其時家行六齋。官吏受菩薩戒。善業所感。實開後來李唐治平之基。子孫爲唐宰相者。十世皆無失德。遺澤之遠。史所希有。論古者當通觀前後因果。而善學之不當因一噎而廢食。而以學佛爲戒也。

隋王通 稱大儒 講六藝 授門徒 承學者 開唐初

貞觀治 此灌輸

王通。隋龍門人。字仲淹。幼篤學。西遊長安。奏太平十二策。知謀不用。退居河汾。教授受業者千數。門多偉人。魏徵。房玄齡。杜如晦等。皆嘗問學。屢徵不至。卒後。門人諡曰文中子。著有中說。禮論。續書。續詩。元經。讚易等書。中說獨傳。陽明傳習錄。問文中子。是如何人。先生曰。文中子。庶幾具體而微。惜其早死。問如何卻有續經之非。曰。續經亦未可盡非。良久曰。更覺良工心獨苦。貞觀。唐太宗年號。太宗之世。唐爲極盛。史稱貞觀之治。幾於刑措不用。外戶不閉。道不拾遺。



則廢經廢倫之事。皆極力提倡。而期其實行。其禍之原。殆由不信因果之理。學所基。可不哀哉。 ③ 濂溪。周敦頤也。宋道州人。字茂叔。知南康軍。因家廬山蓮花峯下。胸懷灑落。如光風霽月。嘗師事鶴林寺壽涯禪師。著太極圖說及通書。爲宋理學之開祖。二程皆其弟子。卒諡元公。世稱濂溪先生。以所居名也。 ④ 二程子。程顥。程頤也。顥字伯淳。宋洛陽人。舉進士。神宗時爲監察御史。旋乞去。與弟頤皆學於周敦頤。顥嘗泛濫諸家。出入老釋。返求諸六經。而後得之。著定性書。與太極圖說相表裏。開聖學之祕。及卒。文彥博題其墓曰。明道先生。諡純公。 頤字正叔。哲宗初。擢崇政殿說書。在經筵。與蘇軾不合。遂出管勾西京國子監。紹聖中。以元祐諸臣被貶。少與兄顥學於周敦頤。生平以誠爲本。以窮理爲主。晚年著易傳及春秋傳。時號伊川先生。諡正公。 ⑤ 張載。宋郿人。字子厚。神宗時爲崇文校書。未幾。屏居南山下。教授諸生。其大旨尙禮。生平以易爲宗。以中庸爲體。著正蒙及東銘西銘。世號橫渠先生。諡明公。 朱熹。宋婺源人。字元晦。後改字仲晦。婺源於梁陳時爲新安郡。故其畧款多稱新安。父松爲政和縣尉。因僑寓建州。紹興中。舉建州鄉貢。登進士。歷任高孝。光寧。四朝累官轉運副使。煥章閣待制。祕閣修撰。卒。贈寶謨閣學士。諡曰文。紹定時。追封徽國。

公淳祐時從祀孔廟。清康熙中升位於十哲之次。其論治以正君恤民爲主。其爲學以居敬窮理爲主。明王陽明先生有朱子晚年定論一卷。學者不可不知。真能表章朱子者無過陽明也。陽復子曰。宋儒理學之要。可閱江註朱子近思錄。宋儒之缺。在不能深求佛大乘教義。以自廣。彭際清居士有一乘決疑論評釋最爲允當。此又治宋學者不可不知也。清儒彭際清汪大紳羅臺山皆治宋學而深通佛理。

## 象山學

啓陽明

致良知

說最精

能化民

能治兵

## 大學問

文晶晶

傳習錄

翼聖經

繼孔孟

爲明星

## 能直入

佛門庭

陸九淵。宋金谿人。字子靜。乾道進士。官至知荆門軍。居貴谿之象山。號象山先生。嘗與朱子會講鵝湖。論多不合。朱重道問學。陸重尊德性。朱好註經。陸則謂學苟知

道則六經皆我註腳。王守仁明餘姚人字伯安弘治進士正德時巡撫南贛平大帽山諸賊定宸濠之亂明世文臣用兵未有如守仁者卒贈新建侯諡文成其學以致良知爲主謂宋周程二子後惟象山陸氏簡易直捷有以接孟氏之傳而朱子集註或問之類乃中年未定之說學者翕然從之有王文成公全集三十八卷傳習錄三卷與弟子講學皆主古本大學故有大學問一篇嘗築室陽明洞中號陽明子世稱陽明先生錢德洪曰大學問者師門之教典也學者初及門必先以此意授使人聞言之下卽得此心之知無出於民彝物則之中致知之功不外乎修齊治平之內嘉靖丁亥師起征思田將發因門人請乃錄成書鄒謙之嘗附刻於大學古本陽復子曰陽明先生雖自謂嘗出入釋老於佛大乘教義未窺其全故有空寂之疑然其致良知學說自謂從百死千難中得來者實隱合大乘教義學者當知大乘教義乃爲致良知之極則也

清經學 最顧江 顧古韻 網在綱 讀詩易 音琅琅

江禮書 考精詳 成朱子 所未遑 推步術 江尤長

繼之者 戴段王 漢經學 重輝光

顧炎武清初崑山人。字寧人。號亭林。明末屏居山中。潛心經史。入清不仕。周遊四方。以書自隨。後卒於華陰。其學以朱子爲主。而長於考證。著述甚多。最精韻學。據古經以正六朝唐人之失。據唐人以正宋人之失。有音學五書。一音論。三卷。二詩本音。十卷。三易本音。三卷。四唐韻正。二十卷。五古音表。二卷。又韻補正。一卷。正宋吳才老所註韻補之誤。江永清婺源人。字慎修。康熙時諸生。博通今古。尤專心十三經註疏。自壯至老。丹黃不去手。嘗一遊京師。時方開三禮館。侍郎方苞素精三禮。聞先生名。願一見。見則以所疑。士冠禮昏禮中數事爲問。先生從容置答。乃大歎服。讀書好深思。長於比勘。於步算鍾律聲韻尤精。其禮書綱目。八十八卷。裒集經傳。釐析篇章。足終朱子未竟之緒。休寧戴震嘗從問業。所學得力于江氏者爲多。乾隆二十七年卒。年八十二。戴震清休寧人。字東原。乾隆時修四庫全書。紀昀表日修薦之於

朝高宗素聞其名遂以舉人召充纂修官賜進士授庶吉士其學長於考辨而尤精小學所著書凡二十餘種孔繼函段玉裁刻有戴氏遺書其考宮記圖儀禮釋宮聲韻考聲類表句股割圓記等尤著名段玉裁清金壇人字若膺一字懋堂東原高第弟子乾隆舉人官知縣講求古義精小學著有說文解字註尙書撰異毛詩傳小註詩經小學錄等王念孫清高郵人字懷祖學者稱石臞先生乾隆進士官至永定河道居官廉正不受請託畢生以著述自娛通聲音訓詁之學撰廣雅疏證凡漢以前倉雅古訓皆搜括而通證之又正古書之誤作讀書雜誌曾文正公聖哲畫像記謂王氏父子念孫引之集小學訓詁之大成復乎不可幾矣引之著有經義述聞爲治經學者入門必讀之書

歐學東 始明監 采西法 推曆算 清聖祖 尤通貫

興製造 自咸同 物質學 多發蒙 殺人具 日以工



# 物競論 助之攻 哀哉民 苦兵戎

■曆象推步之法。自黃帝迄秦。凡六改。歷漢魏隋唐五代宋金元明。屢改而益密。明用大統法。卽元之授時本。西域札瑪里鼎所撰。而郭守敬參改者也。兼用回回法。相傳爲瑪哈穆特所著。有回回司天監之官。自成化迄隆慶。推交食不符。紛紛議改。神宗時。西洋人利瑪竇航海入貢。而龐迪峨熊三拔湯若望等。攜其圖策先後至。五官正周子愚請譯其書。乃命徐光啓李之藻同譯。依其法預推。悉驗。更製儀器。測交食。陵犯俱密合。以世方多故。未頒行。清順治元年。頒時憲書。用西洋新法。命湯若望掌管欽天監。康熙初。習舊法者。舐排之下。議治罪。廢西洋法。八年。復傳集西洋人。與監官質辯。至端午門。測驗正午日影。西洋所推。一一符合。而九卿中。無一知者。帝乃發憤研究。纂輯曆象考成諸書。條分縷析。折衷指歸。復以西人南懷仁掌欽天監事。詳見清文獻通考之象緯考。及雍正追錄庭訓格言。

■咸豐清文宗年號。同治。清穆宗年號。籌辦製造局始末。詳見曾文正公奏稿。咸豐十一年。覆陳購買外洋船礮。摺及同治七年。新造輪船摺。先是咸豐十一年。摺曾公卽有試辦船礮之議。同治四

年乃就上海城南開設鐵廠先造槍礮六年試造輪船七年第一號輪船告成命名曰恬吉意取四海波恬廠務安吉也船身長十八丈五尺闊二丈七尺二寸試行長江每一時上水行七十餘里下水行一百二十餘里附設繙譯館招生學習訂請英國偉烈亞力美國傅蘭雅瑪高溫三人專譯有關製造之物理化學諸書於是研究物質學者漸多今則殺人之具愈出愈奇爲世大患非物質學之能殺人貪瞋癡毒造作惡業以成於殺也物競論者貪瞋癡之偃導也

世競爭 都爲利 喪良心 爭物質 害且九 利不一

計所得 不償失 人讎之 天厭之 欲害人 終自及

因果律 如膠漆 觀過去 知現未

律法也常也。言因與果有常法如膠與漆不相離也。

古詩以膠投漆中誰能別離此。

殺衆生<sup>一</sup> 罪尤多 貪口腹 侈綾羅 舉世界<sup>二</sup> 一日中

所流血 如江河 輪迴報<sup>三</sup> 彼此加 三惡道 苦漩渦

不信理 如事何 果報隱<sup>四</sup> 人不覺 花報顯 災疫多

■華嚴經十地品殺生之罪。能令衆生墮於地獄。畜生。餓鬼。若生人中。得二種果報。一者短命。二者多病。■周安士先生曰。刀兵之難。在於人道。或數十年。或百餘年。僅一二見。至於畜生。無日得脫。普天之下。一遇雞鳴。無量無邊。狠心屠戶。手執利刀。奮向羣豕。爾時羣豕。自知難到大聲哀號。救援不至。各被彼人裂腹剖心。抽腸拔肺。哀號未斷。又投沸湯。受大苦惱。片刻之間。閻浮世界。萬萬生靈。頭足異處。積羣豕骨。過高山巔。漂羣豕血。赤江水流。如是惡因。如是惡果。詰其根由。皆爲我等口腹所致。■輪迴之報。彼此加者。如大佛頂經言。死死生生。互來相瞰。惡業俱生。窮未來際。■如人造十惡業。而現世所受苦痛。災疫。曰花報。其身後墮入地獄。畜生。餓鬼。曰

果報。願雲禪師偈曰：千百年來盪裏羹，怨深如海恨難平。欲知世上刀兵劫，但聽屠門夜半聲。此就花報言之也。其果報在三途。陽復子曰：蓮池大師戒殺放生文及周安士先生全書中之萬善先資、江慎修先生放生殺生現報錄、論證詳切，均爲不可不讀之書。

佛教人

要善轉

轉治亂

唯一念

人轉物

則人貴

物轉人

則人賤

轉物質

成慈善

厚民生

與民便

禁相殘

禁奢豔

節以儉

開以勤

裁以義

合以仁

務人人

修其身

教家人

教國人

弘佛化

爲中心

等衆生

如六親

亂庶已

治自新

世太平

冀自今

●大佛頂經言。若能轉物。則同如來。凡夫被物轉。菩薩能轉物。古德云。轉得山河歸自己。轉得自己歸山河。又云。老僧轉得十二時。汝諸人被十二時轉。皆轉物之義。  
④等衆生以平等待遇一切衆生也。楞伽  
經一切衆生從本以來。展轉因緣。常爲六親。

三字頌 義無量 順佛語 成音章 於國學 挈其綱

世出世 同一航 童習之 記憶強 壯行之 悲智雙

老得之 炳燭光 始初步 進無疆 脫苦海 生蓮邦

覺圓滿 爲法王

①世出世世間法與出世間法也。陽復子曰。印光法師文鈔。教人主敬存誠。修善去惡。善事父母。善教兒女。深信因果。深厭輪回。戒殺放生。喫素念佛。求生淨土。使人

在世則共致太平。出世則速成聖果。不勸出家。不教難行。不尚宏博。不求神通。家家可行。人人做得。真世法。出世法之良導師。而求正學者必讀之書也。 ㊦ 悲智雙慈。悲與智慧也。此爲佛菩薩所具一雙之德。稱曰悲智二門。智者上求菩提。屬於自利。悲者下化衆生。屬於利他。 ㊧ 劉向說苑建本篇少而好學。如日出之陽。壯而好學。如日中之光。老而好學。如炳燭之明。炳燭之明。孰與昧行乎。 ㊨ 大乘章義。既能自覺。復能覺他。覺行圓滿。故名爲佛。佛於法自在。稱曰法王。法華經。我爲法王。於法自在。陽復子曰。治一切學。修一切行。皆須念佛。回向西方。求生淨土。求成正覺。普度衆生。蓮池大師西方發願文。尤爲發願回向之極則。修淨土人。於念佛課畢。須每日誦之。彭際清居士曰。從今後。不須復道致良知。卽南無阿彌陀佛六字。便是致良知。不須復道存天理。卽南無阿彌陀佛六字。便是存天理。向來載浮載沈。半上半下。說得全不濟事。說到頭白。又見回聲落地。輪回去也。豈不痛哉。 又彭際清居士傳曰。王虛中名曰休。廬州人也。宋高宗朝。舉國學進士。棄官不就。著書名龍舒淨土文。自王公士大夫。下至屠丐。僮奴。阜隸。優妓之屬。咸以淨土法門。勸引皈依。其文淺說曲喻。至詳至懇。若父兄之教子弟。然同時歷陽張安國爲之序曰。友人龍舒王虛

中端靜簡潔。博通羣書。訓傳六經。諸子數十萬言。一旦捐之曰。是皆業習。非究竟法。吾其西方之歸。自是精進。惟佛爲念。年且六十。布衣蔬茹。重趼千里。以是教人。風雨寒暑弗遑惜。閒居日課千拜。夜分乃寢。面目奕奕有光。望之者。信其爲有道之士也。虛中將卒。前三日。徧別道友。勸以精修淨業。云將有行。不復相見。及期。與生徒講書畢。禮誦如常。時至三更。忽厲聲稱阿彌陀佛數聲。唱言佛來迎我。屹然立化。咸祐中。呂元益重刻淨土文。至祝願篇。版中得舍利三顆。其叔父師說。載其事於篇首云。由是觀之。可見念佛求生西方之淨土法門。人人可修。人人當修。眞可謂三根普被。利鈍全收。普度衆生。同入正覺之無上妙法也。普願同倫。各宜勉旃。

跋

余於己巳春修禮於陽復居士易園江先生之門。先生縱論儒佛經史而歸宿於淨土。旋又示以新著三字鏡融佛孔老於一貫。舉歷代學史之指歸。章受而讀之。始悟二十  
年來。徬徨歧路。人天正眼。竟盲如也。謹就此書於讀誦時。搜集出處。要者箋之。其隨文  
顯義者。遑待贅也。余蓋以先生之悲夫教學日下。世亂日深。後之人將無所循而入聖  
哲之門。游清平之域也。而述爲此篇。而初機學者。不無茫然。箋註之事。其可已乎。箋成  
以呈。先生喜曰。是亦方便利人事也。遂加損益而附行之。其各門精要應讀之書。亦附  
註焉。是書原名三字鏡印光法師審定後。更名頌也。中華人民建國之十又九年庚午  
秋。初學人齊朝章敬識。



陽  
復  
齋  
詩  
偈  
集



陽復齋詩偈集題辭

圓人受法。無法不圓。詩人作偈頌。無偈頌不詩。蓋夙慧天然。非作意使之爾也。鄞縣前知事暉午江公。將易園居士所著之陽復齋詩偈集稿。託海上黃涵之居士轉寄示余。余閱之喜曰。是有所證悟者之言也。以有分別心。說無分別法。以有言之事。顯離言之道。示可思議之念。佛法門。證不可思議之唯心淨土。導引文人。同趨極樂。其意盡善。用心甚苦也。且斯稿文辭高爽。句義絕塵。語語皆從大慈悲心中流出。如胡盧之落水。轉轉是面。類水銀之墮地。顆顆皆圓。體廣用深。事明理徹。啓迪人心。有裨世道者。夫豈小哉。以之而刊印流行。公諸同好。未始非利生之法。施歟。凡讀是集者。幸無以作世諦文字觀。庶幾不負易園居士之苦心吐膽語也。有志生淨土者。毋忽欲重宣密意。而說偈言。佛經雖至珍。執著反爲障。我有大法王。不居文字藏。六處放光明。七佛大榜樣。聽之沒音聲。視之無形狀。時時說妙法。法法悉皆安。安。虛安也。卽不可得意。一句彌陀佛。作普度慈航。諦閑敬題。

陽復齋詩偈集緣起

詩偈譬醫藥。如丸散膏丹。易服且易效。不愁入口難。自病服之宜。他病當無異。輾轉善流通。不比文難記。是以孔門下。首教興於詩。佛說十二部。伽陀爲一支。有韻或無韻。亦詩亦非詩。志在達意義。不在攻文辭。志在啓婦孺。不在干舉司。知我當見可。罪我亦聽之。我生故無始。我名亦無邊。苦海一衆生。出沒塵沙年。淨業始戊午。冬至一陽申。自爾今十年。歲星加戊辰。西方極樂邦。無日不追尋。十年獨寤語。不作雕蟲吟。能語唯一心。所語唯一心。能所本非二。以心而印心。願人無量壽。願世成黃金。願枯生死海。願拔邪見林。豈唯茲十年。我願將無垠。廣舌覆十方。塵刹宏潮音。不厭復不倦。永劫以爲心。稽首阿彌陀。爲我保證人。

陽復齋詩偈集篇目

- 一淨土
- 二大乘
- 三融通
- 四讚頌
- 五題贈
- 六感託
- 七借陶白詩

# 陽復齋詩偈集

陽復齋居士江謙著

## 一 淨土

### 陽復齋念佛吟

我今何所學。學夫婦之愚。白法千聲佛。黃纒百八珠。念佛真無念。無生卽永生。娑婆與極樂。心目兩分明。我聞四十八。彌陀大願心。欲知此願大。天地猶微塵。呼亦阿彌陀。吸亦阿彌陀。不知他與自。誰我誰彌陀。無數名菩薩。彌陀膝下人。當年千子內。太子是觀音。大哉大勢至。念佛證圓通。六根歸一念。妙意開無窮。佛言經滅後。淨法百年留。最終留四字。苦海作慈舟。宿服陽明學。良知義最圓。不兼因果說。難與下根言。

### 全性念佛頌

我以無量光壽心。念茲無量光壽佛。是謂全性以起修。亦復全修在於性。心體無量

佛亦爾。我心無量衆生然。全體作佛作衆生。心佛衆生三無別。大包十方徧三世。亦復細入一微塵。皆此一念無二三。法界不增塵不減。無始一念無明起。遂令一指遮須彌。因茲區局執著心。夢受輪迴生死苦。我以念佛破無明。無邊光壽還同佛。更假淨土優異力。速還圓滿清淨身。願施白法普含靈。同證自心無上覺。

念佛偈

行也阿彌陀。坐也阿彌陀。忙也阿彌陀。空也阿彌陀。呼也阿彌陀。吸也阿彌陀。嗅也阿彌陀。著也阿彌陀。喜也阿彌陀。怒也阿彌陀。苦也阿彌陀。樂也阿彌陀。我也阿彌陀。人也阿彌陀。一切衆生類。皆是阿彌陀。從朝直到夜。不廢阿彌陀。從少直到老。不廢阿彌陀。千般萬般念。不如念彌陀。念念阿彌陀。蓮生七寶華。生時消業障。歸去見彌陀。菩薩爲同學。十方是一家。黃金爲大地。衆寶作網羅。白鶴與孔雀。衆鳥聲相和。衣食皆自然。不待求奔波。諸佛爲說法。諸天散天華。但樂無衆苦。但善無惡魔。自然不退轉。精進成佛陀。自身成佛後。再來度娑婆。西方極樂國。去去莫蹉跎。

## 念佛寶王偈

業淨成佛難。帶業往生易。所以念彌陀。佛法中第一。多生成佛難。當世往生易。所以念彌陀。佛法中第一。豎出三界難。橫超三界易。所以念彌陀。佛法中第一。自力成佛難。乘願往生易。所以念彌陀。佛法中第一。彌陀成佛難。念佛往生易。所以念彌陀。佛法中第一。千經萬呪難。一句彌陀易。所以念彌陀。佛法中第一。

### 附簡註

- 一 身口意三業清淨。唯佛一人。菩薩尙勤懺悔。何況凡夫。三業未淨。憑仗佛力往生西方。謂之帶業往生。
- 二 多生成佛。必歷三阿僧祇劫。求生西方。但深信切願力行。一生取辦。
- 三 自力起修。由人而生。欲界色界無色界諸天。而成出塵羅漢。謂之豎出。佛力接引。徑生西方極樂世界。謂之橫超。
- 四 自力豎出。易遭墮落。乘佛願船。往生西方。見佛聞法。得不退轉。直至成佛。

五 彌陀歷劫修行成就佛道莊嚴淨土。今承佛誓願念佛名號。卽得往生。難易判絕。

六 南無阿彌陀佛六字。圓攝一切法門。顯家可與知能。唯佛方能究了。佛法如寶。念佛往生法門。尤爲寶中之王也。

念佛不可思議頌

歸佛之心是佛。所歸之佛是心。南無阿彌陀佛。卽生卽佛卽心。一句易知易念。無邊妙義妙音。但能深信切願。頓時息妄歸真。佛力不可思議。四十八願宏深。持名不可思議。臨終佛現攝心。願力不可思議。願者俱上善人。十方諸佛護念釋尊。苦口頻申。彌陀攝取不捨。智者何待沈吟。信卽無上正覺。不信地獄之因。念到一心不亂。凡身卽是法身。念念蓮華生長。時時極樂追尋。坐處無非寶座。行地卽是黃金。未生專憶一土。生已徧入無垠。十方諸佛授記。十方菩薩爲鄰。隨類分身攝化。救度平等怨親。乃知一卽無量。究竟不外一心。卽禪卽教卽律。卽中卽俗卽真。超過法門無量。端緣



六字威神。萬劫千生已矣。切勿錯過從今。

勸修西方淨土

十方調御同舒舌。讚歎彌陀聖道場。但耳洪名成佛種。縱參下品勝天王。一生頓越僧祇劫。九界齊登大法堂。鸚鵡八哥歸去也。那堪七尺眼如盲。

凡心卽佛性偈

相打與拜揖。同此一手作。相罵與讚歎。同此一口作。懶惰與勤勞。同此一身作。歡喜與嗔恚。同此一心作。善惡一轉移。凡聖分邱嶽。凡心卽佛性。蓋上無明殼。佛性卽凡心。祇要常磨琢。勿忘勿助長。不厭不倦卻。窮劫以爲心。何佛不可學。第一莫蹉跎。卽今生極樂。諸上善人俱。何處從聞惡。無量香光中。莊嚴成正覺。况茲念佛心。當念光昭灼。口誦佛音聲。身禮佛工作。未離四大軀。已向蓮華託。

寶王三昧頌

本唐飛錫大師寶王三昧論

寶王三昧。隨息念佛。以息出入。持佛名號。藉氣束心。無明潛沒。靈光迴然。心與佛會。

可以息心。可以延壽。一息尙存。不容少怠。迴向殷勤。決生樂國。

十念往生頌

彌陀大願。普攝有情。臨終十念。咸許往生。如是大利。而不知寶。是曰無福。是謂顛倒。願念佛人。量力施功。聞人千萬。十念爲宗。以十念始。以十念終。忙人十念。朝夕敬恭。見佛往生。與聞人同。我爲此頌。揭佛大慈。普願佛子。往生蓮池。

觀經禪頌

淨土十六觀經。觀觀教人見性。觀境卽是觀心。觀相無非觀性。暫觀終日不忘。久觀數年在定。樂邦種種莊嚴。能於卽生取證。證時境相分明。不出自心圓鏡。十方寶刹塵塵。盡是鏡中現影。乃知背境論心。無異殺身延命。覺哉冥悟禪家。速出偏空大阱。

觀落日想佛白毫相光意本華嚴經及觀無量壽佛經

口念彌陀心作觀。穩如騎馬拄杖子。如鳥兩翅車兩輪。決登極樂三摩地。我生五十年。有三年快觀。落日於今始。想如見佛白毫光。八棱中空宛相似。紅黃白綠間復純。中

央如銀復如水。一一寶色出寶光。映徹佛身無倫比。金身丈六聳雲霄。下有金蓮承玉趾。開目閉目皆見之。如是作觀觀成矣。一光即見一切光。全身八萬四千毛孔。一放光皆如是。普照十方念佛人。護念攝持如一子。行住坐臥四時中。此身與佛同棲止。捨報當生極樂邦。光中佛授菩提記。我亦舒光徧十方。普與羣生修佛事。佛言奇哉。衆生本來無量光。卻被收將雲翳裏。一迷永劫何時已。請君撥雲觀落日。

讀覺明妙行菩薩示語

有生有病尋常事。愈早愈遲莫管他。肯捨娑婆歸極樂。區區皮殼愛將那。住世百年無悶惱。即時撒手亦翛然。此生已訂金臺約。希取瑤池上品蓮。奇方妙訣無他祕。但辦心心憶佛名。我是未來三界寶。一聲聲自佛心生。

觀十二因緣斷愛偈

十二因緣愛爲大毒。是謂怨家詐現親。形影相依死生追逐。因愛而親則遭其酷。愛卽無明。愛卽鬼獄。豔色刀山。淫聲湯鑊。蜜裏砒霜。錦裝蛇虺。慧眼了然。癡人不悟。

隨五濁輪斷西方路。我今覷破莫來相辱。醜惡獐狎。是汝面目。由汝憂悲。由汝驚怖。由汝貪癡。由汝瞋怒。汝是魔王。最親眷屬。斬斷愛根。掙開愛桔。極樂莊嚴。寶光軒露。阿彌陀經六方佛讚

甲子念佛會引

浮生如夢。幻世無常。家人親戚。歡好非長。繁華富貴。究竟空亡。鬼畜地獄。痛苦難當。阿彌陀佛。佛中之王。接引衆生。垂手放光。一生彼國。壽命無量。所有罪業。如日照霜。蓮華四色。寶樹成行。禽聲和雅。樓閣輝煌。極樂之福。與佛同享。天廚美味。與佛同嘗。譬如兒女。穩靠爹娘。菩薩羅漢。相聚一堂。自然成道。不煩不忙。茲當甲子。歲運光昌。合衆建立。平等道場。男女老幼。士農工商。奉勸念佛。同生西方。

雲灣佛光社成立祝詞

九界衆生佛爲慈父。其光所被十方佛土。曰難曰災。匪佛曷護。曰福曰祥。匪佛曷予。衆生無佛。歸依無所。天上天下。無如佛者。我祖蕭梁。揚佛之光。持齋戒殺。倡自帝王。臣庶化之。造福無疆。晉宋以來。比於成康。餘陰八葉。迭相有唐。柱國避難。易蕭而江。世濟其美。事佛不忘。靈山巍巍。萬阜所瞻。慕真禪師。此焉修潛。爲我卜葬。衍世絲絲。匪承佛力。曷邁斯緣。禮迦勅築。惟祖新原。真松真柏。實開其先。聽松繼之。化大行焉。有禪有淨。演爲薪傳。佛光不替。垂三百年。今社之成。於祖有光。光光相融。如月千江。非一非異。非得非亡。非新非舊。非斷非常。非多非寡。非隱非彰。始焉一念。積之一堂。始焉一族。積之十方。衆生無盡。我願無量。願同法界。迴向蓮邦。西方彌陀。垂手放光。

### 因果歌

春種一粒粟。秋收萬顆子。因少果報多。善惡皆如此。一句阿彌陀。福德尤無比。生時煩惱消。歸去蓮華裏。得福勝諸天。得壽不可紀。分身度十方。如月照千水。常隨菩薩遊。定到如來地。若人種惡因。地獄難饒你。餓鬼與畜生。難得人身矣。佛告諸凡夫。因

果無虛理。

念佛自策呈諸道友

學佛既未能。佛學又不會。惟有念彌陀。求生極樂國。若復不加工。是蠢然一物。墮入苦漩渦。千生跳不出。

贈佛光社諸善人

三皈五戒六齋日。此是初機入道門。若願華開親見佛。兼修禪淨種深根。

佛七圓滿爲諸友說偈

西方我淨土。彌陀我慈父。佛入一切心。佛在一切處。時時相接引。在在能遭遇。不怕佛不來。只怕我不去。

勸淨業道友兼持地藏本願經

常持地藏號。託想彌陀邦。審了閻浮苦。方知極樂長。遲迴墮地獄。精進往西方。菩薩一爲伴。塵勞那不忘。雖生下下品。猶勝諸天王。

## 勸病家念佛

千生病苦知何限。山積參苓海作湯。一藥頓除無量病。西方佛是大醫王。

生。死。輪。迴。爲。衆。生。大。

痛苦。非。念。佛。求。生。阿。彌。陀。佛。國。土。無。由。了。脫。

## 唯心淨土自性彌陀偈

喫自性飯。住唯心屋。穿自性衣。行唯心路。喫自性飯。不是枵腹。粒粒之餐。無非辛苦。穿自性衣。不是裸露。縷縷之紗。無非勞碌。唯心之屋。不是野居。一椽一瓦。力困心劬。唯心之路。不是陵虛。一土一石。汗血所塗。飲食游息。不出心中。大地山河。無非性具。祖孫父子。自性家庭。十界四生。唯心眷屬。青青翠竹。自性枝柯。鬱鬱黃花。唯心開布。婆婆自性。信此不疑。極樂唯心。了然如故。蓮池丈六。自性彌陀。七寶莊嚴。唯心淨土。凡夫計心。方寸之府。其細如絲。其鉅如拇。區局執著。夢受衆苦。歷劫輪迴。不知其誤。不知此心。橫徹豎窮。十萬億刹。舉念斯通。不勞跬步。豈待從容。實無方所。假現西東。因緣離合。有滅有生。娑婆緣滅。極樂緣生。金臺千葉。積念而成。因緣成熟。有佛來迎。

陽復齋十年紀念偈

我憶十年前。滬居歲戊午。冬至一陽生。萬動之初祖。我以病苦緣。始秉佛經讀。意在忘參苓。不在窮淵谷。當其入手時。不與凡書伍。必潔必敬恭。端坐整衣武。儼如對佛前。妙相照心目。念我昔聰健。佛典與難知。今病不自勝。豈耐深思惟。一字付一讀。擬若蒙童時。能解自心會。不解姑聽之。以是得無礙。不復憂難疑。心意既寧定。精神日倍滋。乃知是藥王。不用求餘醫。

我初所得經。實爲無量壽。阿彌陀如來。來爲我先導。如是優異法。萬劫難遇知。我昔何善根。信手得摩尼。四十八大願。願願皆深慈。蠕動與蝸飛。亦許生蓮池。而我豈無望。翻恨聞之遲。

善哉彭二林。爲我大知識。欲人信此經。燦爛舒文字。淨土妙法門。詮之無不至。因茲起信論。識餘大乘經。紛如帝網珠。光若室千燈。珠珠互映攝。燈燈相照明。一讀光烟燦。再讀光晶瑩。至三至四讀。光照無邊城。



修淨土不廢世事詩

色空園裏宜安步。誼寂堂中好賃居。尋定夜間歸宿處。卻來營業做工夫。

積念成佛偈

譬如人讀書。一徧至千徧。假使念念滅。千徧同一徧。一徧口艱辛。千徧口純熟。可知千徧中。徧徧不虛讀。譬如人作工。從少直到老。假使念念滅。老作還如少。少作工拙劣。老作工精靈。可知日日作。妙技非虛成。善惡等念耳。因積果不同。積惡雖無形。其勢日低落。積善雖無形。其勢日增崇。落極至地獄。刀山劍樹叢。增極至佛土。萬級蓮華宮。普賢十願王。願願同虛空。廣之濟十方。深之利無窮。善財窮劫力。不盡毛孔中。無量阿僧祇。積念成神通。凡夫心力羸。佛教觀一面。念念向西方。七寶生光燄。念念憶洪名。纍若摩尼串。十萬千百萬。所念無虛念。凡夫盲不知。佛眼了然見。念極功成時。樂土從心現。彌陀無量光。一念一切徧。一方既得生。十方隨所願。卽一而徧多。此是大方便。積念若無積。所積人不見。念佛本無念。無念應須念。持此盡未來。不厭復

不倦。

讀楊仁山居士觀經略論

佛身卽自身。佛心卽自心。乃至菩薩緣覺聲聞天人修羅畜生餓鬼地獄九界依正報。一一皆爲自寫真。觀經十六觀。一一皆爲自傳神。如觀大圓鏡。自見面像非他人。如夢大海衆。自心所現非他心。誰爲此論楊居士。字字應鑄閣浮金。昔人徙宅忘其妻。今人入世忘其身。忘身億劫覓不得。請憑此論來追尋。

阿彌陀經蓮池疏鈔頌

一心不亂

彌陀全經一語最要。一心不亂。是竅中竅。有事一心。有理一心。事一心者。念念佛號。念念西方。娑婆塵影。一切都忘。理一心者。唯是一心。十方一心。三世一心。衆生一心。諸佛一心。何人何我。何古何今。彼上此土。能念所念。種種差別。一併銷沈。此心常寂。此心常光。寂無量壽。光無量光。壽延永劫。光照十方。無所障礙。有何思量。如是念者。

念佛中王如大圓鏡。一塵不染萬像齊彰。

理一心

剎那生滅皆緣影。歷劫眞常是本心。三世十方原一念。衆生諸佛亦徒云。

事一心

求生淨土至誠心。生卽無生住無住。心心六字泯塵緣。事一心時理亦具。

冬夜長有感

百年半昏夜。少憊老復慵。英壯時幾何。學宦太慳。矧復多坎坷。鬱遏青雲胸。咄哉過隙駒。寧假多雍容。千生續短夢。勞苦依然空。縱飛有頂天。不免泥犁弓。如何金翅王。戀此生死籠。三界不赦獄。這裏誰英雄。西方極樂尊。許我魚爲龍。舒光炯無量。得壽長無窮。浩瀚聲聞海。塵沙菩薩叢。胥來寄好音。期我蓮華宮。十方無上士。勸讚聲雷同。盍歸諸逝子。莫負黃金翁。到此卽聖域。不復憂沈淪。再來入世間。如月昭千洪。終當坐樹王。開發無邊矇。

安心訣

英雄眼淚誰人知道。向無邊一哭。衆生顛倒。孽海滔滔。惟有彌陀垂手。從千生萬劫以來。而今知道。莫錯過此生。更尋煩惱。六字洪名。萬緣都掃。得見彌陀。法門齊曉。我從今把吾心安了。

發菩提心念佛求生淨土偈

佛是無量光。我心亦是無量光。佛是無量壽。我心亦是無量壽。佛心我心衆生心。是三是一分還合。將此無量光壽心。還念無量光壽佛。一念念佛一念佛。念念念佛念。念佛念到臨終見佛時。西方佛卽心中佛。娑婆業障一齊消。極樂莊嚴從此出。此是真心顯現時。無邊光壽還同佛。分身無量度衆生。普願衆生同作佛。

六字道人歌

六字道人何人乎。十方三世空中花。行住坐臥無他念。但念南無阿彌陀。經史雜家亦博涉。掩卷息心一字無。塵勞煩惱亦無盡。舉足下足一事無。放下千般萬般念。惟

此一念常追慕。從朝至暮。今至老。乃至永劫。無他圖。神棲極樂身泥塗。月在長空影在湖。當來佛寶。今凡夫。六字道人何人乎。

夢裏還鄉。路遠勞多。醒時安然枕席間也。乃知淨土之生。不出此寂然不動之真心。假有東西。實無來去。

夢裏還鄉。覺路長。醒來元自在家鄉。西方有願。勞翹跂。到後方知夢裏忙。臨終願見彌陀佛。已住光明極樂城。自是不歸歸便得。故鄉風月有誰爭。十萬億程非遠近。元來心量裏虛空。自心要見心中佛。只在歸真一念功。

### 念佛喻

山泉涓滴流。終歲不肯止。問其何所爲。將往成東海。今此念佛人。念念亦如是。一生極樂邦。遂游諸佛海。今此念妄人。念念亦如是。一爲業累牽。遂入輪回海。勿言涓滴微。來自汪洋海。勿言一念微。起自圓覺海。其來故無邊。其去亦無量。淨穢但異因。生佛遂殊相。去來淨穢觀。如夢如幻妄。本來無去來。不動真如相。

讚淨土詩三十首

法王有法覺大夢。三界由來火宅中。不著劫燒唯佛土。最優方便數蓮宗。夢。讀如門。

彌陀一句妙難思。治國齊家一貫之。出世法中成世法。不須復道致良知。未句用影。紹升語。從

今後不須復道致良知。只南無阿彌陀佛六字。便是致良知。

彌陀一句妙難思。坐臥行居一貫之。一月萬川隨在現。金容到處炳威儀。

彌陀一句妙難思。鈍慧賢愚一貫之。念到此心纖滓盡。萬華齊茁寶蓮池。

彌陀一句妙難思。苦樂安危一貫之。不爲革囊垂兩淚。舒光無量壽無涯。廣韻。涯。讀如宜。

彌陀一句妙難思。萬別千差一貫之。融卻佛生人我相。金剛無壞體巍巍。

彌陀一句妙難思。儒釋宗傳一貫之。堯舜丁寧十六字。一心三觀印何疑。精。一中心。傳。卽空。假。

中三觀。爲諸佛心印。卽空。精卽假。雙照卽中。一念念佛。具足三觀。

彌陀一句妙難思。極樂娑婆一貫之。不待華開方見佛。卽今已是往生時。

彌陀一句妙難思。盡未來時一貫之。一念萬年常不動。豎窮橫徧更無虧。

彌陀一句妙難思。情與無情一貫之。寶樹靈禽皆佛化。水晶宮殿飾琉璃。  
彌陀一句妙難思。在家出家一貫之。不離眷屬天倫會。不著貪嗔愛慢癡。  
彌陀一句妙難思。處約居豐一貫之。天味寶衣隨念至。眼前蔬布也光烹。  
彌陀一句妙難思。陋巷榮觀一貫之。七寶金珠成世界。人間豪貴盡貧兒。  
彌陀一句妙難思。寂守羣棲一貫之。諸上善人爲伴侶。頓忘單影寄茅茨。  
彌陀一句妙難思。都市山林一貫之。一顆清珠投濁水。自然禪定息紛馳。  
彌陀一句妙難思。地獄天宮一貫之。三界同居不赦獄。不緣寶手怎能離。  
彌陀一句妙難思。萬行莊嚴一貫之。十大願王歸極樂。華嚴海衆共心期。  
彌陀一句妙難思。一土多方一貫之。萬億塵沙諸佛國。清朝食頃供無遺。  
彌陀一句妙難思。三世十方一貫之。諸佛廣長誠實舌。盡教九界念阿彌。  
彌陀一句妙難思。咫尺天涯一貫之。落日西西萬億刹。祥光杲杲照鬚眉。  
彌陀一句妙難思。少壯高年一貫之。隨念欣然隨願得。一般香飯味千差。差讀如疑。

彌陀一句妙難思。動靜閒忙一貫之。昔有鐵工勤念佛。鐵錘聲與佛聲隨。  
彌陀一句妙難思。果海因源一貫之。全心念佛全心佛。決是當來大導師。  
彌陀一句妙難思。惟敬惟誠一貫之。慈母憶兒兒憶母。天親從此不相違。  
彌陀一句妙難思。信願行三一貫之。碎盡須彌枯盡海。此心堅的不能移。  
彌陀一句妙難思。秋月春花一貫之。脫卻盈虛生滅相。寶花珠月沒凋時。  
彌陀一句妙難思。灼暑威寒一貫之。光裏經行花裏定。不鑪不筆自熙怡。  
彌陀一句妙難思。隱顯行藏一貫之。無價摩尼能兩寶。隨緣利衆應機施。  
彌陀一句妙難思。萬呪千經一貫之。十二部分經律論。攝歸六字最淵微。  
彌陀一句妙難思。竟劫宣揚不盡之。修得幾生聞此法。從今一蹴到蓮池。

陽復齋紀念日祝辭

弟子江謙。始聞佛法。歲在戊午。節當冬至。一陽初復。萬物始生。陽復名齋。永爲紀念。我初讀經。得無量壽。彌陀慈父。實爲導師。翹跂西方。發心回向。歷年四祀。未退初心。



尚願如來慈悲加被。業障消除。身心安樂。自今精進。究竟菩提。願及有情。同生極樂。

臨終助念人警策行人說偈

助念雖然得力。用力全靠自家。譬如開船西去。一篙離卻娑婆。阿彌陀佛來接。手持七寶蓮華。左右觀音勢至。聖衆數踰恆沙。自度再來度人。閻王稽首欽嘉。

辛未秋齊用修創佛光分社於狝田書來請法寄詞祝之

敦倫盡職。教育家庭。素食念佛。戒殺放生。諸惡莫作。衆善奉行。求生淨土。願度衆生。世出世法。如是而已。心正身修。家齊國治。天下太平。皆從此始。反此逆行。大亂斯起。慘殺流離。哀哉苦矣。畜鬼地獄。苦尤無比。因果輪回。世間至理。曾是不知。而云智士。江灣乙丑。始倡蓮宗。弭災獲福。不可殫論。以茲七載。應者雲從。東西南北。一念之通。一切衆生。佛性則同。分社之興。讚歎歡喜。狝田甲道。首屈一指。莘莘善人。同聲發起。以戒定慧。息貪瞋癡。何災不滅。何福不滋。不在空言。而在行持。蓮池萬頃。拭目俟之。

念佛珠頌

手持珠念佛陀。佛一聲。珠一顆。珠引手。手引心。心念佛。佛念我。卽珠卽手亦卽心。卽心卽佛。還卽我。譬如以水合於水。如佛念佛我念我。非珠非手亦非心。非心非佛復非我。譬如以空合於空。空中從何分爾我。此珠卽是法界心。此珠卽是法界我。作我作珠與作佛。一心所轉無不可。此珠是我法中寶。使我與佛常相守。此珠是我善知識。使我與佛不相失。使我念念到蓮池。彌陀慈父爲我師。使我念念生極樂。無邊菩薩爲同學。金臺天樂佛迎時。但手此珠能致之。願盡此生不離手。一串摩尼無價寶。願盡此生弄此珠。珠歟心歟抑佛歟。

二 大乘

勸利根念佛人讀誦大乘偈

華嚴楞嚴圓融緻密。法華涅槃開權顯實。圓覺金剛頓教了義。此六大乘。必須修習。日誦一時。一年而畢。如入寶山。如觀寶集。得未曾有。不可思議。先修念佛。三淨土經。四十八願。十六觀明。於中尤要。一心持名。此六大乘。以爲助行。普賢十願。包孕尤宏。

無量光壽。此爲芽萌。以大圓覺。向彌陀城。西方蓮池。上品而生。

### 唯心頌

一切世間。夢幻而已。從心中來。去至心裏。何處是心。何處非心。何南何北。何古何今。十方萬劫。一念之心。寂然不動。感則通神。覺時諸佛。夢裏天人。萬般俱幻。唯有心真。勸淨業人。常持普賢十大願王偈。

淨宗最初祖。普賢十願王。十願威神力。導歸極樂邦。當時華藏衆。踊躍同稱揚。持是願王者。一念不可量。豎則窮三際。橫之徧十方。無量光壽因。端推此願王。命終捨報時。一切皆分颺。眷屬與珍寶。無復相扶將。引導不捨離。唯此勝願王。面見彌陀佛。親覩無量光。普勸修行人。常持此願王。永離惡道苦。長謝輪迴忙。懸茲大願帆。助我生西航。金臺上品華。待我先敷張。普賢觀世音。讚歎聲鏘鏘。光中佛授記。普化無邊方。疾滿普賢願。終成大法王。

### 大慈悲心偈又名與一切衆生結佛緣偈

善男善女人。聽我說修行。如來歷劫修。都是爲衆生。愛護衆生者。修佛易得成。不要罵衆生。不要惱衆生。不要打衆生。不要殺衆生。衆生歷劫來。是我親與朋。也曾爲我父。也曾爲我母。也曾爲我弟。也曾爲我兄。或是我妻子。或是我師生。一朝輪迴去。各各尋路行。改頭又換面。變姓復掉名。相見不相識。誰復知前情。有心既迷昧。有口難分明。哀哉輪迴中。恩怨無常情。欺他是蠢物。罵他是畜生。害他他害我。世世復生生。世界與國家。從此無安寧。小則爲瘟疫。大則爲刀兵。絕嗣與短命。都因害衆生。地獄餓鬼苦。都因害衆生。此是大因果。此是大天平。我今依佛教。要修慈悲行。看他我一般。殺他我心驚。若要修功德。第一戒殺生。爲他喫齋素。爲他買放生。爲他念彌陀。祝他蓮華生。待我生淨土。普度諸衆生。同出輪迴苦。同生極樂城。此名菩提心。此名普賢行。此心是佛心。此行是佛行。如此慈悲人。不怕佛不成。普願識字人。傳此慈悲偈。普願有口人。傳此慈悲聲。諸佛皆歡喜。讚汝善修行。

如來轉法輪偈

四諦六度十二緣。隨順衆生心業轉。有聞莫不心意開。無量生死衆結斷。

如何名四諦。此是因果法。苦果集爲因。滅果道爲因。知苦要斷集。慕滅要修道。二因成二果。佛教聲聞法。生死輪迴苦。貪瞋癡是集。要滅生死苦。修道念彌陀。

如何十二緣。此是生滅法。無明緣行。行緣識。識緣名色。色緣入。六入緣觸。觸緣受。因受緣愛。愛緣取。因取緣有。有緣生。因生而緣老病死。十二因緣生滅門。觀是因緣成獨覺。

如何名六度。此是菩薩行。布施度慳貪。持戒度放逸。忍辱度瞋恚。精進度懈怠。禪定度散亂。智慧度愚癡。此六波羅蜜。皆能到彼岸。菩薩大悲願。乘此六度船。白度而度他。同到如來岸。

### 誦戒偈

菩薩戒名一切衆生戒。一切衆生皆當學也。

十重四十八輕戒。菩薩成佛之真因。戒如日月明破闇。又如瓔珞珠嚴身。我是未來

當成佛。佛是過去持戒人。佛尙半月半月誦。我當日日又日新。

戒殺

借肉須還肉。應同我肉看。殺他如自殺。早晚一般般。

戒盜

六度施爲首。云何起盜心。休貪贏一介。輸卻寶如林。

戒淫

過去生身母。當來救世尊。應生恭敬想。莫負昊天恩。

戒妄語

拔舌耕犁獄。都爲妄語人。常能無妄語。才算是真心。

戒飲酒

凡夫心似醉。萬惡酒爲媒。欲淨如來藏。先拋鴆毒杯。

觀心不動偈

人行明鏡中。人動鏡不動。此心大圓鏡。影現諸羣動。認影以爲心。便失鏡之用。影如念生滅。鏡如心本靜。三際影相續。六塵影紛競。影從緣所生。緣是影之命。因影復爲緣。移轉紛無定。緣束以名西。西亦非真正。緣過名現在。現亦非真正。緣得以名失。亦非真正。緣樂以名哀。哀亦非真正。緣大以名小。小亦非真正。况此一緣中。衆緣所和併。譬如光與質撮合而成影。莊生不得齊。黃帝難爲訂。一切皆假名。當體空無性。迷影起貪瞋。追隨違順境。嗚嚇鼠垂涎。杯吞蛇致病。螳螂怒當車。罔兩行無定。造業受輪迴。長夢何時醒。皆由念所牽。不與心相應。皆爲影所欺。不與鏡相應。明心不拒念。拒影非明鏡。但觀不動心。得見如來性。因念以遣念。念佛最方便。念樂苦潛消。念淨穢不現。念念阿彌陀。雖念如無念。修茲勝妙行。益以翹勤願。命終生佛前。自見本來面。寂光徧在心。圓滿無餘欠。

論性必兼性體性具性量三者而義始圓偈曰

性體常寂照。性具十法界。性量窮豎橫。合三性乃大。莫執凡量心。計小如糞芥。勿墮

偏空機。焦種無生態。利利與塵塵。何者性之外。魚躍與鳶飛。隨在皆觀照。翠竹與黃花。卽麤卽靈妙。告子未嘗知。啓儒何足怪。騎驢復覓驢。將被圓人笑。

轉物而不爲物所轉偈

悟時人喫飯。迷時飯喫人。悟時人著衣。迷時衣著人。悟時人使錢。迷時錢使人。悟時人讀書。迷時書讀人。云何人喫飯。蔬食逾八珍。云何飯喫人。多食傷其身。云何人著衣。敝袍生陽春。云何衣著人。豔服災其身。云何人使錢。供佛施園林。云何錢使人。慳貪餓鬼因。云何人讀書。徹悟修其身。云何書讀人。邪見障於真。要知世萬物。皆唯我一心。心外無一物。物外無他心。要將心轉物。毋令物轉心。娑婆念念滅。極樂念念新。娑婆轉極樂。全恃此一心。破除我法執。修觀二空心。無能貪所貪。無能瞋所瞋。以是覺愚癡。光哉智慧人。

四事供養偈。意本大涅槃經。

菩薩受四事。正念爲菩提。四事云何哉。衣食醫藥住。供養大菩提。爲得無量壽。供養



大善提。利樂諸衆生。不爲夢幻軀。受此供養具。不爲世間壽。役此供養心。若捨於四事。則身不堅牢。身不堅牢。故於苦生瞋恚。於樂生貪著。忘失菩提心。是故隨世緣。受於四供養。

讀大涅槃經聖行品

功德天與黑闇女。二者姊妹常同處。姊來七寶應念生。妹至貧敗相隨逐。益我在宅損在門。迎則俱來拒同去。生死福禍如是觀。惟大涅槃性常住。

讀法華經提婆達多品

佛昔聞法華。從提婆達多。昔爲善知識。今作佛怨家。佛昔爲王志修行。椎鐘告衆求大乘。阿私仙人應王請。爲敷妙法蓮華經。提婆害佛非一時。誰解前身卽阿私。法華授記當作佛。佛告海衆毋驚疑。佛現屢提教忍辱。不有提婆誰證之。是以經稱三世佛。皆有提婆達多相追隨。譬如他山石。與玉而爲師。大權示現非真實。鄙夫聞者應熙怡。

文殊宏化龍宮窟。龍女八歲卽成佛。以珠獻佛佛受珠。一獻一受時須臾。乃謂成佛速於此。智如身子猶驚瞿。女稱五障非法器。誰信頓登無上土。三僧祇劫苦難行。誰信須臾成大事。假使身子滿十方。盡思猶難窮佛智。比丘尼衆優婆夷。一例殊恩皆授記。一偈一句一香華。或小低頭通敬意。已種菩提最勝因。當來皆有佛名字。妙經妙法不可思。曠劫難聞難受持。髻中寶珠不輕賞。得者作佛無須疑。以此迴向生極樂。金臺上品光巍巍。

頌大方廣佛華嚴經

周智茂居士寄贈佛經多種於佛光社。中有華嚴一部。兩漬作餅。曬乾。因發願揭誦。頂禮讚歎華嚴真性海也。

華嚴四譯八十卷。文來不全義自徧。一乘圓頓諸經王。萬行莊嚴普賢願。口誦目觀緣不偶。不入其餘衆生手。假名菩薩耳不聞。二乘聖人眼如豆。我宿何福遇斯編。法雨淋漓作聖緣。因雨整經開寶藏。遂睹法界光無邊。莊嚴香花拜且誦。一卷一過心。

熙然聞所未聞見未見。如入寶海乘寶船。普賢毛孔何寥廓。善財窮劫難探索。彌勒彈開寶閣門。閣中復有千樓閣。一一彌勒寶閣中。一一善財隨參學。文殊手過百由旬。遙摩善財說法門。摩耶腹孕三世佛。不但今佛牟尼尊。腹中宏開七寶殿。十方菩薩來雲從。菩薩一步過大千。經行繞佛猶從容。此方佛生四月八。他方此日升獅座。或復是日般涅槃。或在天宮初說法。譬如淨月印澄江。千船各見東西發。釋尊卽是毘盧尊。十方各有毘盧宮。文殊普賢皆徧在。隨佛說法開羣蒙。十方諸佛來證法。所說字句經名同。卷終普賢十大願。開示橫超異方便。以茲十願大威神。導與彌陀親見面。既生極樂得神通。周往十方如掣電。舒光無量壽無邊。永與羣生爲正見。我本西方淨業人。得此初開廣大心。願迴一切入一土。更由一土通無垠。彌陀佛是毘盧佛。證我此語非狂吟。

誦華嚴讚淨土偈

誦華嚴經及彭際清居士華嚴念佛三昧論讚歎一多相入之旨意益忻然同向

極樂。極樂國土。不越華藏世界。阿彌陀佛。卽是毘盧遮那。故生極樂。卽徧參華藏莊嚴。見阿彌陀佛。卽徧覲十方諸佛。一多相卽。光光相融。無可疑也。是以善財童子五十三參。最後至普賢菩薩。教以十大願王。導歸極樂。面見彌陀。願修西方求上品生者。兼課華嚴。或全經。或一二品。以爲助行。亦願持華嚴修法界觀者。取徑極樂。念彌陀者。一切諸佛之所護念。則念一佛。等念一切諸佛。生極樂者。清旦之頃。徧供他方十萬億佛。則生西方。等生十方一切諸佛海。否則未離凡境。猶滯輪迴。全部華嚴境界。無我受用處也。滿益大師云。修淨土者。須究華嚴。究華嚴者。須修淨土。又云。淨土圓頓中之至圓頓。方便中之最方便也。永明師云。但得見彌陀。何愁不開悟。至哉斯言。幸勿失之。頌曰。

佛土方方淨。懷西意獨何。但生安養國。徧入法王家。悟徹無邊境。圓融互一多。彌陀一毛孔。攝盡刹塵沙。

極樂莊嚴海。彌陀徧照身。東西是方便。交互作慈親。六字寶中寶。一心真裏真。卽生

能取辦九品盡超塵。

願學唯識人。西方見彌勒。願修華嚴人。西方禮毘盧。願通三藏人。往聽彌陀說。願慕頓脫人。專修淨土禪。

一切法門無盡海。同會一法道場中。恆河沙佛廣長舌。說與行人不落空。

### 讀大佛頂首楞嚴經

佛勅羅睺羅。撞鐘。願語大衆聞之乎。大衆答曰。聞。既而聲滅。語衆聞之乎。大衆答曰。無。佛言。誤矣。知之乎。聲塵有生滅。聞性非有無。聞性若實。無彼鐘復擊。誰聞諸。聞性若實。無此聲。無時誰知。無聲爲客。聞爲主。惑聲以爲聞。猶誤客爲主。客來須去。主常住。客來俱來去。俱去。一切凡夫坐此誤。千生逐客入輪迴。四方上下無停所。那知主人身。依然居故土。爲問一行與一居。一身而二。何以故。行者之身名報身。因惑造業。業受苦。居者之身名法身。含容宇宙無新故。行者之身海一漚。居者之身如海水。海水湯湯焉可窮。一漚生滅能幾許。彼海是汝漚。非汝。離海更無漚。彼漚非汝。非非汝。

若歸見彌陀。許汝頓開悟。

讀大涅槃經

衆生福薄見真難。諸佛何嘗入涅槃。器漏無緣涵日影。天哀下泣况人衰。十方常住唯三寶。萬應伽陀此一斑。不說法聞常說法。許君隨在見金顏。

讀圓覺經回向極樂

僧祇劫夢苦難行。圓覺光嚴豈易成。幻見空華隨六道。本來成佛枉千生。移舟轉岸難爲定。濁浪滔天少獨清。不入蓮邦菩薩海。何從根本斷無明。

格物以格身爲本偈 又名攝六根偈

眼耳鼻舌身意是我六大弟子。從我五十三年。依舊癡頑放恣。罪我督教不嚴。不得尤他失職。他本可智可愚。亦復能勤能逸。作善作惡隨緣。從正從邪都易。不教則習荒嬉。便是長隨劫賊。劫我功德法財。窮墮三塗落魄。教則聽命真心。便是長隨助力。助我三業清修。直到西方淨域。還有法界多身。都與此身一脈。一身不能自救。多身

如何救得。汝眼莫被色盲。汝耳莫爲聲役。汝鼻當嗅無香。汝舌當味無獲。汝身當悟觸空。汝意當知法寂。知空卽是無常。無常卽是苦鄉。汝等終當散滅。何不早入道場。同念阿彌陀佛。同禮極樂蓮邦。成就主人功德。將來於汝有光。

持八關戒齋斷非時食一日夜

法身無飽飢。何勞爲飲食。假而吞大海。未嘗霑一滴。假而盡太倉。未嘗齒一粒。常住徧在身。不起食名字。食是短命因。老病增生死。食是夢幻心。緣於第八識。見分與相分。和合爲貪恣。何歟覺後身。未斷夢中事。無始積習然。頓悟須漸治。始覺非究竟。究竟覺乃至。淨食斷非時。穢食寧復思。以此懺宿業。饕餮成貪癡。皇皇求食心。長劫爲勞疲。構怨若淵海。積罪逾須彌。累哉此革囊。非彼誰爲之。我有法界身。焉用鴟夷皮。哀哀禽畜身。臭穢甘如飴。哀哀餓鬼身。耳不聞漿糜。哀哀阿鼻身。熱鐵填虛饑。因身以求食。因食苦如茲。徒勞覺世尊。不盡惛惛悲。持戒有微福。願助生蓮池。

藥看書癖

觀書眼告勞。返觀觀自性。一卷妙真如。十方大圓鏡。上有四聖傳。下與六凡聽。莫將文字求。一念環相應。

勸賑災傷

人心不善災劫多。救人便是救自家。但願安穩不遭劫。區區賑濟能幾何。今世何緣得窮餓。前世慳貪種此因。今世何緣得富有。皆爲前世布施人。富者布施後更富。貧者布施勝富人。多少不妨隨願力。要須共發大悲心。此是作福好機緣。勸君千萬莫錯過。勸君千萬莫錯過。更念南無阿彌陀。

須彌山歌

一小世界四天下。中有須彌承帝座。須彌山在香海中。香海金山繞七重。其半入海半出海。各有八萬四千高由旬。日月二曜山腰轉。更有四大天王宮。東王持國南增長。西王廣目北多聞。須彌四方四寶成。東金西銀北水晶。南洲人見瑠璃色。寶光映徹天爲青。三十三天忉利居。此天同在山巔住。四峯各有八天王。中央帝釋爲天主。



帝釋攝伏諸修羅。手執金剛降魔杵。普化宏開善法堂。寶光珠網相交午。欲色無色稱三界。色天十八無色四。忉利低居六欲天。二十八天才第二。此天最近恩最親。善惡悲歡常照臨。道號玉皇儒上帝。佛稱忉利名最真。南洲視之爲北極。實則中樞無頗側。日日戴天不知天。我今稱據如來言。佛言不信誰言然。

日天子歌

日輪旋轉須彌腰。自右而左昏復朝。我居須彌南瞻部。故見東旦西入暮。繞南晝午北夜中。須彌障卻人閉目。假有大力撤須彌。長夜不勞燈與燭。東西漸遠若漸低。入地出地空猜疑。實則平旋無下上。肉眼阿誰能辨知。日有火珠熱力強。能使大地同輝光。能長羣生助羣動。消寒破闇功難量。劫初大地黑暗時。佛語菩薩誰福之。觀音示現幻三昧。化作人間日天子。娑婆百億須彌山。百億日輪從此始。日天子宮七寶裝。寶寶異色生光芒。不信瞪觀西日落。紅黃白綠殊輝煌。想見如來白毫相。普照大地諸山王。修羅伸手能障日。世人相驚以日食。豈知日體故依然。但是愚人迷不識。

月天子歌

三八

月面向閻浮。此方見滿。彼見半。月面背閻浮。此方見半。彼見滿。月食非真食。修羅伸手障光芒。月光自有光。不是餘光分太陽。月有水珠光清涼。不似日光偏熱煬。離火爲日坎水月。伏羲易義真皇皇。方諸取水攝月氣。古人有法能推詳。月中天子七寶殿。聞法嘗開佛道場。大千世界百億月。隨日旋繞須彌王。月中居者何恢廣。人間遠見徑尺光。肉眼幻妄非真常。吳剛伐桂。嫦娥搗藥。稗官傳說尤荒唐。

讀楞伽經制斷肉章作懺悔吟

世間惡業食肉最。習慣不復深思量。我與衆生皆肉類。何故同類自摧戕。若慕牛力大。牛食草爲糧。若慕豬體肥。豬食草與糠。請觀牛與豕。不因食肉強。若慕肉味美。何不自割嘗。自割知痛苦。割他意揚揚。試問此何心。寧非人虎狼。人知屠者虎。不知食者狼。世無食肉者。屠門不開張。譬如買賣人。合夥而爲商。有罪與無罪。不必問閻王。顏子簞食不茹葷。孔子疏食菜羹湯。肉食者鄙。疏食聖。肉氣助發癡與狂。芹藻致祭

取芳潔。何用腥穢陳牛羊。祭天天厭之。祭聖聖悲愴。豈有天與聖。以殺爲美腥爲香。世人只貪肉味好。不知埋伏刀與槍。一拳一罵無不報。何況食肉剗心腸。只以強弱勢不敵。懷此怨恨終不忘。今世弱肉強者食。來世我弱他強梁。借肉還肉固應爾。刀兵慘劫尤可傷。怨怨相報何時已。皆因口腹生災殃。况復衆生互輪轉。嘗爲親友或爺娘。改頭換面認不得。忍付烹煮和椒薑。此如梟鏡食父母。史記。孝武本紀。祠黃帝。用一梟破鏡。孟康云。梟鳥名。食母。破鏡。獸名。食父。黃帝欲絕其類。故百祀皆用之。破鏡似貓而虎眼。其罪過於虎與狼。念此護生斷肉食。大孝炯炯同三光。發菩提芽此爲本。到清淨岸此爲航。我從無始來。積罪不可量。賴我救世尊。療我食肉盲。願此懺悔吟。哀意動十方。一洗腥臊氣。吐納咸芬芳。不離箸席間。坐致時雍康。同消積世怨。同出輪迴忙。斷殺且念佛。歸哉極樂邦。

### 讀圓覺經

衆生當體卽無生。四大爲緣幻合成。地水火風分散盡。妄身何處立空名。我既空時人亦爾。自他分限漫須爭。空空相遇誰能別。覷面何勞問姓名。

四大爲根接六塵。塵緣影相假名心。塵銷影滅心安在。不見虛空有主人。  
千生心相誰能憶。六道悲歡已健忘。幻滅幻生休妄認。本來不動是真常。  
知幻便離離便盡。上根我未見斯人。擔麻五濁徒紛擾。一句彌陀是得金。

性海歌

世間大地如扁舟。大海之中一葉浮。大地無海無涓滴。誰知涓滴海之流。掘地及泉  
皆是海。世人聞此多驚餒。此理深深玄復玄。括盡從來聖者言。性海洋洋不可侔。無  
盡邊涯無盡求。一念妄動從之起。比如大海呈一漚。念念妄動無時已。如漚起滅無  
時休。漚清漚濁隨塵緣。如人習染非本然。澄清塵土如學力。戒力定力爲中堅。戒則  
不攪定則靜。慧光融照涵無邊。到此乃知本然海。淨如圓鏡周大千。衆生大地等漚  
耳。背海則局歸則圓。欲觀此海盡此性。稽首拜問天中天。華嚴楞嚴皆寶海。六字徑  
渡彌陀船。

勸靜坐觀心人誦大乘修淨土偈

萬法唯是一心。心明一了百了。諸經皆我注腳。注腳正不可少。任是天縱之才。此心難讀難解。愚夫愚婦與知聖人有所不曉。不聞大乘諸經。勿謂已明心要。華嚴圓覺楞嚴法華涅槃皆妙。如游寶海寶山。一一皆非心外。還須生到蓮邦。親證如來境界。三身四智六通。一念光明徧照。乃知萬法一心。湛寂圓明廣大。

### 心讚

孰萬物母。孰天地先。不生不滅。無量無邊。無過現未。無時月年。無思無爲。無有語言。寂然不動。感而遂通。無有近遠。南北西東。體無不在。物無不容。視之卽見。而人不見。聽之卽聞。而人不聞。目得之明。耳得之聰。鳥得之飛。木得之蔥。其凝爲地。其潤爲水。其燥爲火。其動爲風。昭爲日月。細爲蠓蠓。飛潛變化。神乎其龍。略分十界。廣說無窮。六度萬行。具足其中。老謂之玄。又謂之真。孔謂之易。又謂之仁。我佛實語。直指曰心。心有三大。曰體相用。體唯一真。相具萬有。用則萬能。無乎不究。心有三德。曰常圓通。常則無斷。圓則無偏。通則無隔。互徧互融。心有三觀。曰空假中。空不滯假。假不滯空。

空假雙照。是觀爲中。如是三觀。無所偏執。水月鏡花。隨緣現示。碎鏡求花。撥水捉月。是謂凡愚。誤假爲實。六道輪回。其迷坐是。澄水拒月。拂鏡去花。佛所呵斥。敗種焦芽。是謂偏空。是謂羅漢。但求自度。不願度他。無鏡何花。無水何月。唯是一心。自他無別。發同體悲。秉四宏誓。徧入塵沙。爲世舟楫。空假中三。一心照徹。悲智雙修。是菩薩慧。如是心印。諸佛同宣。堯授之舜。舜授之禹。精一執中。其旨亦然。西竺東震。祖祖相傳。南嶽天台。乃著鴻篇。大乘止觀。摩訶止觀。先後推演。累千萬言。覓心之士。當於是焉。五濁娑婆。澄心非易。道弱魔強。楚衆齊一。未出輪回。暫明還失。阿彌陀佛。作大利益。寶土蓮池。衆聖所集。無有諸苦。不聞惡字。自然精進。竟補佛位。信願往生。但持佛名。一心不亂。九品華榮。得生佛國。得聞佛乘。乃證此心。無滅無生。在凡不滅。在聖不增。具文殊智。修普賢行。分身塵刹。徧度有情。乃證此心。圓滿光明。如十五日。爲世間燈。

讀楞嚴經第六卷回向極樂偈

反觀觀自性。自性無邊涯。光明照十方。是卽阿彌陀。反聞聞自性。自性無聲譁。禽

樹演法音。是卽阿彌陀。反嗅嗅自性。自性如蓮華。無量香莊嚴。是卽阿彌陀。反嘗嘗自性。自性悅禪那。應念法味生。是卽阿彌陀。反身求自性。自性不可磨。白毫無量身。是卽阿彌陀。反意念自性。自性無風波。念佛念法僧。是卽阿彌陀。

明紫柏大師云。毘舍浮佛四句偈。三藏十二部之總攝也。若能誦千萬遍。則生死之根。不待拔而自斷矣。偈曰。假借四大以爲身。心本無生因境有。前境若無心。亦無罪福如幻起。亦滅。頌以釋之用勸持者。

堅者皆是地。溼者皆是水。煖者皆是火。動者皆是風。此四徧世間。故稱爲四大。我身及萬物。皆此四大成。四緣合爲生。四緣離爲滅。緣生固無生。緣滅亦假滅。凡夫不識假。妄認爲自身。骨肉是地大。血液是水大。煖氣是火大。動轉是風大。身爲內四大。聚作一皮囊。風日與山河。是爲外四大。內外性則一。離合更無常。外四若不存。內四亦何有。自有謂之真。借來謂之假。以借必須還。如客來須去。喫飯與蔬果。皆是借地大。茶湯是借水。熱食是借火。呼吸與運動。皆爲是借風。納入是謂借。輸出是謂還。輸穢

而納新旋生復旋滅。如是歷數日。身已非前身。試問主人翁。何身爲我有。四大若離別。更安覓我身。當知是客塵。不得爲真我。

上釋假借四大以爲身

何者爲真我。當知是本心。不生復不滅。無量亦無邊。比如淨明鏡。中空無一物。以鏡體明故。徧照於六塵。或是色聲香。或是味觸法。一一諸塵境。影現於鏡中。影現固無常。忽生而忽滅。愚人迷此影。認作本來心。不知念念心。皆是外緣境。本鏡原不動。本心亦如之。境順起貪求。境逆生瞋恚。貪瞋癡妄動。身口意隨之。以茲三業因。夢受輪回果。升沈生六道。皆爲境所牽。長劫生死勞。不悟本心故。

上釋心本無生因境有

種種虛妄心。皆因虛妄境。現前虛妄境。皆是因緣生。緣生固無生。虛妄而爲有。比如人愛色。色是四大成。地水與火風。幻成此色相。爲是愛地耶。地是骨肉筋。腑臟及垢膩。爲是愛水耶。水是精血膿。涕唾及便溺。爲是愛火風耶。火風無實相。幻化同虛空。外現誑惑姿。內藏諸穢惡。拆觀穢惡境。貪愛從何生。比如人愛聲。聲亦緣生相。如以桴擊鼓。桴桴而有聲。爲從鼓皮生。爲從此桴出。若從鼓皮生。無桴何不響。若從此桴出。



無手何不鳴。若從人手出。無鼓不聞聲。當知此音聲。緣合無自性。香味與觸法。虛妄亦如之。六塵境虛妄。四蘊心亦空。所受既非真。能受亦非實。所想既非真。能想亦非實。所行既非真。能行亦非實。所識既非真。能識亦非實。此四是幻現。似有而實無。如彼鏡中影。境過不可得。如彼夢中寶。醒時不可求。上釋前境若無心亦無

因果雖不虛。罪福實如幻。罪苦與福樂。亦是因緣生。虛妄所構成。無自性可得。如世巧幻師。幻出諸奇詭。雖起亦如滅。雖有亦如無。若是智慧人。照破緣生夢。如以炬照闇。積闇一時消。如以日照霜。日烈霜烏有。上釋罪福如幻起亦滅

毘舍浮如來。傳此四句偈。誦之千萬遍。重障自消除。歷劫生死根。不拔而自斷。更仗佛願力。接引生蓮邦。當證本來心。常住而徧在。分身徧塵刹。普覺諸迷蒙。

### 三 融通

論語及孟子。記孔子自述學而不厭。誨人不倦。凡三見。此與華嚴經。普賢行願品。十大願王之常隨佛學。恆順衆生。二願相應。普賢十願。願願皆盡未來劫。

無有疲厭。學者熟復此品。然後知聖所以聖。佛所以佛。皆此願成之也。若以數十年眼光測之。淺之爲丈夫矣。偈以讚之。

願獸盡爲獅子。願鳥皆作迦陵音。願人人成無上士。願世徧布閻浮金。此願迢哉。有到日。但盡未來爲一心。發憤不知老將至。常樂不與憂爲鄰。我學不厭誨不倦。聖人自許非欺人。第一破我莫須有。論語何有於我哉。此爲正釋。第二破人如浮雲。百鄙夫問於我。空。空如也。此爲

正釋。上空空我。下空空人。人性空。非一非異。故云如也。

無我無生壽無量。無人光燭無邊垠。二相不立四相掃。

衆生壽者俱非真。正使千紅門萬紫。當體不動誰爲春。以此無生證不滅。萬劫不老。

金剛身。試粟金剛讀魯論。兩眼方與尼山親。固知尼山普賢願。承佛導世光人倫。杏壇莘莘會未散。修德講學直到今。許重鄭康成。周深程明道。速王陽李二。門堂室奧隨參尋。各占一科分坐席。皆聞警歎瞻威神。邇來舟車達歐美。亦慕東國文彬彬。秦皇毒火豈能燼。永與日月爲照臨。隱顯不同種不斷。若無聖者將無民。世人尊孔無正眼。知我其天子嘗云。

漢益大師大學直指頌

自有此經。未有此注。格物致知。全經要處。破我法執。修二空觀。於一切物。作唯心看。身爲物本。格之所先。家國天下。乃其末焉。本碩末榮。一氣之宣。惟明明德。攝無不圓。晦翁未解。更爲補傳。錯亂古經。大義不顯。旭師妙悟。直指真詮。孔聖復起。當無閒然。勸哉來學。熟復斯篇。如是修者。是真聖賢。家齊國治。天下便便。便便。即平。

觀心偈釋大學格物致知爲修齊治平之本

吾聞華嚴偈。心如工畫師。世間與萬有。皆由心畫之。畫卽心之相。心卽畫之師。或偉如天人。或細如蝟飛。土木與金石。皆是心之爲。此言至真實。聞者多驚疑。晉有道士師。證此非神奇。聚石爲徒侶。開示佛正知。石聞皆點頭。如人夢覺時。石若非心者。那得通聞思。至今虎邱麓。遺石猶纍纍。鬱鬱含羞草。偶觸卽垂披。欣欣向日葵。朝暮東西移。翠竹真如影。黃花般若姿。自心觀自心。境與心非離。所食心爲食。所衣心爲衣。所住心爲宇。所行心爲依。物我苟不隔。聞之當解頤。世間何對相。著我貪瞋癡。家國

與天下心一而名歧。要知世治亂。卽我心安危。是以聖哲人。拔苦垂深悲。人溺卽己溺。人飢卽己飢。利濟及一切。而不名布施。衆生自心夢。五濁自心疵。願言法界心。普現金蓮池。

說易偈

易義諸經海。四聖所集成。伏羲始畫卦。文周爲之經。孔聖作十翼。妙義尤敷榮。易無思無爲。寂然不動稱。不動故不易。易體非有形。此是大圓覺。湛寂無能名。變易與交。易相用俱未萌。有感而遂通。太極始有徵。無極是真如。太極是無明。以因照生所。所立照不覺。不變而隨緣。無生現有生。兩儀與四象。八卦隨崢嶸。六十四卦爻。萬變紛然興。吉凶惑其心。業果牽其情。是以四聖人。悲愍諸迷冥。畫象繫之辭。光照如明星。日月字爲易。義取照均平。三細六粗相。吾聞諸馬鳴。以茲闡易義。異唱而同聲。太極阿梨耶。業識含染清。乾元萬物始。此是見分精。坤元屬相分。萬物資爲型。太極生兩儀。此卽三細并。四象屬智相。分別生妄能。八卦相續相。父母而弟兄。男女長中少。世

界長孽。姓夢幻。有吉凶。執取與計名。因有造業相。穢淨分途行。因有受報相。繫縛隨重輕。此名六粗相。曲盡世閒情。升沈極萬變。難脫輪迴坑。欲求出世易。當誦佛大乘。廣大最華嚴。微密佛頂經。萬象所由象。含靈所由靈。一切不思議。掌上紋縱橫。無邊圓覺海。坐看一漚生。

老子言。天地不仁。以萬物爲芻狗。觀佛氏一切自因自果之說。而知此言天地不以仁自居。順萬物之生滅而生滅之也。詩以解之。

萬物自芻狗。天地曾無心。天地况芻狗。壞劫經沙塵。豈能芻狗物。物物自緣因。此毀而彼成。幻忽爲新陳。實亦無生滅。譬如今昨人。我從輪轉來。積骨逾山岑。芻狗復芻狗。尙此蜉蝣身。專由想念牽。坐致生死類。俛仰愧天地。負彼蒼蒼仁。眷言西方佛。垂手青蓮津。教我信願行。示我夙誓懃。吾有不亡存。結侶香光鄰。長揖謝芻狗。息駕歸吾真。

### 勉學

仲尼焉不學而亦無常師。善者吾從也。不善而改之。普賢十願王。諸佛之根基。四聖及六凡。無爲與有爲。隨喜諸功德。不以一毛遺。斯願等於海。衆流相與期。海爲百谷王。以能下自持。老子故尙柔。知雄守其雌。巍巍三聖人。自牧乃甚卑。不自聖故聖。自聖斯愚癡。今我何人哉。而不日孳孳。未得尊所聞。聞已審所思。思已篤所修。萬行如是治。

夢中作句如誦故書醒而忘之乃記其一因足成之題曰勸讀

讀書譬種胸中竹。夢中句瀟灑自然無世俗。無書則有茅塞之。或長荆榛多刺觸。儒書譬然心中燈。日沒猶能照夜行。無佛出世苦暗塞。菩薩應現爲明星。羲軒堯舜逮周孔。一一殊勝普賢行。佛書譬鑿心中泉。其委成海來源源。魚龍曼衍寶充斥。性海一勺皆無邊。世人不讀誇六祖。一聞金剛卽解悟。此爲學海再來人。前生於書無不讀。

南京孟芳圖書館開幕祝詞

圖書萬千。其品紛複。有沙有金。有珠有璞。有天有魔。有昏有燭。有響有狼。有鳴有鵠。有蔓有材。有泉有瀆。有詭有常。有白有辱。有粲有糠。有稗有穀。有徑有衢。有海有谷。現之一心。成之億軸。能潛百災。能憂萬族。衷於聖言。擇之慧目。孔以奠倫。老以清濁。同歸佛海。以消三毒。貪 瞋 癡不朽之芳。無疆之福。

宿務中華學校祝辭

乾竺震旦。教學宗祖。曰佛孔老。實光斯土。如日麗天。如頭有目。使民中正。使民親睦。如人一身。手足環顧。如人一家。父子慈護。十界四生。歡然一族。以潛大暴。以弭大災。如毛火炎。如雪湯沃。世變萬千。道無朝暮。是謂常新。經劫如故。何物謬民。錯解維新。抉根伐株。祈葉藜藜。以爭爲平。以掠爲均。非經非法。非孝非親。自用則蹶。播之毒人。人禍天災。未知其根。宿務商市。隸非律賓。華族來者。既殖且殷。釀貲興學。徒衆莘莘。拓地構舍。巍若連雲。徵文祖國。布之僑人。我有祝願。願植善因。智仁勇三。誠爲中心。佛法僧三。善爲珠金。善人之多。國步駢駢。願我華校。爲世南鍼。

大錯箴一

咄哉歐化。來日大難。爭以爲海。新以爲濶。爭者迭仆。新亦迭翻。辦之太費。行之太煩。太費速窮。太煩速死。速窮且死。而進不止。如是政教。不如已矣。

周雖舊邦。其命維新。國所爲命。人所以人。萬劫不變。曰維真心。以其無舊。故謂常新。衆利在讓。大勇在仁。儉以永用。靜以寧神。簡則易能。約則葆真。我佛孔老。大義同伸。後聖不易。而况於今。

淺夫錯解。謂新爲異。生滅妄心。而爲常識。非聖非經。非仁非義。非簡非靜。非儉非質。務怪矜奇。不可究詰。曰費曰煩。由斯而失。若駕追風。而趨險地。趨險弗卹。其蔽在爭。不謂窮死。謂爭而生。聚五洲鐵鑄。此錯成。速窮以死。大效旣明。不憚不悔。亂豈有寧。政不足議。人不足譏。敢爲此箴。格心之非。

大錯箴二

家未成。敗已徵。國未治。亂已萌。三餐已一。無成。人之生。順天地。勤則生。不則匱。古教



人身出力。利人已。皆功德。徒口說。學之賊。恥無實。而取名。吾過矣。戒後生。孔少賤。鄙事能。舜居山野。人形。居木石。遊鹿豕。與萬物爲一體。傅版築。管糞鹽。漢學者。猶力田。惟自立。乃高尚。嚴子陵。最清望。帝故人。不倚傍。畊富春。何蕩蕩。惟自立。乃能廉。諸葛氏。稱時賢。耕南陽。將終焉。受三顧。乃著鞭。家成都有桑田。居將相。不蓄錢。

資生業。佛不廢。既受生。有生事。惟比丘。絕儲峙。受供養。稱乞士。譬在官。舍耒耜。示不貪。匪教逸。農工商。不讀書。家雖富。困於愚。專讀書。不農工。學雖富。困於窮。古學校。教篤行。事父母。養且耕。有餘力。以學經。經通一。用不窮。應於事。簡而豐。今教人。尙文飾。但開花。無材實。經且荒。行蔑矣。世大亂。由茲起。爲此懼。述此箴。庶改之後之人。

### 讀憨山大師道德經解

老子出函谷。西行至流沙。豈聞無上法。欲禮佛陀耶。惚兮若有物。冥兮若有精。天地倚爲根。衆妙資爲靈。未離八識窟。尙有三界情。將毋菩薩地。俯接芸芸生。東遊遣迦葉。吾聞世界經。世界經。佛言。吾遣迦葉。著論。往震旦遊化。是爲老聃。

圓成實依他起。徧計執三自性。卽一性論與多性論之殊。偈以表之。

圓成一切物。其實是一性。是謂圓成實。此一依一切種種諸他緣。而起諸異相。是謂依他起。徧計諸異相。執謂有多性。是爲徧計執。外道與凡夫。皆執多性論。不知依緣生。各各無自性。而此一性論。非佛莫能知。是故華嚴說。心如工畫師。能畫諸世間。五蘊悉從生。無法而不造。是故楞嚴說。世界與山河。皆是心中物。皆是妙真如。隨諸衆生心。應諸所知量。循業而發現。是故中庸說。至誠盡其性。人性與物性。一盡無不盡。此卽一性論。其說與佛同。佛說圓以詳。儒說簡而隱。若不通於佛。儒亦不可通。由佛以通儒。勢如破竹易。由儒而入佛。勢若上灘難。普願教學人。明此難易勢。事半古之人。而功必倍之。

兒童讀經喻

譬如秋刈穀。當春已種之。春種若不豫。秋收安可期。兒童讀聖經。其意亦如茲。種因與穫果。先後常參差。若謂經義奧。此非兒所知。豈知記憶力。全在童蒙時。長大苦健

忘讀誦空勞疲。此如秋種穀。霜至徒嗟咨。兒時不讀經。負此青春姿。廢經不許讀。誤盡寧馨兒。此如罷耕稼。而以求無饑。焉能食野草。效彼牛羊爲。穀食增智慧。草食增愚癡。棄經從雜學。譬食草爲糜。獸性日以長。人道斯陵夷。經正則民興。此語烏可移。秦政廢經籍。徒爲後世嗤。願持農者語。敢告文衡司。

### 教兒童識字讀書兼習職業韻語

教兒識字。約分三事。認字寫字。更須解字。識字之法。方紙單字。前後抽換。令其辨記。勿用字簿。集字爲句。滑口讀過。識如未識。解字之法。文語互明。先通語意。後通文義。後講形聲。須有次第。寫字之法。楷篆夾書。篆知形本。楷適用途。說文部首。形簡易摹。習之既熟。乃及其餘。教兒讀書。約分四途。讀書背書。解書溫書。讀書之法。要記徧數。一句一句。字字清楚。背書之法。要待口熟。字句未明。令其再讀。解書之法。要令回解。其口了然。其心自了。溫書之法。亦須背誦。亦須講解。反復考問。溫習既熟。如樹根生。其後花果。自爾敷榮。讀書不熟。如樹根枯。欲求花果。安可得乎。大凡讀書。首重識字。

識字既多。讀書易易。文字蒙求。課兒必備。欲通說文。由此而入。六書之要。曰形。曰聲。象形。指事。及與會意。是三類者。取用在形。諧聲一類。半形半聲。轉注假借。取用在聲。辨形以目。辨聲以口。形可書傳。聲須口授。齟舌齒唇。爲聲之根。天然聲母。妙奪化工。一陰一陽。自然合分。古言今語。會此皆通。紛紜轉變。其軌則同。喉音一部。爲韻之根。開口齊齒。合口撮口。四等變化。一音之分。開口爲張。齊齒爲真。合口爲宗。撮口爲租。實一音耳。而分四呼。古今韻部。分合以殊。紛紛考證。勞諸老儒。倘知此義。復何疑乎。平上去入。舊分四聲。不如六轉。清濁分明。東同二轉。清平濁平。董清動濁。是謂上聲。凍洞爲去。洞濁凍清。一清一濁。相間而成。所謂入聲。實皆濁去。以篤入東。舊傳之誤。聲雖同根。韻非同類。如呂紹羸。非其本族。文字形聲。大旨既明。反切訓詁。由此皆精。以此讀書。如暖銷冰。童時不習。白首冥冥。醒世詩歌。兒童歡喜。亦莊亦諧。亦文亦俚。順口悅心。達情顯理。淨土諸詩。尤爲超逸。緩節雅歌。調其和氣。向善之心。悠然興起。童而熟之。至老不廢。妄言綺語。醉歌淫辭。此皆惡習。勿令讀之。教兒讀書。先讀佛書。

三世因果。深信不虛。六道輪迴。善惡分途。反復告誡。以正其初。三歸五戒。入道權輿。蔬食念佛。尤爲寶珠。淨土妙法。徹始徹終。阿彌陀經。邁世奇文。下濟衆苦。上報四恩。出凡入聖。唯一之門。觀音淨聖。此土緣深。三十二應。現種種身。常持聖號。獲免災侵。地藏功德。文殊淨行。普賢行願。此皆大乘。皆當讀誦。以爲助行。聖凡十界。唯是一心。性則平等。修則殊倫。善惡淨染。爲四大因。無因不果。無果非因。得離苦海。不枉爲人。更當發願。普救沈淪。此爲盡性。此謂至仁。由佛通儒。其勢易爲。既明大本。不涉支離。事半古人。功必倍之。教讀儒書。四書必讀。四書果通。餘如破竹。大學一篇。條理尤具。古本完全。不勞添補。蕩益直指。尤爲精注。家國天下。其本在身。各務修身。勿務責人。齊家治國。此爲南鍼。是明明德。是爲親民。致知格物。不離自身。一身果修。化及多身。孟子論世。尤切於今。戰國並立。爭鬥紛紜。孰能一之。不嗜殺人。信哉此論。無敵唯仁。其餘諸經。通一已足。漢唐及明。大抵專讀。多讀不通。不如一熟。諸經精要。亦可選讀。老子之要在道德經。寶慈寶儉。尤寶不爭。莊子內篇。佛老門庭。黃老致治。漢有明徵。

文景之世。國儉民亨。三十稅一。於古未曾。不在多言。而在力行。清靜自正。儒學之精。爲政以德。孔老一型。章句之士。豈云通經。歷代史書。豈能徧覽。惡行繁文。無須著眼。明王賢輔。循吏大儒。言可爲法。行可爲模。民生要政。具諸志書。擇要讀之。勿涉繁蕪。歷代明王。多知崇佛。譯經講經。尊師重道。月齋十齋。禁斷屠宰。放生之池。徧於海內。去殺勝殘。爲民良導。自漢至明。皆有可述。儒家修史。多從刪黜。貽誤後人。不聞大道。佛祖統紀。高僧諸傳。宏哉佛門。聖賢之藪。皆當探觀。補史不逮。若學爲文。述其所知。其所不知。妄語奚爲。是謂欺人。是爲自欺。其於聖道。相去遠而。讀書既通。文自流溢。本立道生。理明辭輯。文卽不工。能知大義。明理篤行。可爲良士。今之教者。逐末遺根。字且未識。課讀諄諄。讀書未多。遽教作文。欲速不達。終覺昏蒙。六書不解。聖典無聞。嗟哉古籍。等於然焚。聚蒙爲國。何以圖存。世有賢達。重振斯文。孔聖有訓。餘力學文。終日坐讀。致亂之根。民各有生。不生胡存。四爲工商。其六當農。其賢其能。司教辦公。古以爲治。漢尙此風。灑掃作務。當始兒童。三區中國。一在邊封。上腴遼瀋。次則藏蒙。

地荒人少。困乏交通。棄財於地。而苦國窮。窮而相奪。何補於豐。願興墾政。願息爭戎。萬目一的努力相從。校以課學。府以課工。教育實業。相助爲功。羣邊擴產。息亂銷癘。願言此獻。普告司聰。

莊子云。覺而後知此其夢也。且有覺而後知此其大夢也。述此意爲釋夢偈。閒居不出戶。夜夢疲津梁。吁嗟行役苦。醒知身在牀。夢覺何不同。動靜何乖方。孰真孰爲幻。世智難推詳。夢亦有所見。而眼閉不揚。夢亦有所聞。而耳堵若牆。夢亦有所嗅。而鼻不知香。夢亦飲與食。而此舌未嘗。夢亦行且舞。而此身如僵。夢亦有意識。善惡能分張。夢亦有末那。我人相未忘。乃知五六七。皆在八中藏。八識如大田。一切種之娘。識八性則一。千燈共一光。一轉一切轉。意識王中王。夢時意不周。醒時意較詳。修時意作聖。蕩時意作狂。夢者淨色根。虛空任游翔。臥者浮塵根。頑然一革囊。鑄此革囊者。四大爲枇糠。地水與火風。離合爲存亡。革囊循業變。六道紛無常。如人歷冬夏。裘葛隨炎涼。偉衣爲龍象。窄服爲蜣螂。天人美好飾。畜鬼塵汗裝。哀哀阿鼻獄。膿

血爲衣裳。主人固無恙。著脫輪回忙。皆是夢中事。歌泣空懽惶。夢時所夢短。醒時所夢長。醒夢等爲夢。未出無明房。死生億萬劫。長夜殊未央。勞哉大覺尊。垂手悲其旁。覺此酣眠客。同歸不夜邦。

四 讚頌

先曾祖諱國銀公像讚

公字劍華。號鏐浦。賦性剛毅。治家勤儉而嚴。正直無私。見義勇爲。光緒壬午。載邑志義行傳。嘗捐鉅金。獨修永思宗祠後堂。遺命建贊義祠。祀支祖以下諸先靈。置義豐倉田。以備賑。及宏濟橋前溪渡。皆有輸助。邨人三十同年。燈節費鉅。捐田四十畝。爲長庚會助之。光緒興學。詔下。乃移辦族學。教育邨人子弟。至今賴焉。性尤孝友。弟國銳。夫婦早逝。爲立嗣婚教。置田贍其家。公始創商業於崇明。迄今百餘年矣。曾孫謙稽首拜讚曰。

嚴威之度。載之以仁。惟厚克久。子孫繩繩。法公行義。法公儉勤。毋忘旃哉。詔後之人。



己巳春續題

創業吾曾祖。勤儉有威儀。十八始服商。崇明海東坻。貿易兼烹飪。濯凍寒鵞肌。別燈置一芯。主者顏熙怡。謂能勤小物。庶幾大有爲。積儲自樹立。乃勸艱難基。東肆鬻京貨。西肆鬻典衣。戚弟東畬翁。承教左右之。洪楊肆烈燄。孽產遭陵夷。託孤賴詹翁。挹彼東海涓。衣食百餘年。本源皆在茲。惟公福德故。義行猶口碑。長興遺義田。今作教育資。莘莘諸學子。賴公知書詩。觀書宴坐圖。拜見公須眉。讚歎付後來。綿此深長思。祝公不朽靈。西邁生蓮池。長侍如來會。終成正徧知。

報恩學林開山祝詞

中華民國九年三月十八日。雲灣山民江謙等。謹昭告皇天后土之靈。伏以山民大利。莫過農林。教育所資。首需實業。本生財之道。植學校之林。爲登高之呼。期衆山之應。伏冀山靈之默佑。庶幾百穀之用成。莘莘學子。皆帶經而鋤。濯濯童山。啓無窮之藏。師老氏之尚樸。錦繡被于山河。法管氏之理財。衣食生夫禮義。山山有木。心心有

佛。人人務本。各各報恩。七寶莊嚴國土。本彌陀願力所成。衆生整頓娑婆。卽淨土資糧之助。敢揭忠忱。惟神洞鑑。

讀先考晴舟府君

父耶乘願垂形者。觀音成道好日生。小築山房種柳竹。卽題柳竹爲之名。七十五載不更住。祇今柳竹雙青青。種樹爲邀羣鳥棲。鑿池爲買羣魚放。贖生不惜多與錢。等視禽魚兒一樣。禽棲十年不肯遷。魚游入河去復旋。信知中孚感及物。人或負恩不如物。父兮生時不見父。老矣終身猶孺慕。敬恭嗟歎若聖神。曲意歡顏承節母。父兮慈悲徹底深。施捨不擇敝與珍。平生得食不獨享。僮僕寒遠歡相親。誠遇兒稚如成人。教之靜坐談古今。儀觀粹然莊以仁。有言有動皆天真。梗者爲柔浮者沈。不用夏楚收威神。自言十八赴杭試。舟行泊市羣兒集。果蔬餅餌爭鬻錢。一一買之施同船。爲憐貧家饑父母。待兒得錢才果腹。讀書數載城隍山。口熟故史如瀾翻。眼底湖光盪塵翳。胸中賢聖相往還。爲兒常稱范文正。斷齏畫粥貧非病。文足經邦武懾邊。下

起湘鄉曾文正。范公曾公八百年。日光月光相望然。兒駑不堪承父言。書與後賢期。勉旃。學通周孔貫佛老。世出世間非二道。管手龍舒淨土文。謂此一編大事了。安詳捨報稱考終。况助佛號聲彌空。想知淨國金池裏。行住坐臥蓮華宮。平生瓣香觀自在。今作法侶長參從。未報如天覆育恩。心銘頂戴憶何窮。願爺終作黃金父。永劫相依轉法輪。

乙丑十月哭父晴舟府君

天傾西北日。歲入涸陰時。哀至淚如雨。驚看雪滿衣。大事聲聲佛。西方處處金。寶蓮華裏坐。證徹涅槃身。

奉懷海藏樓鄭太夷先生

豪邁今推海藏樓。裁詩作字亦風流。自言平生寡思索。筆如驟雨從空落。滂沱一瀉溝壑盈。雨霽天青無所作。不飢不食倦不眠。一覺輒起無貪沾。樓頭朝朝賓日出。此時萬景爭新鮮。故知先生足朝氣。七十年如三十然。先生家學傳孟子。嘗坐春風聞

舉似爲言舜之居深山。居伍木石。友鹿豕。聞善決若江河趨。不舍晝夜。誰能止。飯糗茹草。足終身。衿衣鼓琴。亦閒塵。貧賤豈妨心。富有富貴。寧足遷吾心。聖人樂善履天下。孟氏語妙傳其神。先生讚佛語且新。論理無過經驗真。孔子七十老八百。佛是窮劫經驗人。嘗讀華嚴未終卷。他時終此當驚羨。先生寶樓海藏寬。不假此經終不現。此經抉盡聖賢心。盡劫未來無厭倦。卷終取徑極樂邦。尤示佛陀異方便。先生善柔貌虎師。謂如保母調嬰兒。曩被朝音正南服。我來無匪咸披靡。軍行覓戰不可得。但散錢穀療民饑。世有此才不愛惜。坐令賣字當耕役。臥龍不濟旱蟲蟲。直是衆生無福德。我詩悲天會有窮。不爲先生三歎息。

婺源羅谷故廩生潘梅生先生德配節孝王孺人相夫致孝苦節事佛數十年  
以終江謙聞之於其門生朱軒閔稽首讚曰

三世諸佛以苦爲師。霜憎柏榮。苦實相之懿。彼孺人節行巖巖。世遇雖瘁。道芽日滋。背塵向覺。決生蓮池。彌陀慈父。垂手金墀。

聞友含章捨報生西。條焉十月。法身無滅。不可謂亡。極樂永生。復何云悼。寫詠  
衷臆。題爲懷西云爾。

子歸西方。我猶東方。譬彼日月。東西相望。孰云其遠。光光相融。我心覲止。無礙於  
空。日居月諸。天則一室。曾是不思。而謂遠別。冽彼金池。粲彼寶華。溫溫恭人。汝  
游汝歌。汝游吾與。汝歌吾答。我聞慈父。爲汝說法。聞法音已。而悟無生。無生曷  
滅。無滅常生。日月耿耿。彼昏則冥。意子復來。牖彼含靈。

釋迦牟尼佛誕生聖像讚

四月八日。誕生大慈。十方之父。天人之師。我與衆生。背覺隨迷。萬劫不遇。而今見之。  
歡喜讚歎。念茲在茲。

慕真禪師聖誕頌

良月吉日。誕生真人。如山之高。如月之新。爲唐國師。爲佛化身。四十五年。乃空於塵。  
公去非去。真亦非真。虛空徧在。爲公之體。日月燦爛。公之精神。懷而慕思。傳之其人。

懿維我祖公之德鄰。賴公卜葬。衍世誥誥。瞻拜供養。區區之心。公尙饗之。福彼無垠。

讀蕭梁武帝本紀

皇帝爲菩薩。千秋盛有梁。開經傾萬耳。平政布千章。戒體莊軒冕。伽藍視廟堂。大同瞻慧日。異域拱垂裳。仁儉追堯禹。干戈戢武湯。相須資水火。偏勝失陰陽。驀地優曇現。欺天宄賊張。燄飛金碧宇。血濺寶花場。海願成磨折。深慈轉痛傷。豈難回定業。無那是魔強。五濁眞當捨。歸哉極樂邦。

題家先賢慎齋公弄丸圖記

公諱永。乾隆時經學大家。大丸卽一眞法界之大圓相也。

虛空在圓覺。如海一浮漚。世界與山河。渺若蚊之眸。先生於書無不讀。乃知一切丸中收。丸中主人弄丸記。弄丸與丸非一異。無始天地我並生。大丸小丸等虛譏。律曆圖書八十年。直是丸中小遊戲。先生悟徹性命源。豈屑漢宋爭名字。禮繁易奧九流靡。一一爬梳信精密。遠從鄭邵迄程朱。留與先生完大事。公書在手公在心。見圖展

拜情彌親。圖中魚鳥夢亦真。何況翕然圖中人。了知此語真非妄。水流花放皆精神。  
讚觀宗諦老上人講圓覺經

觀宗老諦公。了義談圓覺。欲令法性觀。普照諸新學。二六時中事。穿衣喫飯同。菩提怎麼長。對境但心空。妄想依他起。如漚不自生。剷除成徧計。知幻卽圓成。世人不自在。妄想生煩惱。一眞法界中。翛然大自在。奢摩他是止。知止卽是觀。止觀雙照處。中道現圓觀。方便隨緣止。還宜在俗人。色聲香味觸。流自妙眞心。溪聲廣長舌。山色清淨身。要將心轉物。莫被轉於塵。一念互萬年。萬年長一念。要知不動心。本來無一念。三界無安處。云何火宅耽。惟應淨圓覺。爲我大伽藍。欲游圓覺海。須趁願公船。路是徑中徑。理是圓中圓。今世兩菩薩。諦公與印公。提撕難易路。不教踏虛空。佛法無多子。一部圓覺經。三觀傳密印。千佛共修行。潛心一念佛。法爾止觀雙。頓息娑婆影。全舒極樂光。淚海骸山史。千生謬誤深。死生徒閱歷。不見自眞心。眞理俗所驚。謬誤衆所愛。愚人見麋駝。而言馬腫背。

讀印光法師文鈔及嘉言錄

眞學佛者。務實棄名。不求博覽。不驚雜營。不希神通。不貴難行。深信因果。求了死生。喫素念佛。戒殺放生。諸惡莫作。衆善奉行。求生淨土。願度衆生。而其祕要。恭敬至誠。誠有深淺。福有虧盈。印師文鈔及嘉言錄。語語真切。人人可能。亦儒亦佛。亦塵亦僧。欲治一國。先治家庭。孝親敬長。勸化有情。子女並教。教女尤應。相夫教子。女權非輕。周有三太。家國以興。敦倫盡職。共致太平。輪回之苦。萬劫千生。長期監獄。無底糞坑。在囚在穢。誰尊誰榮。西方淨土。切願往生。聖賢會處。惡道無名。得不退轉。佛自然成。易行之法。阿彌陀經。滿益要解。宣發尤精。隨時隨在。但念佛名。若利根人。兼誦大乘。隨緣修福。以爲助行。臨終緊要。再四叮嚀。助稱佛號。勿雜哭聲。哭則心亂。淨土難生。身有微暖。神未離形。此時觸動。痛苦難勝。瞋怨內起。淨土難生。一日半日。身冷如冰。然後收斂。如法盡情。若遇肢硬。不可扳掙。扳則痛甚。苦莫能名。熱巾溫熨。手足節脛。自然柔輒。如暖消凝。若遇盛暑。持扇揮蠅。羣蠅攢膚。心則不寧。祭用蔬素。切忌殺生。



蔬資冥福。殺重冥刑。勿隨盲俗。而害幽靈。仁人孝子。記此箴銘。凡諸大義。文鈔所稱。迷途良導。暗世明燈。不聞此訓。虛負此生。嘉言分錄。類別尤明。我今讚歎。普語羣萌。蓮池九品。努力崢嶸。

五 題贈

題南通孫氏松廬校譜圖。以佛意廣之。偈曰。

衆生多劫來。無姓不受生。當其一姓時。睠念有餘情。世易姓復殊。隔異相憑陵。人爾尙復然。毛角况殊形。卽此悟無常。無常卽苦城。以茲復自廣。塵刹皆宗乘。皆嘗爲眷屬。父祖或孫曾。痛癢故一家。今昔何重輕。因是佛悲願。說大報恩經。十界大宗族。三有大家庭。同脫輪迴苦。方稱大孝成。江南佛化祖。孫氏師康僧。建塔報佛恩。矗立今峻嶒。松廬校譜人。聞此當怍怍。願言不匱思。永錫諸含靈。逝子何滔滔。背父長伶仃。相將向極樂。七寶華晶瑩。橫超有方便。不斷持佛名。

題葉君則柔黃山雲海探奇圖

黃山雲海勢萬里。葉君收入遊行囊。我久神遊足未至。覩圖深入雲蒼蒼。可知一切  
唯心造。大小遠近俱迷茫。世間萬有心所畫。意本華嚴經六道變相由心忙。請君卽此求  
眞常。畫出極樂無邊光。

題徽州府學明倫堂

府制既廢  
堂亦荒圯

儒學明倫故有堂。多年廢置遂荒涼。經師此日眞麟鳳。爲禱尼山更放光。

淮安湖心寺。唐宋以來名利住。持慧公。余同邑人也。書來徵寄題詠。以相期淨  
土報之。

二十年前一面時。那知國步修如斯。生逢五濁僧眞寶。愧我飄流覺悟遲。  
性海光中一字無。更從何處覓詩乎。西方妙有湖心寺。七寶蓮華布地敷。

曹公亭偈

民國十年辛酉。南通平潮市曹公亭落成。明曹頂殺倭寇處也。縣人徵求題詠。謹  
爲之偈。偈曰。

如來等視十方人。但爲仁王稱護國。如公義氣合爲神。更捨瞋心當作佛。  
謙願世間一切國家。以仁護國。孟子告梁惠王曰。仁者無敵。王請勿疑。謙亦願今  
世人之深信勿疑也。

佛教居士林新屋落成紀念並贈王斷臂居士

七寶樓堂三界外。十方嚴淨一心收。飛丹流碧黃金宇。都自真如湧現來。  
最是難行能行者。藥王眞法供如來。捨將百福莊嚴臂。要把人天正眼開。

獅麓齊氏友于家塾題辭

有源此有流。惟孝斯能友。兄弟本一身。比如人兩手。齊氏有金玉。作塾名友于。欲以  
傳後昆。孝友兼詩書。家家塾如茲。賢良接踵出。此謂不出家。而成教於國。盡此孝友  
性。十方是一家。自度度衆生。回向阿彌陀。佛有大誓願。接引無虛訛。信願行具足。決  
定生蓮華。

題績溪胡與九先生存齋詩草

正眼胡夫子。遺詩作講壇。朱王資兩翼。儒佛許同參。石鏡傳神采。飛雲憶往還。一肩

宏道願。付與哲兒擔。

石鏡飛雲山。皆橫勝境。

教學人獅子。鏗然點意通。爲邦泡影事。童冠聖賢根。不垢偏宜浴。能安好任風。歸元無二路。歌詠信西東。不斷尼山鐸。如聞鶯嶺鐘。箇中參也魯。千載尙春融。

應王伯吹先生之請題其祖永沅公像讚

公字澧蘭。號湘亭。婺八都鏞源人。事父孝。養盡職。通曉經史。諸子文名藉甚。而性恬淡。不應小試。所友皆一時耆宿。居鄉恂恂。排難解紛。殆純儒也。子四。仲卽菊泉先生也。文行俱優。載邑志文苑傳。孫耀庭。伯吹。皆以學世其家。讚曰。

學莫正於經。經正而民興。行莫先於孝。孝修而家樂。孝之不修。經之不講。吾憂之。安得起公於今兮。而爲之鐸。願公以是行。誼回向蓮邦兮。坐金臺而成正覺。

爲程濟舟題手繪其始遷祖湘公像讚

公父爲忠壯公。雲洗。

惟公英勇忠壯之遺。蠢爾鷓鴣。望風離披。朝頒璽詔。野囑旌旗。作鎮我婺。遂家於茲。

子以武纘。孫以文憲。厥後用昌。大暢本枝。拜公神像。如生之時。祝公往生。極樂蓮池。念佛成佛。爲天人師。

題查公靜波暨德配齋宜人像讚

吾鄉查公。勲孝友。志復先業。如墨守。其取不貪。積彌厚。以贍族親。資指口。宜人曰齋。公右手。贊公起家。爲德耦。施貧卹寡。教諸兒。森森玉樹。當牕牖。公恨失學。勞奔走。歎慕儒風。如北斗。有子能耕。硯千畝。鏘鏘有聲。稱耆耆。欲報親恩。傳不朽。廣徵鉅筆。參韓柳。嗚乎。世相顯晦。豈有常。古來惟佛。無量光。願君爲親。念佛生西方。

表明末南通州明公萬里。殉義事敗自首。一州獲全。公故宅已毀。而榆陰尙存。自任顛危。不咎天。一身雖毀。一州全。榆陰未損。公靈在。又閱興亡二百年。殺業相尋。豈有終。無邊淚海。弔孤忠。唯心試聽。如來語。能所渾消。一夢中。

懷孝若海外

閉戶知天下。遐哉此遠行。詩書多庫藏。貨利孕刀兵。因果形俱影。天淵德與爭。不忘

三聖意。

佛老

珍重託孤旌。

四海吾兄弟。瘡痍等一身。不觀三惡道。寧發大悲心。顛蹶由奔妄。清平但返真。空前苦消息。先與問東鄰。

聞齊雲山諸道士。約每月持六齋。七八九十月長齋。喜贈詩紀念。

道士齊雲住。清齋積福多。西方同路到。淨念阿彌陀。卽擬籃輿去。相從白嶽游。莊嚴諸寶地。湧現在心頭。

兵禍頻仍。百業凋損。婺源瘠邑。民困久矣。乙丑春。徐鏡溪營長奉命率兵來婺源。防堵秩序肅然。商民稱頌。想見易稱師貞之吉。贈之以詩。

環海兵戈動。由來一念紛。太平根本策。端在此心中。我佛慈威並。含靈愛戴深。何時貔虎士。化作鳳鸞羣。

乙丑徐鏡溪營長奉省令來婺源防堵。能使贛軍三千餘衆解裝過境。所保全治安寧。惟一邑。皖江以南。實利賴之。功德在民。烏可忘也。見示贈慰常將軍詩。

虛懷不矜。想見儒將風度。孰謂無學而能軍也。贈詩紀念。

湛湛陽明子。安邊講學餘。子房成漢業。消息一編書。洗甲銀河語。當來願不虛。欲知天下定。合掌問真如。

李韶如居士長郵雲灣。得共事佛。恪恭五載。將助獨賢。贈詩惜別。勸以西方。溫溫恭人。維德之基。世合必離。如之何勿思。曠劫背父。今乃聞知。夙興夜寐。期子於蓮池。深信切願。無間篤行。金臺千葉。由積念而成。普賢十願。願願宏深。無量光壽。此焉爲之因。

### 論文偈寄蔭園弟。

作文如開花。時至自然有。當其未花時。不得虛空構。詩書醞釀深。辭理斯豐茂。若誠松柏姿。不問花榮否。比如顏閔賢。德行爲冠首。蒼貧儻作花。勁節成灰朽。或以材見尊。或以果適口。或以善花稱。或以無花壽。聖門三千人。游夏爲文藪。求由政事才。賜解語言糾。柴愚參也魯。亦各稱高足。物花復有時。品第非先後。或當春爲蘭。或感秋

爲菊。蓮於火令清。梅入冰天瘦。物趣信多端。天然真教育。樹人如樹木。根本先培覆。讀誦江河流。解義龍蛇走。身心潤澤時。欬吐生瓊玖。病眼捉空花。徒自勞心手。

廣厚與姪

書來讚擔糞。爲汝擔糞歌。糞以穢見曠。擔以重見苛。不避重與穢。勤忍當如何。卽此名擔糞。豈必田中那。八識爲汝田。勤忍爲耰耜。煩惱爲糞穢。菩提爲肩駝。青青賢聖苗。灼灼慈悲華。深深般若根。茁茁金剛芽。不違安養國。徧潤利塵沙。不動清淨身。徧入塵勞家。任運爲園圃。隨緣種豆瓜。善哉菩薩農。修此成佛陀。

答程筱鵬居士問疑。曠是心中火。能燒功德林。何以南唐慕真禪師。靈山坐化時。以三昧火自焚其身。

曠是心中火。能燒功德林。般若大火聚。能燒煩惱薪。煩惱轉菩提。唯茲一念心。生佛體一如。用則殊升沈。火爲四大一。功罪將由人。寂寂慕真師。湛若淵湖深。八十有五。年以默存其真。一朝三昧火。焚彼芭蕉身。化作光明月。萬古常清新。



筱鵬居士東赴海上書請贈言

常持普賢十願王。回向勢至三摩地。蓮池異日寶華開。應信斯言真第一。

題筱鵬居士肖像

作拈花  
微笑狀

世尊拈花無說而說。迦葉微笑不解而解。聖賢相與兩境一心。既是一心。應是一身。悟者自覺。迷者自塵。神而明之。存乎其人。筱鵬其人。人其鵬耶。抑其爲靈山海衆之化身耶。夫烏知其真。

世尊拈花。迦葉微笑。是兩人事。錯會爲一。題語亦將錯就錯。或者錯之中有不錯者存耶。

題筱鵬耀堂東望春亭攝影

因甚勞東望。春來夢一場。相將願回向。極樂在西方。

題雪惺肖像

一撮塵中影。千生夢裏人。他年安養國。見汝本來身。

自題小影

亦卽一切衆生之小影也

本來三十二相。何故乞兒模樣。本來光照十方。卻被臭皮遮障。多生換面改頭。做盡討錢勾當。若非親近彌陀。爭免閻君算帳。還有多劫爺娘。都在三途流浪。要從苦海波中。接到金蓮座上。才算堂堂丈夫。脫卻乞兒苦相。因汝憍慢貢高。下此當頭一棒。因汝卑劣自甘。開示如來寶藏。蓮邦是汝家鄉。莫負慈尊盼望。

壽筠松族兄七十並題肖像

唐時楊救貧。厥號曰筠松。君精虛旺術。道合名亦同。謠譏吉人相。心和貌以豐。譚嶺抵萬足。吳橋鎖千虹。經營越數年。計簿巡諸工。村中利衆事。贊助咸推公。晚歲慕佛光。念佛彌精忠。遙知七寶池。君華生其中。作詩祝君壽。遠接如來蹤。

壽江湘嵐先生同徵七十

昔日京華夢裏人。生花妙筆獨推君。廿年桑海成陳迹。輸與先生白髮新。

癸卯同徵赴經濟特科試。今廿年矣。

宦海酸鹹已倦嘗。青蔬風味未能忘。南通千席金齋燕。更與東山祝吉祥。

曩年同飯屯溪公濟局。先生盛稱蔬食之美。南通張嵩庵師七十。燕客二千席。皆戒殺用蔬。亦願先生提倡蔬食。戒殺放生。與衆生同登壽域。

獨有西方無量壽。錢鏗世算比嬰倪。南山松柏何須道。記取蓮華此界西。

阿彌陀佛。此方譯名無量壽佛。阿彌陀經言。彼佛壽命。及其人民壽命。皆無量無邊。阿僧祇劫。故名阿彌陀。

### 壽裘雲彩居士八十

八十翁翁傲後生。披雲南畝尚躬耕。而今認得西方路。一炷香通極樂城。

太平之本。念佛務農。模範人世。善哉裘翁。

### 壽韓止石先生七十並寄印光法師文鈔

東海老人韓止叟。我昔從公效趨走。金陵物望屬荊州。太白狂生供筆手。追陪緣短意思長。光光不隔垣一方。曩年佛誕請止殺。采掇芻論加宏揚。無數衆生獲身命。應

使公壽如山岡。今年七十星在寅。三月四日海氣新。不卻詩文拒走賀。欲宅淡泊違  
囂塵。百年朝暮豈上壽。富貴幻忽真浮雲。我持何者爲公壽。唯有西方無量佛。佛號  
端從淨念生。蓮華已向金池出。能親兩足法光輝。長脫四生頭出沒。普陀尊者印光  
師。代表彌陀演妙辭。寄與老人伴晨夕。回意極樂爲娛嬉。祝公得壽不思議。乃至無  
量阿僧祇。

壽績溪胡樹滋先生六十並贈阿彌陀經龍舒淨土文

殺牲介壽豈爲安。忍彼摧殘我喜歡。試聽陶園仁者語。溫然春意滿人寰。樹翁云。爲  
介壽殺牲。未  
免欠恕。試揣情  
度理。是否安心。錢鏗八百人稱羨。佛眼還如一瞥過。爭似西方無量壽。阿僧祇劫  
侍彌陀。

壽知源賢姪六十

海上卅年客。樽前六十人。艱難戰龍汐。功惠載鱗膾。師友今非昔。風霜晚更親。未應  
許稱老。相助日俱新。

壽李鳳岐先生及德配黃夫人七十

先生圓淨居士父也

修身的是齊家本。勤儉端爲富厚基。作賈作儒兼作佛。故應龍象屬佳兒。  
慈悲健助老閨友。鳩杖雙扶鶴髮年。從此相期無量壽。一家齊上願公船。

誄同學俞廉甫兄

悠悠暮雲黯黯春陰。有赴自東悼哉故人。故人曰俞其字廉甫。生與同鄉。客則同土。學與同師。晤同笑語。我謂廉甫心廣貌胖。廉甫笑謂無戚唯歡。我謂廉甫福樂壽考。云胡茲世使君速老。南通之興實左右師。載春載築。子助爲基。豈唯南通謂國庶幾。有豺有虎。執兵爲嬉。連年徧野膏血爛糜。國瘁人危。子寧勿悲。子之宿慧知業自心。戒殺事佛。起今之人。尙寤尙覺。知果知因。子今曷歸淨國爲期。十萬億土一念杭之。觥觥寶華濯濯金池。覲彼法王浴彼清漪。勛哉廉甫乘願再來。來古觀翠。

誄歛耆儒程伯敬先生祝願生西

早歲科名擅戰場。晚年清望領諸商。君家明道唯居敬。霽月光風不可忘。

八十耆儒論學書。蠅頭小字意修疎。有緣淨土今應證。想見華開見佛初。

誄旅南通舊友李曉芙

李子嗜畫若性成。一家事畜資丹青。晚工畫佛具相好。欲爲闡世張明燈。世間一切心所畫。卽境卽心亦卽畫。會君苦短別君長。此意微君誰說得。此去應歸極樂邦。畫出無量無邊光。佛授記君畫中王。普度畫裏蚩蚩氓。庭前學畫芳蘭芷。勉爲爺爺念佛忙。

誄茶商老宿汪學文先生

耳熟先生德。心歎先生賢。距居廿里耳。而無一面緣。人生貴知心。知心卽故人。千秋如覩面。蘭芷况交親。聞赴三太息。往矣高山琴。起家席勤儉。併力乃在茶。趨庭多英髦。遠學名一家。志在張國產。爲衆開生涯。勸哉諸哲子。勉作加倫巴。願長生苦短。倏去今何之。三界無安居。火宅當出離。西方極樂邦。寶地金蓮池。一生不復滅。得壽無窮期。萬法唯一心。佛是心之師。十念許往生。佛昔有誓詞。念佛必成佛。因正果。

無疑。彌陀萬德名。願君永劫持。

聞汪聘臣先生捨報前念佛二日詩以誄之

曩憶披懷語。多聞讚佛聲。臨終猶正念。應坐寶蓮生。娑婆足煩惱。極樂最清涼。得觀彌陀父。來醒舉國狂。

誄鳳騰程鯉庭先生

大千變幻不越因果。不觀三世或疑有頗。如影應形。如響答聲。善福惡禍。欲違莫能。通於三世佛語。乃明疑不信者。自失其利。若慧眼人了無疑義。累不由人。亦不自天。一切唯我。作受自然。善未獲福。以果未熟。時節既至。若秋刈穀。鳳騰程君。孝友慈仁。事績炳著。耀目印心。宜其誕後。子孫莘莘。子能事佛。尤福之鄰。大孝之極。使親出塵。永離苦趣。長侍彌陀。壽則無量。福亦無加。世間輕譴。藉消重障。當知佛恩。勿生疑謗。益勉修德。廣利衆生。戒殺念佛。爲世模型。卜君孫子。永振家聲。

誄汪稟經先生

先生與謙誼兼姻世交等忘年。晤輒暢懷。識解超越。晚聞佛法。益生信心。持六齋素。習大悲心陀羅尼甚熟。忽近足瘍。醫治不痊。遂以永逝。先一日合掌念佛。令童子數人助之。正持念間。曰佛來。命家人迎佛。問所見狀。曰金色身。曰何止丈六。殆數百丈。問牆壁遮障。何由見。曰盡空。惜家念未空。逝時猶索紙筆。書維持維持字。遺命念佛送終。祭用蔬素。七七將滿。其家請余題主。是日設道場。爲誦大悲神呪。地藏本願經。阿彌陀經。以大悲水和硃墨題主。資助冥福。余兩年來勸人念佛。而親見無量佛身者。先生第一人也。誄之以詩。兼誌悲感。

晚聞淨法志生西。未患桑榆日影低。親見佛身無量好。一空牆壁更無遮。  
尙餘後事囑維持。臨去猶親筆一枝。五濁塵緣何日了。要操慧劍斷疑絲。  
勤參地藏禮彌陀。七七中陰計未過。倘與先生添福力。好傳消息覺娑婆。

哀韓詩人金滄江叟

我昔通明寓。君常邂逅逢。掀鬚開道貌。索筆縱談鋒。上下詩文史。蒼涼家國魂。愁聞



化精衛。應逐海波東。

往復從來事。毋勞未了心。君看千佛眼。國是一微塵。聖裔終天眷。孤懷付後人。西方清淨侶。穩去結芳鄰。

輓歙許雅初封翁

際唐先生父也

驥子馨孫並出羣。翁翁應是在山雲。神農遠裔猶敦樸。歙水黃山蘊育深。富貴聲華俱夢影。故惟淡泊契天真。報恩孰是高王事。伴侶蓮池上善人。

誄胡玉如封翁文輝老人

八十翁翁詎偶然。嶒嶸蘭桂况俱賢。好施第一波羅蜜。教孝而今日健連。晝裏溪山仁者宅。庭間花草靜中禪。此行珍重歸依處。定託西方九品蓮。

悼友徐一笙

江陰師範校長

教學故樂地。今則成漩渦。紛紛抱石入。不復能如何。或爲貧所驅。與世相唯阿。或懷從井心。自溺而援他。巍巍七尺軀。一觴蛟龍巖。信知我佛言。具苦名娑婆。一笙吾故

人寒暑經磨。文行最諸子。朋口交稱多。以何宿業因。入此苦網羅。亦嘗聞正法。睇見如來家。何哉捨報日。不念阿彌陀。勸之佳兒女。爲父求香華。虔披地藏經。照徹生死河。報恩唯念佛。莫浪揮滂沱。蓮開極樂邦。佛語無虛訛。

祝汪彥彬先生西歸

繞膝孫曾七十翁。難聞佛法晚猶聞。談何容易金剛種。應溯多生論善根。小屋三間寂靜時。悠然送想到蓮池。此行得接黃金臂。應悔飄零覲面遲。

族宿學玉書居士與夫人程氏先後生西居士逝日晨聞梅檀妙香夫人捨報適當釋尊聖誕勝緣希有詩以讚之。

聞道桑榆日。心光照十方。五更侵早起。端爲誦經忙。病得無生藥。賢哉井臼妻。蓮胎先後茁。同禮佛陀耶。逝子滔滔是。慈親久倚闕。莊嚴千福臂。長劫到今垂。

題崔母往生傳

太平崔母何恂恂。孝姑相夫家以豐。兒孫誦繞兩膝。求法稟戒空王門。蔬食念佛。

至心學。臨終禮佛生極樂。肢體冰冷頂猶溫。西方瑞應斯真確。吾妻汪氏事略同。或者相見蓮池中。早悟無生成正覺。娑婆待母開凡蒙。

誄荷田方頌椒節母孫太君並祝念佛生西

寒士由來徒四壁。阿誰一擲二千金。紫陽午夜青燈下。多少光中照讀人。書助古紫陽書院舊火銀二千  
無奈春花經雨早。最憐貞柏耐霜多。蓮邦有路唯心現。驀直西行見佛陀。

青陽曹編修汝麟。繼母李太夫人。處豐厚而勤儉慈仁。數年來長齋歸佛。持法華金剛禮天竺普陀九華。丁卯季秋西逝。爲介請印光師結念佛七。助生淨土。詩以讚之。

處裕安操作。修誠宅善仁。曾親天竺雨。况演妙華音。龍女昔成佛。蓮邦今締鄰。彌陀千福臂。爲母導歸津。

誄表嫂詹母曹宜人並唁哲嗣滋圃居士

孝慈儉惠眞賢母。奉佛修齋况祖風。淨業樓中餘韻在。迦陵白鶴說眞空。詹氏淨業樓。建自明時。

放生功德動人天。無數含靈讚母賢。此去寶池諸善侶。法雲親被溯前緣。舊捐金贖法雲寺助放生

面西含笑喜盈盈。應見幢幡聖衆迎。報母深恩唯念佛。六時不斷憶洪名。

敬讚東老伯母曹太夫人西歸并唁劬直勸嚴同學

儉薄膺遐壽。慈仁王後枝。善哉鄒孟母。往矣寶蓮池。但願覺圓滿。何憂愛別離。報恩唯念佛。勝補采蘭詩。

誄如皋莫王智睿女居士

或現丈夫相。而行妾婦卑。或現婦女身。而有丈夫爲。貌取聖所難。况以肉眼知。王女出清窘。箕帚得所依。萬羅百尺松。不厭寒爲期。修學爲裝服。勤工以樂飢。歡笑媚高堂。撫育親羣兒。夙何善因緣。念佛逢明師。錫以智睿名。指點生蓮池。誠通夢相接。預知西去時。一朝別君子。妾今從此辭。助我萬德名。毋效悃悃悲。世間丈夫人。幾幾曰能之。

誄盧伯母房太夫人並寄哲嗣紹劉阿彌陀經印光法師文鈔

親得離塵垢。子道方成就。五鼎與三牲。未足酬高厚。蓮池天人師。此言真不朽。盧君有賢母。孝淑稱閭右。相夫悅堂幃。教兒茁英秀。勞哉不肯辭。有子亦差足。灼灼諸孫枝。福報非虛謬。既來會當去。人世由來舊。偏勞孝子心。百計無援救。文章紙墨緣。寧足支長久。不聞蓮邦佛。永劫猶垂手。我心與佛心。本一非分割。感應越言思。契合融空有。報恩唯念佛。致親無量壽。普陀印老人。現世之金口。奉君法兩篇。得此勤披繡。豈但報親恩。廣利無邊宙。

汪立修姻丈德配江姑母於甲子季春西逝誄之以詩

有姑嫁汪氏。九歲修婦職。善承長者歡。柔慧稱閭比。及笄既成昏。朝夕尤勤事。侍病慰翁翁。三年意不匱。翁歿益媚姑。家政資操飭。宵甯夙灌園。曉窗日未入。井臼親細勞。往來知大義。親長聞且歎。侃侃無能屈。晚輩敬憚之。不敢生非議。孰謂女弱男。此非丈夫氣。由其理致明。是以斷之利。

爲聯夫也。弟乃介姪從姑。豈惟篤姻舊。玉樹相參扶。賦命惜不永。先後流雲徂。殷勤

賜季子百世承遺謨。家有賢婦人。孝友佐其夫。藉藉四蘭枝。誰云因果無。

母家中葉落。弱弟獨承宗。迢迢數百里。僑住憂飄風。有田亦數坪。有廬亦數宮。經紀術苦拙。虛糜遂屢空。辛苦念先人。是以姑忡忡。跋涉兩往還。山川爲蹙容。債負清出入。券契任保存。惜哉弟不才。業廢存虛文。拳拳數十年。聊答父母恩。臨逝尙遺囑。此物歸江門。低徊撫遺篋。感喟生敬恭。

昔日共姑語。讚言念佛好。頃聞姑病時。迴向靈山道。豈期薤露晞。念佛真須早。三心若圓發。卽契佛願海。西方極樂邦。百福無煩惱。但念阿彌陀。金掌來相導。蓮池七寶華。中有姑姑在。

輓南通賢母龔方氏答唁龔徵葵徵桃昆季

南通賢母龔方氏。配夫儒雅清寒士。夫亡教子學並成。學成母逝悲何止。千里寄赴乞一言。如何度母超生死。我聞彌陀大願船。極樂淨土真莊嚴。衆生念佛得接引。報終九品生金蓮。又聞地藏願無邊。十方地獄宣金言。誓盡衆生始成佛。以是廣度彌

人天最要中陰七七期。輪迴未定能推移。勤念彌陀地藏號。但誠但敬中毋疑。佛我一心感必應。世法報母無逾茲。更復努力作功德。放生戒殺終身之。佛天父母衆生子。豈有救子親不怡。以此功德回向母。令母定生七寶池。

題南通包氏愛吾廬勸念佛

包公有廬三百載。子孫愛祖猶傳守。文字風流乃爾長。壯行壯氣欺冰霜。天地由來是敝廬。誰爲吾者誰非吾。三界由來稱火宅。紛紛所愛誰能惜。西方珠宇寶蓮池。但念彌陀坐致之。縱經劫火燒難著。永世恩親無別時。報恩妙道誰能悟。六字洪名寄孝思。

答金壇吳生企南

金壇佳士吳季子。十年不見得書喜。文詩趣古不入時。聞法能通出世理。金陵舊友天一方。相思長夏秋風起。吳子遠懷極樂邦。此邦卽是圓通常。求則得之舍則失。非滯形色非空茫。禪淨兼修虎戴角。止觀雙照獅中王。低徊六字不釋念。諸佛智海生

光芒輪回繩索唯心造。便向心中斷煩惱。不借如來大願船。怎能稚子出重淵。彌陀佛是佛中佛。淨土方便真奇出。千聖艱深闡法源。顛蒙容易生蓮國。一串摩尼信願行。莫因容易生輕忽。匪誠匪敬匪恆心。直是鎔沙想作金。前者蓮池後火宅。請君進退自參尋。輪王帝釋猶塵影。何況俗譽爭斷斷。高談玄論成畫餅。涅槃生死方躬親。勸哉吳子莫沈吟。追躅蓮池上善人。起居人事猶前日。但辦西方一片心。

壽馬伯閑君五十

馬君五十日正中。有子夔龍拜且舞。要求法語報親恩。俗譽浮文豈足數。同在娑婆五濁中。世緣修短奚嗟慕。况復六道受多身。此身那得常如故。將父將母將安歸。歸我彌陀大慈父。舒光無量壽無邊。但受諸樂無諸苦。肯辦資糧信願行。報終定託彌陀所。夔龍當知大報恩。報以極樂莊嚴土。廣宣淨願導修行。饒益羣生爲福母。

樂平王玉峯居士於庚午歲避地來婺。聞淨土深法。毅然舉家行之。真奇緣也。

贈詩紀念



寂然不動無量壽。感而遂通無量光。心佛衆生三不別。水風火劫莫能傷。尋常煩惱悲歡地。頓轉莊嚴燦爛場。會得東西一心攝。腳跟已著寶蓮邦。

護生念佛傳家寶。莫讀人間相斫書。但釀一庭春意滿。會看萬樹好華敷。永明作偈防蹉路。滿益詮經得佛珠。爲訪東林消息在。他年香火續匡廬。

贈別王玉峯老居士挈家歸樂平八首。

奇緣能卻老。勝福孰如君。膝下佳兒女。西方上善人。蔬食傳家寶。慈名出世音。何時盈耳鼓。徧是伯牙琴。含靈皆骨肉。底事互貪瞋。願借西江水。全清濁劫心。慧遠慈悲雨。廬山白淨雲。廢興唯一念。期望更東林。一家佛孔老。三際古來今。莫漫生千別。渾然共一真。萬流歸佛海。六字乃真金。會得彌陀願。方聞究竟音。日日蓮池會。如如見佛心。能忘離隔苦。况屬齒唇鄰。火宅無安處。蓮邦有老親。長垂千福臂。莫錯百年身。

厚輿姪念我蔬素終歲。冬月以罐裝鮮牛乳見寄。懷此不忘。詩以酬之。

千里醍醐遠寄將。菩提未就愧頻嘗。華嚴法乳還酬汝。好憶無邊十願王。

持華嚴普

賢行願品。四十餘年。有解要疏。謂爲淨土正因。非虛語也。

題南通徐君貫恂梅花山館讀書圖

徐家山館書成屋。積世清奇類能讀。聞有梅花一例人。書畫詩文動盈幅。卅年夢入南通史。師友繽紛走接踵。比來向佛樂山居。歲寒但與梅花俱。江南江北多梅花。不知讀書人孰多。衆楚狂咻一齊傳。六經付與塵封錮。徐君求友索嚶鳴。我家書史猶有聲。穀裏頻伽能弄舌。韻與梅花兩清絕。讀書要讀如來書。君家山館有此無。收拾虛靈歸佛海。餘子猶若江河湖。

題徐君貫恂澹廬品泉圖

世人紛紛皆好錢。徐君所好乃在泉。泉以流通潤貧窶。錢則交戈與禍連。物一名殊義亦異。古今好尚如淵天。佛言世財苦不堅。水火盜賊惡王浪子。如是六者同垂涎。六波羅蜜施爲首。宿施今富非徒然。陝西餓孳二百萬。宿業蓋與慳爲緣。閱盡豪家

誰復在上數黃帝。今清宣。澹廬品此儻有味。願敷佛座莊祇園。

讚孝行南通孫母曹太君

太君子。謹弟兄。交。卯。同。應。經。濟。特。科。

謹承恂吾所兒。癸卯同應燕臺徵。當年盛壯今幾時。坐看鏡裏生霜髭。謹承孝行傳諸母。母也南通稱孝婦。幼承經訓秉父風。歸事高堂課兒讀。姑威順之愷以平。姑替舐之瞭以明。敬姑愛姑如一體。比如身手護頭耳。先姑而亡姑太息。痛哉賢婦難再得。如是至德聖所尊。豈唯蔭蕃昌孫門。徵文鏗鏘徧韓杜。謂謙何以遺吾母。謙聞大孝蓮池稱。親得離塵子道成。文字會隨諸有滅。唯有淨土無遷謝。淨土易往法難聞。彌陀一卷真奇文。佛以大願載羣品。六字徑超生死輪。既生極樂無諸苦。得與聖衆非凡倫。解得無邊一心攝。此是往生真祕訣。死生近遠與自他。皆從虛妄生分別。佛言十界由想形。願君想母蓮華生。佛力法力心念力。是三是一融無隔。君今念佛卽母念。君今見佛卽母見。以親遺體報親恩。阿母未死今生存。朝暮造次不敢忘。會觀如來無量光。如來四生大慈母。願君將母歸蓮邦。還復分身徧塵刹。普與濁世爲

慈航。

自題陽復齋詩偈集

妄言吾不敢。綺語吾不爲。莫笑巴人曲。中有濯纓詞。高山流水音。願譜之天下。因緣時節來。誰非子期者。

詠梅寄贈各佛教機關。提倡慈善念佛戒殺諸善知識。

歲寒益友數梅花。風雪彌天氣自和。獨殿羣芳爲後勁。且開萬卉作先河。繁華刊後真文現。世態涼時茂德多。旋轉乾坤賴君子。春光無限到人家。

奉答胡敬庵先生書訊見問並示詩二章

平生心服胡安定。治事通經意最精。道俗分離成末世。淵源洄溯尙先型。何處米鹽非國事。况兼耕讀課門生。從知大學無多義。但解修身世自平。

悲德兒辭

從子有德。四歲而殂。爲辭悲之。

德也才四齡。威儀何媚嫵。聞教如夙知。見者爲之舞。瞻佛念彌陀。跪拜有禮數。口稱觀世音。救難與救苦。豈期惡疹瘍。遺蛻埋黃土。悲哉夙何因。使我淚如雨。同生五濁中。修短奚嗟慕。假而百齡終。比汝猶朝暮。願汝脫此輪回苦。往生西方極樂土。花開見佛悟無生。永依無量壽佛所。

寄題淮安湖心禪寺倚舟堂

倚舟堂畔覓舟無。萬念空時是一湖。若著有無今昔想。夢中別夢總模糊。肯上彌陀大願船。卽從煩惱見性天。念到當念原無念。始信西方卽是禪。

贈劉厚生同學。偶憶前談。戲成二絕。

遺君一卷剝皮經。豎徹橫該字字明。剝得無明皮殼盡。蓮池應念寶華生。性量神通不可思。能包無外入無遺。乾坤有盡吾無盡。莫受頑皮百變欺。

壽潘保之先生。德配汪夫人八十。應哲嗣新伯世兄之請。

潘子吾邑人。徵詩壽父母。母年今八十。父八九加五。父行爲世稱。母亦師閭戶。茂哉

何取文。况我非文伍。唯有忠質言。持獻當拜舞。佛稱無量壽。商彭豈足數。堂上未來佛。真體同諸祖。何以大報恩。報之極樂土。一句阿彌陀。十方佛念護。更有不匱思。由今思往故。一切含靈者。皆嘗親恃怙。所以放生心。亦爲報恩故。盲俗乃不知。開筵修烹脍。以此壽二親。不若飽蔬素。潘子勵學人。當爲羣盲目。爲世作福田。豈但家之福。此言樸不文。此義光明燭。雙輝獻高堂。當勝塵凡祝。

壽宗兄養賢先生七十

人稱七十古來稀。彭祖視之猶嬰倪。無色天人八萬劫。又笑彭祖呱呱兒。西方佛土壽無量。諸天猶是蜉蝣期。要知真心原不死。如如不動常如此。改頭換面逐輪回。病眼空花皆幻爾。善惡淨染四大緣。自因自果非由天。種瓜得瓜豆得豆。乃分壽夭分愚賢。智者悟之當自擇。勿隨盲俗耽火宅。三途惡道苦難堪。九品蓮邦樂無極。吾宗儒者星垣翁。太和治物如春風。不慕巍科勤孝養。善療羣疾開醫門。但施手眼不取報。以是福德貽兒孫。嘗參金剛般若卷。良信露電同虛空。仁壽不虛今七十。親朋讚

歎多文士。謙以大壽壽先生。不寫松柏岡陵字。彌陀一卷妙莊嚴。助以蓮池戒殺篇。  
邁世奇文非易得。願翁寶此歡餘年。佛有宏誓不肯負。勿疑念佛終徒然。得觀醫王  
脫輪轉。翁壽自比須彌堅。

奉勸八十老儒汪錦紅先生念佛求生淨土兼呈序昭老居士

耽尋歧路未歸家。警送流光八十過。身在娑婆心極樂。從今念念莫蹉跎。  
慈父親操大願船。招將逝子喜言旋。六時憶念非難事。捨報皆登九品蓮。  
輪回苦况可勝言。刀火途中萬苦煎。幸得爲人應念佛。快求解脫莫遷延。  
金地蓮池七寶堂。樂邦真的好家鄉。棲身賢聖叢林裏。任是愚蒙也放光。  
無量光明無量壽。衆生性海本澄圓。因果滿非增減。功在回光一念專。

題樹滋族叔祖肖像

家世樂業自  
清康熙至今。

濟衆仰菩薩。直心是道場。信願持佛號。念念見西方。須知七寶池。已茁花青黃。六字  
作公據。萬善爲資糧。樂邦非遠近。只在心中央。此心大無邊。勿以方寸量。所以念念

中心光契佛光。寶茲阿伽陀。終作大醫王。

辛未季夏雪惺請題其尊人鑑塘先生像

才朗朗。貌堂堂。本儒服。而營商。拯疾苦。通岐黃。晚正信。生蓮邦。願畢竟。成醫王。阿伽陀。起十方。徧塵刹。爲慈航。

題均福居士母像

貌何古。神何腴。飫艱苦。親勤劬。甫四十。凋其夫。遺四子。惟母俱。困哉母。哺諸孤。何所恃。勞之需。兒成立。母則癯。出飽煖。入安居。父兮母。蔭之餘。母考終。報不虛。傳孫子。無忘諸。圖報恩。念佛乎。

題劉君讓泉悼妹詩勸念佛

劉君有妹何溫存。孝母慈兒友兄嫂。幾篇悼妹斷腸詩。誰無兄妹誰如之。人世有恩當互報。九原有淚何能到。西方佛土寶蓮池。永劫恩親無別離。不忘萬德慈名號。便得彌陀玉臂垂。



題休寧率溪程氏六烈婦傳

率溪程氏詩書澤。勁柏貞筠蒼一門。沙數蜉蝣消隕盡。誰知六烈到今存。  
幻軀非有譬空華。壽並乾坤是自家。留得世間名教在。革囊一具愛將那。  
怨業相尋亦宿因。持齋戒殺佛天心。布衣蔬食傳家寶。各自端身教後人。  
貞魂皜皜合生天。尚有輪回未釋然。第一報恩唯念佛。祝生極樂紫金蓮。

答職業教育專家黃任之君來書述夢

十載誰能解別離。心頭不隔一毫絲。慈悲寧忍看饑溺。衣食偏勞巧護持。我愧丈夫  
空有夢。君懷國手乃無棋。娑婆終竟成輪局。一著西方更莫疑。

卅年酣夢南通史。猶憶雲陽說二空。驥足頓超安養路。鶯聲長囀阿彌翁。世緣不礙  
閒中應。妙觀多因止後通。我分鈍根無伎倆。一經一佛一生終。

癸亥率兒子有朋。謁雲陽雪樓居士滬廬。見教以我法二執及二空之義。謂大乘  
經不可不讀。又謂嘗夢入一古寺。一老僧趺坐地下。聽衆圍繞。僧授雲陽意令參

云。騏驥千里。那一腳踏著西方路。流鶯百轉。那一聲道著阿彌陀。齋退二老。及孝若公子俱在座。時雲陽與退老。孝若未一面。及後得晤。則宛然夢中人也。嘗告齋老。謂是宿世同參云。

誄詞源王楚材先生祝願生西

聞道雲山佛利新。願從借隱比東林。時艱愈被浮名累。我亦棲遲尙在塵。一葉慈航苦海濱。君今已是上船人。切須認取彌陀國。寶手長垂直到今。魚鳥多君天地寬。焚香念佛佛心歡。傳家爲語芳蘭芷。戒殺持名是寶山。誄段莘汪象乾先生

奉身儉薄應遐壽。與世雍容得衆心。驟雨狂飆終頃刻。光風霽月見斯人。一襲和柔忍辱衣。如來早與此翁披。祝翁落日西西去。長侍彌陀七寶池。二六 感託

讀史有感

百代興亡夢。銷沈無箇留。憑將幾卷字。呼起萬端愁。舊事生新恨。今人替古憂。古天難補石。今月尚如鉤。一念心頭佛。全空海上漚。

讀劍南集感愍詩人

放翁傲岸不事佛。無奈煩惱來攻心。歷愁欲縱千鍾酒。出俗或羨層霄人。從來詩人困世網。勉強麴蘖強心神。酒因慮入涕尿獄。仙趣未脫輪迴塵。豈知解縛從一念。能使弱子輕千鈞。肯折驕幢禮佛足。當拔愁幟驅魔軍。西方極樂愁不到。補處上善時爲鄰。不須搜詩壘塊腹。但聽說法迦陵音。

讀彭二林與羅臺山書有感

大千世界皆虛幻。一句彌陀最的真。從此人天有大事。不爲朱陸作調人。

由杭入婺舟行新安江中

無去來中現去來。等般作客判鄉州。千生託地知何限。桑梓隨緣處處栽。青溪平似瑠璃地。碧嶂環成衆寶欄。一路杜鵑醒客夢。彌陀在處是家山。

己未初冬歸柳竹山房

列樹爲深囂。環山作畫屏。溪聲素琴意。鳥語故鄉情。室暖朝暎入。禪深夜氣清。廿年塵海夢。一覺失滄溟。

地藏聖誕日感時

萬變難逃因果律。一絲半黍莫差違。盈城盈野塗膏血。怎對閻翁入判時。滿口同胞的的親。如何翻眼變仇瞋。伏尸百萬皆黎首。未見渠魁損一人。百戰將軍豈未知。知時涕泣悔應遲。寧聞相打能爲國。政教修明好護持。乍看烏起兔還墜。纔聽鶯囀雁又來。獨有西方無限好。六時遙憶得心開。

庚申中夏題柳竹山房

綠柳紫雲青疊障。碧天銀月鏡池塘。天然七寶莊嚴地。好供高樓念佛香。

夏夜贈蚊聊息瞋意

吾非怖汝惡。亦非縱汝貪。悲汝輪迴苦。施血解飢饑。譬如分大海。一滴未爲艱。愧非

甘露味。拯汝三途間。

明鏡

明鏡見我面。不能見我心。不如自心鏡。照見本來人。勿拭鏡中塵。且拭心中鏡。心鏡本無塵。無塵亦無鏡。

雲灣濱溪公園題辭

濱溪爲園。樹蔭數百株。亭徑旣成。幽賞初適。題其中亭曰林溪小坐。西曰妙華洲。東曰望靈墩。夢中屬句。覺而成之。

偶過南陌見深蔭。便擇佳地開茆亭。薤草出路周四曲。傍溪放眼題新名。當年沂水從曾點。冠者童子相參橫。孔氏有林以講學。佛亦林下常經行。村人聞此排闥出。父老童稚皆歡聲。寫憂蠲忿棄小疾。又與山水都有情。當夏漫天作翠幕。入冬暖若深堂廡。天人倘擲白玉屑。便出素幅張新圖。南園春花白如雪。北林秋葉紅於花。此時往日足林薄。約攜茗榼嘗新茶。林溪小坐

西山平如青玉案。後壁突出髻寶珠。有洲橫鋪二十丈。妙花閒雜當春姝。妙華洲

抵石廟徑度東阜。穿林有鳥呼山靈。兩岸溼知隔夜雨。一灣水養遠峯青。此二語夢中作

靈山仙人烏在乎。遙望若見雲中裾。侵晨微風送輕語。傍晚新月窺林隅。望靈墩村東二十

里。有靈山。南唐墓。真禪師道場也。

兒時猶見水濯石。寶林幻出相驚呼。十年成泚泚成蔭。乃知世界非有無。

### 菊荷同賞

秋菊有佳色。秋荷唯枯莖。相依兩不厭。繞視有餘情。不以物榮悴。而爲心愛憎。世間不平物。物物以心平。

### 重慰荷菊

前日是何日。荷衰菊獨榮。今日復何日。荷菊同凋零。主人莫悲感。明年依舊生。當知世間

一切非常非斷。如此觀也。

### 懷白公蘇公

東坡嘗與劉貢父言。某與舍弟習科制時。日享三白。食之甚美。不復信人間有八珍也。貢父問三白之說。坡言是一撮鹽。一碟生蘿蔔。一盃飯。貢父大笑。白居易四雖吟言。年雖老。猶少於韋長史。命雖薄。猶勝於鄭長水。眼雖病。猶明於徐郎中。家雖貧。猶富於郭庶子。

按韋年七十餘。郭貧甚。徐喪明。

東坡早歲餐三白。白傅暮年吟四雖。畢竟道人隨在樂。世塵憂愛總空虛。

### 論詩有感

刪淘風雅餘三百。付囑家傳僅二南。掘取文辭作坑坎。一生理送祇因繁。

風詩比興多言志。可是閒尋學苦吟。左氏燕歌皆古什。不勞製作競翻新。

唐人用可如豈豈豈豈。

五月反舌無聲。十一月鷓鴣不鳴。著在禮經月令。家園中有高柳密竹。二鳥常來棲宿。反舌善爲衆鳥之聲。鷓鴣每旦必呼曰曷曷起起。自春徂冬。稔悉物

### 變記之爲詩

五月反舌竟無聲。十一月鷓鴣果不鳴。深憐鳥善知節候。物類豈遜人精靈。方讓衆

生非異性。但因業報。遂殊形。菩薩因悲示現。如來往劫爲鸚鵡。唯佛通知過去生。  
佛自言。往劫時。嘗爲鸚鵡。  
迦釋

予家老少。並持戒不殺。放生池中有赤鯉自來。竹林中有羣鳥。每晚來棲宿。向晨歡鳴。久之然後飛去。詩以紀之。

清池來赤鯉。深竹宿佳禽。此輩皆殊族。何因識主人。主人能客汝。安穩莫生心。儻解

如來意。疇非夙世親。一切衆生。皆我多生以來父母眷屬。

### 記病

每因病苦增空慧。病苦消時愛欲生。病不負人人負病。莫專醫病且醫情。

### 雨過

雨過雲收意寂然。化工妙用且無言。如何些小煦濡惠。便欲焚香上告天。

### 辛酉夏月題簔一首

緣向虛中滅。煩從靜裏忘。任天偏酷熱。於法得清涼。况有林亭勝。兼之水竹鄉。歸心



尤雋異。閉目見西方。

讀蔭弟邨居讚佛諸作喜而有詩。

東坡子由並家學。文字唱和如簫笙。穎濱往往過玉局。不憂坡老難爲兄。我今多病守雌伏。結舌不敢爲雄鳴。阿弟筆陣出旗鼓。亦足助戰摧魔兵。年來頗識山居樂。賦物會意唯君能。林亭花鳥與泉石。一一動盪皆生情。况復稱歎世間眼。若論福慧當非輕。迦陵頻伽共命鳥。說法能作彌陀聲。當震潮音宏大法。區區文也烏爲名。

夢中句足成之。

一束芭蕉視此身。任顏如玉齒如銀。竭來一度人間走。未識真身枉殺人。後二句夢中所現

山中雨夜不寐有懷

山中風雨驚眠夜。海上交遊結想時。但見狂瀾逐東走。苦勞迴挽向西馳。海濱二老棲皇者。醉裏羣蒙覺悟誰。何事鄰雞屢高唱。山人春倦起遲遲。

迎春

東皇甚處爲來處。在在西方在在東。徧謁人間無覲處。且參紅紫萬花中。  
萬行春花燦爛開。要知圓果屬蓮臺。西方七寶常春樹。佛土重重入照來。

春光

碧柳瓊桃李若霜。菜花區地作金黃。蒙茸翠草如氈軟。錦繡春光又一場。  
爭似蓮邦不老春。寶池寶樹繞重重。一聲佛號凝神處。都在光明攝受中。

春閒

閒來漸與春光熟。待柳看梅到海棠。從李賓桃林下笑。隨蜂步蝶靜中忙。菜花萬頃  
作金地。春水一溪開鏡妝。若使東風能永住。世間常是少年郎。

做彭二林居士法。以水晶糖和橘餅煮湯當酒。

水晶糖釀橘香新。代酒能生不醉春。佳節謾須愁破戒。好添歡樂與慈親。

生日

多生日日皆生日。但記今生今日生。苦樂一般銷幻影。胞胎無數築愁城。嘗周沙界

流離徧都爲因緣誑惑成。聞說蓮邦西向笑。瑠璃寶地許經行。

新淪家池

日暮暑全退。池秋淪更清。樓臺張倒畫。天地有兼形。滌飯魚分糝。揚波月碎明。定中心洞徹。磨後鏡光瑩。

柳竹山房擬杜少陵院花溪居

背市堂成勝結茅。面溪地迴四山交。綠楊障日吟風葉。紫竹和烟滴露梢。鶻鳴夜樓侵曉去。木魚朝吼伴香敲。時人錯比陶潛宅。一笑何須作解嘲。

池畔

一鏡方塘徹望眸。雲天幻影雙浮漚。入淵千尺一鳥過。出天萬仞羣魚游。我佛比於兔生角。衆生乃以麪入油。從來倒見淆真妄。一念觀空萬象收。

去風散

風自火出。火自心出。一切放下。心復何在。覓心不得。風失火沒。

盆中菊

秋既方舒菊。情來看幾回。幽香熏晚節。逸色接初梅。舊史從陶隱。新華向佛開。不須浮竹葉。靜處見如來。

齊物

本無弓得失。焉用慮縱橫。臍暖綿綿氣。心空蕩蕩名。論交兼翠竹。拯溺及蒼蠅。美睡從酣足。睜看天又明。

戒毒

我佛慈三昧。人生夢一逢。張拳揮白刃。捉月鬥春風。吠影花邨犬。成雷暑夜蚊。逍遙顏子巷。歡悅孔家門。

中秋觀月

自昔中秋月。年年看月人。月猶圓是昔。人已古而今。我有無邊月。光輝歷劫新。出生三世佛。徧入十方塵。萬古無微缺。千光證一真。試回觀月眼。看取自家心。

甲子山中玩易詩

一空塵事遂年年。寂靜山中習坐禪。好念彌陀玩周易。一家儒釋作因緣。  
願抱遺經待後賢。眩人時論正譁然。從來消長成因果。不信而今別有天。  
世界由來坎險中。成時雷雨壞時風。田無九二天無五。斷爛經綸孰主公。  
盛霧沈天斗不光。巽風無力任搖颺。須知鄙散無常業。不失經天有太陽。  
羣英奕奕未成陰。離火摧燒委釜薪。分作劫灰誰躲得。不關天事孽由人。  
慘爲驪姬作嫁媒。天魔婚寇伴緣來。流亡公子何年返。晉國中興待霸才。  
克虜戰雲騰海赤。扶桑巨震徹天紅。突來災眚空前史。迷復眞成上六凶。  
變相魔軍自昔多。化妝陰六擬沙河。一聲佛號清涼地。夢覺何曾有奈何。

詠梅

冰雪天中一現身。鸞翔鶴立月精神。春風未到先開口。說盡圓機與世人。

和蔭弟詠梅

玉面丹趺者。誰歟絕世人。滿腔春意思。湧現再來身。  
屈折清齋坐。幽香見惠多。芳心無可著。惟有念彌陀。

春思

春來暘雨條陰晴。無限天公愛育情。桃李松杉知報答。恥將虛廢了生平。  
四生六道經過苦。萬劫千春雨露恩。頂禮西方無量壽。者番定趣涅槃門。

擬寒山詩

糊繇偷苞蘆。摘之置腋下。伸臂向前摘。腋下已隨墮。如是頻摘之。乃至百千顆。自晚迨嚮明。腋下只一箇。自謂摘已多。豈知失者夥。我觀爲學人。將無猴子那。讀書破萬卷。到死無把握。不如念彌陀。六字堪依託。

教通孫唱春歌

春風來。百花開。白花李。紅花桃。白玉琢。紅錦裁。問春風。何處來。

邑人修志。索載履歷。寄刊數語。示以佛理。

謙年四十五。愧無益於世。不願更以紙墨鐫刻之費。勞記載閱覽之人。聊有一偈。書奉志局諸君子一覽。若與傳誦。亦足勸人。偈曰。

江謙非江謙。幾來凡幾去。出入六道中。今世猶人耳。而今念彌陀。西方是故家。邑人若志我。如是如是可。

有疑前偈者。再以釋之。

做日和尙撞日鐘。悟到鐘聲本是空。連箇和尙也沒有。誰撞誰來空撞空。誰撞誰來空撞空。要知空裏有乾坤。大千世界依空轉。莫悟空時不撞鐘。

夢中覓路還家不得。請一童子導之。中途童子復失。心益迷惘。旋入一室。門開。一長老比丘出。就地坐下。余亦恍然曰。本是吾家。何來問路。詩以紀之。

半生覓路走天涯。走徧天涯徧是差。不遇佛門焉得定。天涯原卽是吾家。天涯原卽是吾家。極樂西方莫認差。四齒菖華敷寶座。八功德水漾金沙。本是蓮池上善人。跏趺就地息奔塵。不離當處彌陀現。不出茅堂寶閣新。

壬戌大暑寓石耳山棲霞庵記事

暑尋不到棲霞寺，忘卻炎威六月時。乘興會當陵絕頂，更須添著禦寒衣。

石耳夜深聞竹雨，聲如驚浪起江湖。曉來紅日摩天出，尋徧山村點也無。

夜深輒聞大雨滂沛。

及曉視之晴也。蓋竹得風喧然有聲。

山僧勤苦自當家，自作饗飧自點茶。願締淨緣歸極樂，自然衣食沒奔波。

庵住持靜法明性。

而作

兒到山頭禮佛歸，爲言高迥更無依。平睇遠天雲雨下，一絲絲掛碧瑠瓊。

朋兒往山頂禮佛，是

日適見空中雲雨之狀。

聽松譜册神呵護，二百年來尙保存。自是真公遺澤遠，兩山香火一宗門。

閱接霞庵遺墨，得江

灣聽松庵僧譜及山田冊。蓋乾隆時源福廣霞二僧皆江灣人來住此庵。源福字養全爲真松大師七傳法嗣。廣霞字均霖禮養全爲師。

古佛神通託化奇，因悲示現爲蒼黎。萬方一概今多難，正是慈航接引時。

石耳山供像。

開化縣志爲定光佛示現。



癸亥四月過杭。循裏湖至岳王墳。歸道白公隄上。

偷閒湖上展雙眸。不暇尋山選寺遊。最愛白公隄上過。四圍清境一齊收。不煩文字苦雙眸。徑路修行似此遊。無量法門無量義。彌陀一句一齊收。

新安江放鼉。爲念佛懺罪。迴向極樂。

獲罪應緣介冑身。多生殺業受沈淪。而今導汝西方路。一樣金蓮座上人。

讚月

光明照萬方。清淨息諸妄。江海河渠隨處生。春秋冬夏無殊狀。團圓是本來。殘缺由遮障。比如璧玉如晶盤。或入深淵或天上。往來菩薩身。圓滿如來相。九幽得照盡歡呼。今我懸觀存默想。我心皎於月。十界通消長。方寸既非藏。六合亦非放。光光融一非自他。劫劫經過無得喪。請君稽首問如來。便信此言真諦當。

俄學士阿爾泰言。吾人之一日。一時。一分。一秒。孰非向死而馳者乎。感而賦詩。人從生世日。便向死路趨。壽者安步行。夭者乘飛機。自從皇古來。孰能留其軀。擾擾

同歸人。留戀生嗟吁。前路日以近。那復容踟躕。萬劫不得住。勞哉生死途。西方極樂邦。捨此安歸乎。

讀神農本草經

神農嘗草非因病。大願醫王爲衆生。我爲十方求上藥。卻因身病讀醫經。草木難愈菩薩病。短長要療死生情。百年四大如泡影。淨念金剛不滅增。

勸念佛戒烟

印光法師文鈔所傳戒烟方最效。

父老憂歎言。人喫鴉片煙。我云此非實。實則煙喫人。假如人喫煙。能喫亦能捐。捨也操刀斷毒腕。壯士貴自全。鴉片煙喫人。粉骨齧其身。妻子與田宅。剗滅無留塵。供養彼煙厲。惡鬼也效死弗敢呻。如是食料耳。那得稱爲人。傷哉被喫人。下此頂門針。要將人轉物。毋令物轉人。卽此念煙念。轉爲念佛心。身力日強健。心志日光新。西方萬德尊。期汝青蓮津。

勸斷紅丸鴉片

毒哉紅丸鴉片。傾家滅種亡身。喫者何苦自殺。賣者卽是殺人。惡積自然禍到。物腐自有蛆尋。眼見三年五載。相隨一敗如塵。懇勸一般佛子。大家念佛醒心。害人終須自害。自殺叫誰替身。自家設法斷絕。外患自不來侵。打起精神做事。留點良心。變人。在家少一敗子。在國多一良民。更能發願念佛。自然氣志光新。喚醒一場惡夢。莫嫌苦口嘔呻。

錄少作數首。今衰年矣。無所精進。慚愧如何也。

戊戌箴

將欲守於人而喪其身。汝百其口而誰汝恂。以汝爲絲而黑之。悲與汝適道而徒足於歧。誰實爲之。嗚乎。汝其終小人之歸。汝垢之身。速汝前死。而死而生。而新爾志。毋濯於塗。謂我弗汗。毋鳩之醒。謂我實醒。善不棄小。惡不恕小。汝突而冠。謂汝不了。

侏儒誡

侏儒曝朝陽影大不稱身。對影忘其身。自謂龍伯人。列子龍伯之國有大人一釣而連六鰲。

旦起

歲月更代壯大將。賤子旦起中旁皇。去日零落沒光景。舊書記誦多塵茫。口說迂俗行醉跌。鄉愚傾笑聖涕滂。嗟前期後歲復歲。毋慚後者如前嘗。

惜今日

前之日去不可追。後之日來不可待。今日之日吾有之。黃金幾斤珠幾斗。起起起。行行行。爾胡不斲日晶晶。爾胡不割刀瑩瑩。黃帝曰日中必斲。操刀必割。言勿失時也。

辛酉南通水災感寄諸友

從來東海幾滄桑。倏忽人魚夢一場。莫枉當年黃面父。慙懃苦口讚西方。魚作漁翁人作魚。多生報復未應虛。要將三昧慈悲水。寫與龍宮懺悔書。

釋夢

夢境迷離雜佛魔。倏驚倏喜倏咨嗟。如何洗卻塵凡盡。清淨池中一月華。

有夢由來有佛魔。道人隨遇莫咨嗟。如何卻是無明盡。五濁河中現月華。  
極樂蓮邦不受魔。但生歡喜不生嗟。千生惡夢而今覺。莫負金池七寶華。

祝柳 家園中柳。吾父手所植。四十年來。扶疎暢茂。清陰宜人。庚午酷寒。山木  
多僵萎。而柳與焉。詩以惜之。

四十年前少好時。與君同有嶄新姿。吾翁愛護均吾汝。此意晨風夜月知。  
四大因緣幻合身。常將青眼護山人。適來非有今非去。問訊應須向一真。  
情與無情作佛同。西方寶樹唱真空。祝君往證無生後。爲世慈悲喜捨翁。

### 白菊

天人鮮白膚如雪。墮落塵凡糞土中。吹著西風更回向。琉璃寶地望玲瓏。

### 黃菊

夙緣何福得金身。燦爛輝煌淨眼塵。若使此花成世界。定知彌勒下生辰。

哀美人蟹 民國庚午海濱人得一蟹。背有人形。眉目體態如畫。傳列滬市。一

時觀者喧稱爲美人蟹。不知是殺業因果。地獄餘報之徵也。

以人食蟹。蟹食人。循環三世。自他身。差觀因果。分雙影。誰解紛紜。共一真。殺業久淪。無閒海。橫行未憊。宿生心。一言願告。貪饕客。莫向官廚索八珍。

辛未季春留鬚自省三首

百千萬劫。今聞佛。五十六齡。初著鬚。已識當人。無老少。且添幻相。自軒渠。回首兒時。猶昨昔。逢人長老。愧稱呼。不能救世。非菩薩。未出輪回。豈丈夫。六時送想。黃金國。願得無邊聖者。俱。老盡乾坤。猶少好。始知不動。是真如。

七 借陶白詩

借陶淵明詩勸念佛二十二首

陶詩清逸。上接風雅。借公詩易數語。勸憂人念佛。歸心極樂。用代飲酒。文字公物。陶公達人。應笑可之。

形影神三首

形贈影

天地非不滅。山川有改時。

本作滅。山川天地長不

草木得常理。霜露榮悴之。謂人最靈智。豈

本作獨。

復不如茲。適見在世中。奄去靡歸期。形影無復存。

本作無一人。

親識豈相思。但餘

平生物。舉目情淒瀉。我無騰化術。必爾不復疑。願君取吾言。念佛莫苟遲。

本作得酒莫苟辭。

影答形

存生不可言。衛生每苦拙。誠願游崑華。輪迴未可歇。

本作道絕。

與子相遇來。未嘗異

悲悅。憩蔭若暫乖。止日終不別。此同既難常。黯爾俱時滅。身沒名亦盡。念之五情熱。

念佛得成佛。

原本作立。善有遺愛。

胡爲不自竭。酒云能消憂。方此詎不劣。

神釋

大鈞無私力。萬理自森著。人爲三才中。豈不以我故。與君雖異物。生而相依附。結託善惡同。安得不相語。三皇大聖人。今復在何處。彭祖愛永年。欲留不得住。老少同一死。賢愚無復數。日醉或能忘。將非促齡具。立善常所欣。誰當爲汝譽。佛願接衆生。正

宜乘願去。

本作甚念傷吾生。正宜委運去。

置身極樂邦。有喜而無懼。

本作縱浪大化中。不喜亦不懼。

念佛不虛念。無

復獨多慮。

本作應盡便須盡。無復獨多慮。

### 歸園田居

少無適俗韻。性本愛邱山。誤落塵網中。一去三十年。羈鳥戀舊林。池魚思故淵。開荒南野際。守拙歸園田。方宅十餘畝。草屋八九間。榆柳蔭後檐。桃李羅堂前。曖曖遠人村。依依墟里煙。狗吠深巷中。雞鳴桑樹顛。戶庭無塵雜。虛室有餘閒。久在樊籠裏。復得返自然。

野外罕人事。窮巷寡輪鞅。白日掩荆扉。憶佛絕塵想。

本作對酒絕塵想。

時復墟曲中。披草共

來往。相見惟言佛。

本作相見無雜言。

及但本作道桑麻長。

桑麻日已長。我心

本作土

日已廣。不憂

本作常恐霜霰至。零落同草莽。種豆南山下。草盛豆苗稀。晨興理荒穢。帶月荷鋤歸。道狹

草木長。夕露霑我衣。霑衣不足惜。但使願無違。

### 移居



昔欲居南村。非爲卜其宅。聞多素心人。樂與數晨夕。懷此頗有年。今日從茲役。敝廬何必廣。取足蔽牀席。鄰曲時時來。抗言談在昔。奇文共欣賞。疑義相與析。

春秋多佳日。登高賦新詩。過門更相呼。賈茗稱酌之。本作有酒農務各自歸。閒暇輒

相思。相思則念佛。本作相思相期本作相期無厭時。此理不可勝。本作勝無爲忽去茲。衣食

當須幾。力耕不吾欺。

贈羊長史

羊名松齡

愚生三季後。慨然念黃虞。得知千載上。政賴古人書。賢聖留餘迹。事事在中都。豈忘游心目。關河不可踰。九域甫已一。逝將理舟輿。聞君當先邁。負病不獲俱。路若經商山。爲我少躊躇。多謝綺與角。精爽今何如。紫芝誰復採。深色久應蕪。駟馬多本作無貴。患貧賤有交娛。清謠結心曲。人乖運見疏。願言生極樂。諸上善人居。本作擁樓累代。下言盡意不舒。

庚戌歲九月中於西田穫早稻

人生歸有道。衣食固其端。孰是都不營。而以求自安。開春理常業。歲功聊可觀。晨出

肆微勤。日入負耒還。山中饒霜露。風氣亦先寒。田家豈不苦。弗獲辭此難。四體誠乃疲。庶無異患干。盥濯息檐下。憶佛開襟顏。本作斗酒散襟顏十萬億佛土。一念乃相關。本作遙

祖溺心干載乃相關但願長如此。躬耕非所歎。

飲酒

衰榮無定在。彼此更共之。邵生瓜田中。寧似東陵時。寒暑有代謝。人道每如茲。達人解其會。逝將不復疑。時與一句佛。本作忽與一勝酒日夕歡相持。

道喪向千載。人人惜其情。有佛不肯念。本作有酒不肯飲但願世間名。所以貴丈夫。本作我身豈直爲本作豈不在一生。一生復能幾。倏如流電驚。不得無量壽。擾擾欲何成。本作鼎鼎百年內持此欲

結廬在人境。而無車馬喧。問君何能爾。心遠地自偏。採菊東籬下。悠然見南山。山氣日夕佳。飛鳥相與還。此中有真意。念佛以忘言。本作欲辯已忘言

清晨聞叩門。倒裳往自開。問子爲誰歟。田父有好懷。壺漿遠見候。疑我與時乖。縵縷

茅檐下未足爲高樓。一世皆尙同。願君汨其泥。深感父老言。稟氣寡所諧。紆轡誠可學。違已詎非迷。且勸共念佛。本作且共飲此吾駕不可回。

羲農去我久。學世少復真。汲汲魯中叟。彌縫使其淳。鳳鳥雖不至。禮樂暫得新。洙泗輟微響。漂流速狂秦。詩書復何罪。一朝成灰塵。區區諸老翁。爲事誠殷勤。如何絕世下。六籍無一親。終日馳車走。不見所問津。若復不念佛。本作快飲空負頭上巾。濁世本作恨多謬誤。君當遠俗人。本作醉人

### 止酒

居止次城邑。逍遙自閑止。坐止高蔭下。步止葦門裏。好味止園葵。大懼止稚子。平生不止酒。酒止情無喜。暮止不安寢。晨止不能起。日月欲止之。營衛止不理。徒知止不樂。未信止利已。始覺止爲善。今朝真止矣。從此一止去。將止金蓮泚。本作扶桑清顏止好本作宿容。奚止千萬祀。

### 擬古

迢迢百尺樓。分明望四荒。暮作歸雲宅。朝爲飛鳥堂。山河滿目中。平原轉茫茫。古時功名士。慷慨爭此場。一旦百歲後。相與還北邙。松柏爲人伐。高墳互低昂。頽基無遺主。游魂在何方。榮華誠足貴。亦復可憐傷。原作無下二句何如生淨土。爲樂竟未央。

種桑長江邊。三年望當採。枝條始欲茂。忽值山河改。柯葉自摧折。根株浮滄海。春蠶既無食。寒衣欲誰待。本不植高原。今日復何悔。原作無下二句若不念彌陀。誰免閻羅醜。

雜詩

人生無根蒂。飄如陌上塵。分散逐風轉。此已非常身。落地爲兄弟。何必骨肉親。得歡何最樂。本作當作樂念佛本作酒聚比鄰。盛年不重來。一日難再晨。及時當勉勵。歲月不待人。

日月不肯遲。四時相催迫。寒風拂枯條。落葉掩長陌。弱質與運頽。玄鬢早已白。素標插人頭。前途漸就窄。家爲逆旅舍。我如當去客。去去欲何之。西方有寶宅。本作南山有舊宅

昔聞長者言。掩耳每不喜。奈何五十年。忽已親此事。求我盛年歡。一毫無復意。去去

轉欲遠。此生難再植。念佛求至樂。本作家持作竟此歲月駛。有子但歸佛。本不金何  
用身後置。

讀山海經

孟夏草木長。繞屋樹扶疏。衆鳥欣有託。吾亦愛吾廬。既耕亦已種。時還讀我書。窮巷  
隔深轍。頗迴故人車。歡言理齋食。本春酒酌摘我園中蔬。微雨從東來。好風與之俱。送  
想琉璃地。澄觀極樂圖。本傳流觀山海圖放懷同宇宙。本終字宙不樂復何如。

借白居易詩勸念佛二十二首

予於古人詩。最愛陶淵明白樂天二公之作。以其恬澹清淨。養之深而言之切。惜  
其勸酒詩多。此由解脫無方。亦是詩人結習不足效也。嘗借陶公詩易數字。用勸  
念佛。代飲酒。今復借白公詩爲之。世儻有同好者乎。亦助道之音也。且公早契禪  
機。晚歲專修淨業。其竟生淨土。又何疑焉。勸人念佛。固公志也。江謙謙

啄木曲

莫買寶翦刀。虛費千金直。我有心中愁。知君翦不得。莫磨解結錐。虛勞人氣力。我有腸中結。知君解不得。莫染紅絲線。徒誇好顏色。我有雙淚珠。知君穿不得。莫近紅鑪火。炎氣徒相逼。我有兩鬢霜。知君銷不得。刀不能剪心。愁不能解腸。結線不能穿。淚珠火不能銷。鬢雪不如專念阿彌陀。本作不如飲此神聖杯萬念千憂一時歇。

短歌行

曛曛太陽如火色。上行千里下一刻。出爲白晝入爲夜。圓轉如珠住不得。住不得。可奈可。爲君苦口本作舉酒歌短歌。歌聲苦。詞亦苦。四座少年君聽取。今夕未竟明日催。秋風纔住春風迴。人無根蒂時不駐。朱顏白日相隳頹。勸君早念彌陀佛。本作且強笑一面勸君早占金蓮臺。本作復強一杯娑婆那得本作人長歡樂。相約西方歸去來。本作年少須與老到來

贈李杓直

世路重祿位。柄柄者孔宣。人情愛年壽。天死者顏淵。二人如何人。不奈命與天。我今信多幸。撫己愧前賢。己年四十四。又爲五品官。况茲知足外。別有所安焉。早年以身

代直赴逍遙篇。近歲將心地。迴向西方禪。

本作南宗禪

外順世間法。內脫區中緣。進不厭

朝市。退不戀人寰。自吾得此心。投足無不安。體非導引適。意無江湖閒。隨緣好念佛。

本作有興或飲酒

無事多掩關。寂靜夜深坐。安穩日高眠。秋不苦長夜。春不惜流年。委形老

少外。忘懷生死間。昨日共君語。與余心夷然。此道不可道。因君聊強言。

### 浩歌行

天長地久有時畢。

本作無終畢

昨夜今朝又明日。鬢髮蒼浪牙齒疏。不覺身年四十七。前

去五十有幾年。把鏡照面心茫然。既無長繩繫白日。又無大藥駐朱顏。朱顏日漸不

如故。青史功名在何處。欲留年少待富貴。富貴不來年少去。去復去兮如長河。東流

赴海無迴波。賢愚貴賤同歸盡。北邙塚墓高嵯峨。古來如此非獨我。惟有念佛離娑

婆。

本作未死有酒且高歌

顏回短命伯夷餓。我今所得亦已多。功名富貴皆過客。

本作須待命

得生

極樂樂如何。

本作命若不來爭奈何

真孃墓

墓在虎邱寺

真孃慕虎邱道。不識真孃鏡中面。唯見真孃墓頭草。霜摧桃李風折蓮。真孃死時猶少年。脂膚美手不牢固。世間尤物難留連。難留連。易消歇。塞北花。江南雪。原作無唯有西方極樂邦。生者壽命無邊劫。

耳順吟

三十四十五慾牽。七十八十百病纏。五六十卻不惡。恬澹清淨心安然。已過愛貪聲利後。猶在病羸昏耄前。未無筋力尋山水。尙有心情對簡編。本作聽晨持佛號課百拜。本作開闢新閑。本作憶舊詩吟一篇。親知故舊本作敦且相勸。不用嫌他遲暮年。本作耳順。

答崔晦叔十二月四日見寄

今歲日餘二十六。來歲年登六十二。尙不能憂眼下身。因何更算人間事。禪客本作居士忘客默默坐。愚夫本作先生枕麴昏昏睡。何似相尋極樂邦。本作早晚相樂邦本作去此無多地。



王夫子

王夫子送君爲一尉。東南三千五百里。道途雖遠位雖卑。月俸猶堪活妻子。男兒日讀古人書。束帶斂手來從事。近將徇祿給一家。遠則行道佐時理。行道佐時須待命。委身下位無爲取。命苟未來且求食。官無卑高及遠邇。男兒上既未能濟天下。下又不至飢寒死。吾觀九品至一品。其間氣味都相似。紫綬朱紱青布衫。顏色不同而已矣。王夫子別有一事須本作欲勸君。一聲佛號心歡喜。本作逢酒逢春日歡喜

放旅鴈

元和十年冬作

九江十年冬大雪。江水生冰樹枝折。百鳥無食東西飛。中有旅鴈聲最飢。雪中啄草冰上宿。翅冷騰空飛動遲。江童持網捕將去。手攜入市生賣之。我本北人今譴謫。人鳥雖殊同是客。見此客鳥傷客人。贖汝放汝飛入雲。鴈鴈汝飛向何處。第一莫飛西北去。淮西有賊討未平。百萬甲兵久屯聚。官軍賊軍相守老。食盡兵窮將及汝。健兒飢餓射汝喫。拔汝翅翎爲箭羽。原作無下六句我汝此土名娑婆。三界火宅無安家。西方有

國名極樂。生者得壽無邊涯。六道四生無不攝。但念彼佛阿彌陀。

偶然二首

題曰偶然。實非偶然也。

楚懷邪亂靈均直。放棄合宜何惻惻。漢文明聖賈生賢。謫向長沙堪歎息。人事因緣非一端。本作人事多端何足怪。天文至信猶差忒。月離于畢合滂沱。有時不雨誰能測。

火發城頭魚水裏。救火竭池魚失水。乖龍藏在牛領中。雷擊龍來牛致死。人道著神龜骨聖。試卜魚牛那至此。三世因果唯佛知。本作六十四卦七十鑽。世智本作畢竟不能知所以。

對鏡吟

白頭老人照鏡時。掩鏡沈吟舊詩。二十年前一莖白。如今變作滿頭絲。自注余二十年前常

有詩云。白髮生一莖。朝來明鏡裏。勿言一莖少。滿頭從此始。今則滿頭矣。吟罷迴心無量壽。本作迴頭索杯酒。還本作醉來屈指數

親知。老於我者多窮賤。設使身存寒且飢。少於我者半爲土。墓樹已抽三五枝。我今

幸得見頭白。飢時有食寒有衣。本作俸祿不薄。官不卑。心頭有佛身無苦。本作眼前有酒。心無苦。只合歡

娛不合悲。

閒吟

貧窮汲汲求衣食。富貴營營役心力。人生不富卽貧窮。光陰易過閒難得。我今幸在窮富間。不在朝廷不入山。看雪尋花玩風月。棲心極樂長年閒。本作洛陽城。夏七年閒。

海漫漫戒求仙也

海漫漫。直下無底旁無邊。雲濤煙浪最深處。人傳中有三神山。山上多生不死藥。服之羽化爲天仙。秦皇漢武信此語。方士年年采藥去。蓬萊今古但聞名。煙水茫茫無覓處。海漫漫。風浩浩。眼穿不見蓬萊島。不見蓬萊不敢歸。童男卯女舟中老。徐福文成多誑誕。上元太一虛祈禱。君看驪山頂上茂陵頭。畢竟悲風吹蔓草。何況玄元聖祖五千言。不言藥。不言仙。不言白日昇青天。原作無。下二句無。願迴世上求仙客。來趁彌陀大願船。

贈王山人

聞君減飲食。日聽神仙說。暗待非常人。潛求長生訣。言長本對短。未離生死轍。假使

得長生才能勝夭折。松樹千年朽。槿花一日歇。畢竟共虛空。何須誇歲月。彭殤徒自異。生死終無別。不如學無生。無生卽無滅。

詠拙

所稟有巧拙。不可改者性。所賦有厚薄。不可移者命。我性拙且蠢。我命薄且屯。問我何以知。所知良有因。亦曾舉兩足。學人蹋紅塵。從茲知性拙。不解轉如輪。亦曾奮六翮。高飛到青雲。從茲知命薄。摧落不逡巡。慕貴而厭賤。樂富而惡貧。同此天地間。我豈異於人。性命苟如此。反則成苦辛。以此自安分。雖窮每欣欣。葺茅爲我廬。編蓬爲我門。縫布作袍被。種穀充盤飧。時披淨土書。遙想西方鄰。本作靜讀古人書。聞釣清渭濱。優哉復游哉。聊以終吾身。

夏日作

葛衣疎且單。紗帽輕復寬。一衣與一帽。可以過炎天。止於便吾體。何必被羅紈。宿雨林筍嫩。晨露園葵鮮。烹葵炮嫩筍。可以備朝餐。止於適吾口。何必飫腥羶。飯訖盥漱。

已捫腹方果然。婆婆庭前步。安穩窗下眠。行住與坐臥。心與彌陀緣。原作無外養物不費。內歸心不煩。不費用難盡。不煩神易安。庶幾無天悶。得以終天年。

逸老

白日下駸駸。青天高浩浩。人生在其中。適時卽爲好。勞我以少壯。息我以衰老。順之多吉壽。違之或凶夭。我初五十八。息老雖非早。一閒十三年。所得亦不少。况加祿仕後。衣食常溫飽。又從風疾來。女嫁男婚了。胸中一無事。浩氣凝襟抱。飄若雲信風。樂於魚在藻。桑榆坐已暮。鐘漏行將曉。皤然七十翁。亦足稱壽考。筋骸本非實。一束芭蕉草。眷屬偶相依。一夕同棲鳥。去何有顧戀。住亦無憂惱。生死尙復然。其餘安足道。故以念佛心。本作臨冥契佛懷抱。本作冥然

逍遙詠

亦莫戀此身。亦莫厭此身。此身何足戀。萬劫煩惱根。此身何足厭。一聚虛空塵。無戀亦無厭。始是逍遙人。原作無但念輪迴苦。蓮邦早問津。

有感

鬢毛已斑白。衣綬方朱紫。窮賤當壯年。富榮臨暮齒。車輿紅塵合。第宅青煙起。彼來此須去。品物之常理。第宅非吾廬。逆旅暫留止。子孫非我有。委蛻而已矣。有如蠶造繭。又似花生子。子結花暗凋。繭成蠶老死。悲哉可奈何。舉世皆如此。原作無下二句遣此當奈何。極樂蓮池裏。

念佛偈

余年七十二。不復事吟哦。看經費眼力。作福畏奔波。何以度心眼。一聲阿彌陀。行也阿彌陀。坐也阿彌陀。縱饒忙似箭。不廢阿彌陀。日暮而途遠。吾生已蹉跎。且夕清淨心。但念阿彌陀。達人應笑我。多卻阿彌陀。達又作麼生。不達又如何。普勸法界衆。同念阿彌陀。

畫西方幀讚

我本師釋迦如來說。從是西方過十萬億佛土。有世界號極樂。以無八苦四惡道。

故也。其國號淨土。以無三毒五濁業故也。其佛號阿彌陀。以壽無量。願無量。功德相好。光明無量故也。諦觀此娑婆世界。微塵衆生。無賢愚。無貴賤。無幼艾。有起心歸佛者。舉手合掌。必先嚮西方。怖戾苦惱者。開口發聲。先念阿彌陀佛。又範金合土。刻石織文。乃至印水。聚沙童子戲者。莫不率以阿彌陀佛爲上首。不知其然而然。由是而觀。是彼如來有大誓願於此衆生。此衆生有大因緣於彼國土。明矣。不然者。東南北方。過去現在未來。佛多矣。何獨如是哉。唐中大夫太子少傅上柱國馮翊縣開國侯賜紫金魚袋白居易。當衰暮之歲。中風痺之疾。乃捨俸錢三萬。命工人杜宗敬。按阿彌陀。無量壽二經。畫西方世界一部。高九尺。廣丈有三尺。阿彌陀佛坐中央。觀音勢至二大士侍左右。天人瞻仰。眷屬圍繞。樓臺伎樂。水樹華鳥。七寶嚴飾。五彩彰施。爛爛煌煌。功德成就。弟子居易。焚香稽首。跪於佛前。起慈悲心。發弘誓願。願此功德。迴施一切衆生。一切衆生。有如我老者。如我病者。願皆離苦得樂。斷惡修善。不越南部。便覩西方。白毫大光。應念來感。青蓮上品。隨願往生。從現在身。盡未來際。常得親近。

而供養也。欲重宣此願。而偈讚云。

極樂世界清淨土。無諸惡道及諸苦。願如我身老病者。同生無量壽佛所。